

श्री दि. जैन अमरग्रन्थमाला का पंचम पुष्प

कविवर स्वर्गीय पं. दीपचंदजी शाह कृत

## अध्यात्म पंच संग्रह

परमात्मपुराण, ज्ञानदर्पण,  
स्वरूपानन्द, उपदेशसिद्धान्तरत्न,  
सवैयाटीका

प्रकाशक- श्री दि. जैन अमरग्रन्थमाला,  
उदासीनाश्रम तुकोगंज इन्दौर  
वीर निर्वाण सं. २४७५, विक्रम संवत् २००५



### ग्रंथानुक्रमणिका

अ. नं.	ग्रंथ के नाम		कुल पृष्ठ
१	परमात्मपुराण	(गद्य)	१-४०
२	ज्ञानदर्पण	(पद्य)	४१-१०१
३	स्वरूपानन्द	(पद्य)	१०२-१२८
४	उपदेशसिद्धान्तरत्न	(पद्य)	१२९-१५५
५	सवैयाटीका	(गद्य)	१५६-१६०

## भूमिका

प्रस्तुत संग्रह में परमात्मपुराण, ज्ञानदर्पण, स्वरूपानंद, उपदेश सिद्धान्त रत्न और सवैया टीका ये पांच ग्रंथ हैं। पांचोंही कविवर श्री दीपचन्दजी शाह कासलीवाल द्वारा रचित हैं। आपका निवास स्थान सांगानेर था परन्तु ग्रंथरचना आपने आमेर (जयपुर) में रहकर की थी। आप विक्रम की उठारहवीं शताब्दी के उत्तरार्ध में हुए हैं। इन रचनाओं और अन्य प्रकाशित ग्रन्थों के देखने से सहज ही ज्ञात होजाता है कि आपका आध्यात्मिक ज्ञान एवं कवित्व उच्च कोटिका था। आपके ग्रंथोंकी भाषा राजपूताने की ढूंढारी है परन्तु जैसी भाषा पंडित प्रवर टोडरमलजी आदि सिद्धांत शास्त्र के महान् विद्वानोंकी रही है, वैसी भाषा इनकी नहीं। इनकी भाषा में एक ही शब्द व वाक्यरचना के अनेक प्रयोग मिलते हैं। कि आपने उस काल में ग्रंथ रचना करने की जो भाषा प्रचलित थी उसमें अनभ्यस्त रहते हुए भी उस भाषा का तोडमरोडकर प्रयोग करने का प्रयत्न किया है। इसीलिए हमें भाषा संबंधी भिन्न २ प्रयोगों को एकसा बनाने का खयाल रखना पडा है। कई स्थानों पर तो आपने शुद्ध संस्कृत शब्दोंका जैसा का तैसा ही प्रयोग किया है और कई जगह उन्हें देशीभाषा में बदल दिया है। आपकी प्रथम रचना आत्मावलोकन ज्ञात होती है जो भाषा की दृष्टि से साधारण है, पर वह भावों की गहनता और आध्यात्मिकसामग्री के कारण अपना महत्व रखती है। आत्मावलोकन श्री पाटनी दि. जैन ग्रंथमाला मारोठ से प्रकाशित हो चुका है और इसी ग्रंथमाला से अनुभवप्रकाश भी छपचुका तथा

चिद्विलास छप रहा है। अमर ग्रंथमाला से अनुभव प्रकाश और भाव दीपिका ग्रंथ छप चुके हैं। वे सब ग्रंथ उक्त पं. दीपचंदजी सा. की ही रचनायें हैं। आपकी भावदीपिका, अनुभव प्रकाश और परमात्मपुराण ये गद्य रचनायें सर्वश्रेष्ठ रचनायें हैं। परमात्मपुराण तो बिलकुल ही मौलिक है जिसमें ग्रंथकार की कल्पना और प्रतिभा निखर पडती है। ज्ञानदर्पण, स्वरूपानंद, उपदेश सिद्धांत ये तीन पद्य रचनायें हैं इनमें दोहा और सवैया में आत्मदृष्टि की ओर झुकने की प्रेरणा मिलती है और बहिर्मुखीवृत्ति संसारिकता के दोषों का भिन्न २ शब्दों में सोदाहरण विशद विवेचन है। इनके पढने में अपूर्व आनंद आता है। ज्ञानदर्पण और स्वरूपानंद आपकी सुंदर कृति है। यह पहले भी प्रकाशित हो चुकी है। शेष ग्रंथ नवीन ही प्रकाश में आरहे हैं। व ग्रंथकार पं. टोडरमलजी सा. के पहले के हैं क्योंकि टोडरमलजी सा. ने आपके आत्मावलोकन ग्रंथका उद्धरण अपनी रहस्यपूर्ण चिट्ठी में दिया है। प्रस्तुत रचनाओं में हम प्रथक २ ग्रंथों का परिचय नहीं दे रहे हैं यह तो उन ग्रंथों के मोटे २ अक्षरों में लिखे हुए शीर्षकों से मालूम हो जायगा और पद्य ग्रंथों में केवल आध्यात्मिक भाव ही हैं किसी खास विषय को लेकर विवेचन नहीं है। सवैया टीका में एक सवैया प्रारंभ में लिखकर उसका बिस्तारपूर्वक अर्थ लिखा गया है।

इन ग्रंथोंका टाईप भी मोटा रखा गया है ताकि वयोवृद्ध एवं त्यागी महानुभाव भी बिना कष्टके इन्हें पढ सकें।

श्री पूज्य भ. ब्र. दुलीचन्दजी महाराज उपाधिष्ठाता श्री दि. जैन उदासीनाश्रम तुकोगंज इन्दौर ने संस्था के श्री दि. जैन अमर ग्रंथालय में विद्यमान हस्तलिखित ग्रंथों को स्वाध्यायप्रेमी मुमुक्षु बंधुओं के लाभार्थ छपाना उचित समझकर यह आयोजन किया है। आप

.....  
 इस ओर पूरायोग देकर परिश्रम कर रहे हैं दानी सज्जनों द्वारा आपको इस कार्य में द्रव्यकी सहायता भी मिलती जा रही है। आशा है पाठकगण इन ग्रंथों को पढ़कर एवं मनन कर आत्महित की ओर अग्रसर होंगे।

- **नाथूलाल जैन** (साहित्यरत्न, संहितासूरि, शास्त्री न्यायतीर्थ) इन्दौर।

## परमात्मपुराण की विषयसूची

१	मंगलाचरण	१
२	परमात्मारूपी राजा का राज्य और उसकी विभूति	१
३	आत्मप्रदेश रूपी देशों के निवासी गुणरूपी पुरुषोंको क्षत्रिय, वैश्य, ब्राह्मण, शूद्र, ब्रह्मचारी, वानप्रस्थ, गृहस्थ, साधु, ऋषि, मुनि और यति क्यों कह सकते ?	२
४	गुणोंको प्रथक २ क्षत्रिय कहसकने में हेतु	२
५	गुणोंको प्रथक २ वैश्य कहसकने में हेतु	२
६	गुणों को अलग अलग ब्राह्मण कह सकने में हेतु	३
७	गुणों को अलग अलग शूद्र कह सकने में हेतु	३
८	गुणों को चार आश्रमों में से ब्रह्मचारी कह सकने में हेतु	३
९	गुणों को गृहस्थ कह सकने में हेतु	४
१०	गुणों को वानप्रस्थ कह सकने में हेतु और प्रथक २ गुणों को वानप्रस्थपने को सिद्धि	४
११	सत्ता, द्रव्यत्व अगुरुलघुत्व, प्रमेयत्व, ज्ञान, दर्शन, आदि गुणों को प्रथकर ऋषि, साधु, यति और मुनि कह सकने में हेतु	१२
१२	परमात्मारूपी राजा के सरदार	२४
१३	प्रत्येक गुण-पुरुष का अपनी गुणपरिणति-नारी के साथ भोगविलास का वर्णन	२५
१४	अगुरुलघु-नर द्वारा कियेगये विलासके समय शृंगार आदि नवरसोंकी सत्तागुणमें सिद्धि	२८

१५ गुण-पुरुषों का गुणपरिणति-नारी से विलास और उनके संयोग से आनंद-पुत्रकी उत्पत्ति	३१
१६ दर्शन, ज्ञान, चारित्र्य इन तीन मंत्रियों द्वारा परमात्मा-राजा की सेवा	३१
१७ सम्यक्त-फौजदार और परिणाम-कोटवाल का कार्य	३५
१८ परमात्मा-राजा और उसकी चित्परिणति तिया	३८



## परमात्मपुराण

दोहा-परम अखंडित ज्ञान मय, गुण अनंत के धाम।  
अविनासी आनंद अज, लखत लहै निज ठाम॥१॥

अचल अतुल अनंत महिमा मंडित अखंडित त्रैलोक्य शिखर परि विराजित अनुपम अबाधित शिव द्वीप है। तामें आत्म प्रदेश असंख्यदेस हैं सो एक एक देस अनंत गुण पुरुषनिकरि व्याप्त है। जिन गुण पुरुषन के गुण परिणति नारी है। तिस शिव द्वीप कौ परमात्म राजा है। ताके चेतना परिणति राणी है। दरशन ज्ञान चरित्र ये तीन मंत्री हैं। सम्यक्त्व फोजदार है। सब देश का परिणाम कोटवाल है। गुणसत्ता मंदिर गुण पुरुषन के हैं। परमात्म राजा का परमात्म सत्ता महल वण्यां तहां चेतना परिणति कामिनीसों केलि करत परम अतीन्द्रिय अबाधित आनंद उपजे है। गुण अपने लक्षण की रक्षा करै तातैं यह सब गुण क्षत्रिय कहिये। अरु गुणरीति वरतनां व्यापार करै तातैं वैश्य कहिए। ब्रह्मरूप सब हैं। तातैं ब्राह्मण कहिए। अपनी परिणति वृत्ति करि आपकौं आप सेवै तातैं शूद्र कहिए। ब्रह्म कौं आचरण सब गुण करै तातैं ब्रह्मचारी। अपनी गुण परिणति तिया के विलास बिना पर परिणति नारी न सेवै है तातैं परतिया त्याग ब्रह्मचारिज के धारी ब्रह्मचारी है। अपने चेतनावान कौं धारी प्रस्थान कीयें तातैं वानप्रस्थ है। निज लक्षण रूप निजगृह में रहे हैं तातैं गृहस्थ है। स्वरूप कौं साधै तातैं साधु कहिए। अपनी गुण

महिमा रिद्धि कौं धारै तातैं रिषि कहिए। प्रत्यक्षज्ञान सब में आया तातैं मुनि कहिए। परभाव को जीति लियो तातैं यति कहिए। इनमें जो विशेष है सो लिखिए है।

### क्षत्रिय का वर्णन।

सब गुण परस्पर सब गुण की रक्षा करै है सो कहिए है। प्रथम सत्ता गुण के आधारि सब गुण हैं तातैं सत्ता सब की रक्षा करै है। सूक्ष्म गुण न होता तो चेतन सत्ता इन्द्रिय ग्राह्य भये अतीन्द्रियत्व प्रभुत्व का अभाव होता महिमा न रहती तातैं सूक्ष्मत्व सब अतीन्द्रिय प्रभुत्व की रक्षा करै है। प्रमेयत्व गुण न होता तो वीर्यादि सब गुण प्रमाण करवेजोग्य न होते तातैं प्रमेयत्व सबका रक्षक है। अस्तित्व बिना सब का अभाव होता तातैं सब की अस्तित्व रक्षा करै है। वस्तुत्व न होता तो सामान्य विशेष भाव सब का न रहता तातैं वस्तुत्व सब की रक्षा करै है। या प्रकार सब गुण में रक्षा करणें का भाव है तातैं क्षत्रियपणां आया।

### आगैं वैश्यवर्णन कहिये है।

अपनी अपनी रीति बरतनां व्यापार सब करै है। दरशन देखवे मात्र, मात्र निर्विकल्प रीति वरतनां-स्वपर देखने की रीति-वरतनां व्यापार करै है। सत्ता है लक्षण निर्विकल्प रीति वरतनां विशेष द्रव्य है। रीति गुण है रीति वरतनां पर्याय है रीति वरतनां व्यापार करै है। वस्तुत्व सामान्य विशेष रूप वस्तुभाव निर्विकल्प रीति वरतनां ज्ञान में सामान्य विशेष रीति वरतनी सब गुण में सामान्य विशेष रीति वरतनां व्यापार कहिए। प्रत्येक गुण प्रमाण करवेजोग्य निर्विकल्प रीति वरतनां गुण नै प्रमाण करवेजोग्य विशेष वरतनां व्यापार प्रमाण गुण करै है। या प्रकार सब गुण में निर्विकल्प रीति अरु विशेष रीति वरतनां व्यापार हैं तातैं सब वैश्य कहिये।

### आगै ब्राह्मण का वर्णन कीजिये है।

ज्ञान गुण निज स्वरूप है। ब्रह्म ज्ञान तैं एक अंस हू अधिक ओछा नांही। ज्ञान प्रमाण है, ज्ञान स्वरूप है। ज्ञान बिना भयें जड होय तातैं जानपणां बिना सरवज्ञ न होइ। तब ब्रह्म की अनंत ज्ञायक शक्ति गयें ब्रह्मपणां न रहै, तातैं ज्ञान ब्रह्म व्यापक ब्रह्म रूप है, तातैं ज्ञान को ब्राह्मण संज्ञा भई। दरशन स्वरूपमय है, सर्वदरशित्व शक्ति ब्रह्म में दरशन करि है, दरशन बिना देखने की शक्ति ब्रह्म में न होय तातैं दरशन सब ब्रह्म में व्यापि ब्रह्मरूप होय रह्या है। तातैं ब्रह्म सरूप भया दरशन ब्राह्मण कहिये। प्रमेय गुणतैं सब द्रव्य गुण पर्याय प्रमाण करवे जोग्य है तातैं प्रमेय ब्रह्मसरूप तातैं प्रमेय ब्राह्मण भया। या प्रकार सब गुण ब्राह्मण भये।

### आगै शूद्रसरूप गुण को बतावै है।

अपनी पर्यायवृत्ति करि एक एक गुण सब गुण की सेवा करै है, ताकौ वर्णन-सूक्ष्मगुण के अनंतपर्याय ज्ञान सूक्ष्म दरसन सूक्ष्म वीर्य सूक्ष्म सत्ता सूक्ष्म सूक्ष्म गुण अपनी सूक्ष्मपर्याय न देता तौ वे सूक्ष्म न होते। तब स्थूल भयें इन्द्रिय ग्राह्य भयें जड़ता पावेत, तातैं सूक्ष्म गुण अपनी सूक्ष्मपर्याय दे सब गुण का स्थिति भाव सुद्ध यथावत कार्य संवारै है। यातैं सूक्ष्मगुण की सेवावृत्ति सधी। तातैं सूक्ष्मगुण शूद्र ऐसा नाम पाया। सत्तागुण के अनंतपर्याय सत्ता है लक्षण पर्याय सबकौ दीये तब सब गुण अस्तिभाव रूप भये अपनी अस्तिभाव पर्याय दे उनके अस्तिभाव राखन के कार्य संवारै। तातैं सत्ता उनके कार्य संवारने तैं उनकी सेवावृत्ति भई तब सत्ता कौ शूद्र ऐसा नाम भया। या प्रकार सब गुण शूद्र भये।

### आगै च्यारि आश्रम भेद लिखिये है।

सब गुण ब्रह्म आचरण कीये हैं, तातैं ब्रह्मचारी हैं। ज्ञान ब्रह्म

एक है तातैं ज्ञान ब्रह्मका आचरण कीयें है ज्ञान ब्रह्मचारी। दरशन ब्रह्मरूप तातैं दरशन ब्रह्मचारी। वीर्य सब ब्रह्म की निहपन राखैं, तातैं ब्रह्म वीर्यशक्ति तैं ब्रह्म भया है। तातैं वीर्य ब्रह्म के आचरण रूप भया तातैं वीर्यब्रह्मचारी, सत्ता ब्रह्मरूप तातैं सत्ता ब्रह्मचारी। या प्रकार सब गुण ब्रह्मचारी हैं।

### आगै गृहस्थ भेद लिखिये हैं।

ज्ञान निज ज्ञान सत्ता गृह में तिष्ठै हैं तातैं ज्ञान गृहस्थ कहिये। दरशन अपने दरशन सत्ता गृह में स्थिति कीयें है; तातैं दरशन गृहस्थ, वीर्य अपने वीर्य सत्ता गृह में निवसै है तातैं वीर्य गृहस्थ, सुख अपने अनाकुललक्षण सुख सत्ता गृह में स्थिति कीये है; तातैं सुख गृहस्थ है। या प्रकार सब (गुण) गृहस्थ हैं।

### आगै वानप्रस्थ भेद कहिये ।

अपने निज वान में प्रस्थ कहिये तिष्ठै। वान आपका निज रूप तामें रहणां सो वानप्रस्थ तातैं ज्ञान अपने जानपना रूप रहै। दरशन अपने द्रश्य चेतना रूप में स्थिति कीयै हैं। सत्ता सासता लक्षण रूप में सदा विराजै है। प्रमेय अपने प्रमाण करवे जोग्य रूप में अवस्थान करै है। या प्रकार सब गुण अपने निज रूप रहै हैं। ज्ञान का निज वान ऐसा है। विशेष जाणन प्रकाश रूप भया है, अरु आप आप में जाननरूप परणया है। अपने जानन तैं अपनी सुद्धता भई। सरूप सुद्ध के भयें सहज ज्ञायकता के विलास नैं अनंत निज गुण का प्रकाश विकास्या तब गुण गुण के अनंत परजाय भेद सब भासे, अनंत शक्ति की अनंत महिमा ज्ञान में प्रगट भई।

इहां कोई प्रश्न करै-ज्ञेय प्रकाश ज्ञान मै मया उपचार तैं जानना है, अपने गुण का जानना कैसे है ?

ताका समाधान-पर ज्ञेय का सत जुदा है, निज गुण का सत ज्ञान के सत सौं जुदा नांही। ज्ञान की ज्ञायकता के प्रकाश में एक सत जान्या गया है। जो उपचार है विन के जानें आनंद न होइ। (प्रश्न) आनंद होइ है तो गुण विषै गुण उपचार क्यों कह्या ?

तहां समाधान-ज्ञान में दरशन आया सो ज्ञान दरशन रूप न भया, काहे तैं उसका देखनां लक्षण सो ज्ञान में न होय। वीर्य का निहपति करण सामरथ्य लक्षण ज्ञान में न होय ऐसैं अनंत गुण के लक्षण ज्ञान न धरै, तातैं लक्षण अपेक्षा उपचार लक्षण विनके न धरै। अरु आये ज्ञान में कहे तातैं उपचार सत्ता भेद नांही। अनन्य भेद तैं ज्ञानसत; दरशन सत; वीर्य सत; सुख सत; ऐसा कलपि करि भेद कह्या परि प्रथक भेद नाहीं। तातैं भेदाभेद विशेष सत लक्षण की अपेक्षा करि जानिये। ज्ञान द्रव्य गुण पर्याय निज सरूपकौं जानैं; ज्ञान ज्ञानकौं जानैं तहां आनंद अमृत रस समुद्र प्रगटै। सब द्रव्य गुण पर्याय ज्ञान प्रकाशे तब प्रगटे। ज्ञान नें विनकी महिमा प्रगट करी तातैं ऐसा ज्ञान सरूप ज्ञानवान है, तामें ज्ञान रहै तब ज्ञान वानप्रस्थ कहिये। दरशनवान दरशन रूप सो सब द्रव्य गुण पर्याय का सामान्य विशेषरूप वस्तु का निर्विकल्प सत्त अवलोकन करै है। तहां सब लक्षण भेदाभेद उपचारादि रीति ज्ञान की नांई जानि लेणी। आनंद का प्रवाहनिज अवलोकनितैं होय है। निर्विकल्परस में भेद भाव विकल्प सब नहीं, निर्विकल्परस ऐसा है; तहां विकल्प नहीं।

प्रश्न इहां उपजै है-जो दरशन दरशन कौं देखै सो तौ निर्विकल्प ज्ञानादि अनंतगुण अवलोकन में विकल्प भया कि निर्विकल्प रह्या? जो निर्विकल्प कहौगे तौ पर दूजा गुण का दूजा लक्षण के देखवे करि निर्विकल्प न रह्या, अरु विकल्प कहौगे तौ निर्विकल्प दरशन यहकीना न संभवैगा।

ताका समाधान- ज्ञेय का देखना तौ उपचार करि वामै आया। दरशन में और गुण दरशन बिनां जो देखे लक्षण करि तौ उपचार सब के लक्षण देखे। सत्ता अभेद है ही, अनन्य भेद प्रथक भेद नांही सब का निर्विकल्प सत। अवलोकन तैं निर्विकल्प है। दरशन दरशनकौ देखै, दरशन की शुद्धता निर्विकल्प है। अपनां निज देखना तौ अपनें दिष्टा लक्षण सौं व्यापक तन्मय लक्षण अभेद है। दरशन दरवि; देखना गुण, देखवे रूप परिणमन पर्याय; निश्चय अभेद दरशन भेद कथन मात्र मै व्यौहार है। निजरूपकौं देखतैं सब गुण का देखनां तौ है। धरें देखवे मात्र गुण कौं है आन लक्षण न धरैं। अपनें स्वगुण के प्रकाश में आनगुण स्वजाति चेतनां की अपेक्षा प्रकाशे। जिस सत मै सौं अपनां गुण प्रकाश्या तिस सत में सब गुण प्रकाशे परि विनके लक्षण कौं धरता तौ विकल्पी होता। अपना प्रकाश देखवे मात्र ज्यौं का त्यौं राखै है। आपनी दरशन रूप दरपन भूमि में पर ज्ञेय विजाती होइ भासै है। निज जाति चेतना एक सत्ता तै प्रगटी सो सब गुण की दरशन प्रकाश की साथि जुगपत प्रगटी। अपना प्रकाश निर्विकल्प जैसा है तैसा रहै है। विजाति पर ज्ञेय स्वजाति प्रथक चेतना ज्ञेय अप्रथक चेतना स्वजाति ज्ञानादि अनंत गुणादी ज्ञेय सब लक्षण भेद, अरु सत्ता अभेदादि रूप भासै। परि निर्विकल्प सत्ता अवलोकन लक्षण कौं न तजै। काहू कौ उपचार करि देखना काहू कौं स्वजाति उपचार देखनां। प्रथक भेदतैं काहू कौं अप्रथकता करि देखना। अभेद चेतना जाति तातैं ऐसा देखना है। तौऊ अपनें निर्विकल्प प्रकाश लक्षण लीयें अखंडित दरशन निर्विकल्प रहै है। यह दरशन वान कहिये रूप में रहै तातैं दरशन वानप्रस्थ कहिये।

प्रमेय सामान्य है; सब में व्यापक है द्रव्य प्रमाण करवे जोग्य

.....  
 प्रमेय तैं भया सब गुण प्रमाण करवे जोग्य प्रमेय के पर्याय नैं कीये पर्याय प्रमेय नैं प्रमाण करवे जोग्य कीये। प्रमेय प्रमाण करवे जोग्य लक्षण कौ लीये है। जो प्रमेय न होता तौ सब अप्रमाणहोते। तातैं प्रमेय गुण अपने प्रमाण करवे जोग्य रूपमय भया है। सत्तागुण कौ प्रमाण प्रमेय नैं कीया, काहे तैं सत्ता सासत्ता है लक्षण कौ लीये है सो सम्यक्ज्ञान नै प्रमाण कीया तब प्रमेय नाम पाया।

**कोई प्रश्न करै है-**सत्ता अपना लक्षण प्रमाण करवे जोग्य आप लीये है। यहां प्रमेयकरि प्रमाण करवे जोग्य काहे कौ कहौ। सब गुण अपने अपने लक्षण करि अपनी अनंत महिमा लीयें प्रमाण करवे जोग्य हैं प्रमेय तैं काहे कहौ ?

**ताकौ समाधान-**एक एक गुण सब आनगुण की सापेक्ष लीयें हैं। एक एक गुण करि सब गुण की सिद्धि है। चेतनां गुण नैं सब चेतना रूप कीये। सूक्ष्मगुण सब सूक्ष्म कीये। अगुरुलघु नै सब अगुरुलघु कीये। प्रदेशवत्त्व गुण नैं सब प्रदेशी कीये तैसैं प्रमेयगुण नैं सब प्रमाण करिवे जोग्य कीये। प्रमेयगुण नैं विनके लक्षण कौ प्रमाण करिवे जोग्य कै वास्तैं विन के लक्षण के मांही प्रवेश करि अभेद रूप सत्ता अपनी करि दर्ई है। तातैं सब गुण प्रमाण करिवे जोग्य भये। जो सब गुण अपने लक्षण कौ धरते प्रमेय विनके माहि न होता तौ अप्रमाण जोग्य होते। तातैं अन्योन्य सापेक्ष सिद्धि है।

**उक्तं च-नाना स्वभाव संयुक्तं, द्रव्यं ज्ञात्वा प्रमाणतः।**

**तत्त्वं सापेक्ष सिद्धयर्थं, स्यान्नयै मिश्रितं कुरु।।१।।**

**इहां फेरि प्रश्न भया-**प्रमेय की अभेद सत्ता सब गुण में कही तौ गुण में गुण नहीं 'द्रव्याश्रया निर्गुणा गुणाः' यह फाकी सूत्र की झुठ होइ एक प्रमेय की अनंत सत्ता भई। एक गुण एक लक्षण व्यापक न रह्यौ।

.....  
**ताकौ समाधान-**सत्ता कौ एक है एक ही सत्ता में अनंत गुण का प्रकाश है। एक एक के प्रकाश गुण की विवक्षा करि गुण २ का सत ऐसा नाम पाया। सत्ता भेद तौ नांही; लक्षण एक एक गुण का जुदा है, लक्षण रूप गुण न मिलै तातैं सत्ता अनन्यत्व करि भेद नांव भया प्रथक भेद न भया। तातैं यह कथन सिद्ध भया। निश्चय सब का एक सत अनन्यभेद लक्षण गुण की अपेक्षा ओर नांव उपचार करि गुण २ का कल्या तौ सत्ता भिन्न भिन्न न भई। तातैं नाना नय प्रमाण है, विरुद्ध नांही। एक प्रमेय अनंत गुण में आया, सो सत्ता एक ही अनंत गुण का प्रकाश तिसमें एक २ प्रमेय प्रकाश सो ही प्रकाश प्रमेय का सब गुण में आया। काहेतैं आया सो कहिए हैं। गुण एक एक के असंख्य प्रदेश वै ही है, विनही में सब गुण व्यापक हैं। प्रमेय हू व्यापक है। तातैं प्रमेय सब प्रदेश व्यापक रूप विसतर्या तब सब गुण के प्रदेश सत में विसके सत भया सो कहनें मै नांव भेद पाया, ये प्रमेय के ज्ञानके ये दरशन के परिवे जुदे जुदे असंख्यात नाही वैही है। तातैं सब गुण का प्रदेश सत एक भया तातैं प्रमेय की अनंत सत्ता न भई। सत्ता तौ कल्पी और कही गुण के लक्षण जुदे के वास्तै मूल सत्ता भेद नांही अनंत गुण लक्षण रूप एक द्रव्य का प्रकाश अनंत महिमा मंडित सो है। वस्तु जनांवनें निमित्त जुदे जुदे दिखाये। गुण गुण की अनंत शक्ति अनंत पर्याय अनंत महिमा अनंत गुण का आधार भाव एक एक गुणमें पाइये। प्रमेय पर्याय करि अनंत गुण में व्यापक होइ वरतैं हैं, सत्ता अनंत नांही। गुण गुण के लक्षण प्रमाण करवेजोग्य प्रमेय पर्याय तैं भये तातैं प्रमेय विलास कहाया। अर गुण ही कौ गुणी कहिये तब सत्ता गुणी भया सत्ता कै सूक्ष्म गुण भया सत्ताका अगुरुलघुगुण भया। वस्तुत्व गुणी भया वस्तुत्व का प्रमेय गुण वस्तुत्व



.....  
 मैं है वस्तुत्व का अगुरुलघु सूक्ष्म अस्तित्व प्रदेशवत्त्व वस्तुत्व मैं पाइये  
 ऐसे अनंत गुण हैं जिस गुण का भेद कहिये तब बिस गुण मैं  
 अनंत गुण का रूप सधै है। तातैं सब भेद जानैं तैं तत्व पावै है  
 अरु अनंत सुख पावै है।

### आगैं तीसरे प्रश्न को समाधान

एक एक गुण एक एक लक्षण व्यापक है। पर्याय की अपेक्षा  
 अनंत गुण व्यापक है जो पर्याय की अपेक्षा सब मैं न व्यापै तौ  
 सब कौ नास होई। सूक्ष्म को पर्याय सबमें न होय तौ सब स्थूल  
 होय अगुरुलघु सबमें न होय तौ सब हलके भारी होइ। प्रमेय सब  
 मैं न व्यापै तौ प्रमाण करवे जोग्य न रहै। तातैं पर्याय गुण गुण  
 का सब गुणमें है। मूल लक्षण एक एक गुण का निज लक्षण  
 पर्याय का धामरूप एक है। ऐसा प्रमेय का भेद है। पर्याय करि  
 अनंत गुण व्यापक। प्रमेय मूलभूत वस्तु एक गुण जानौ ऐसा प्रमेय  
 वान कहिए सरूप प्रमेय मैं रहै है सो प्रमेय वानप्रस्थ कहिए।

### आगैं वस्तुत्व का वानप्रस्थ कहिए है।

सामान्यविशेषरूप वस्तु है, वस्तु का भाव वस्तुत्व है।

वस्तु सामान्य विशेष धरै ताकौ कहिए-अनन्त गुण सामान्य विशेष  
 रूप हैं। ज्ञान सामान्य सो जाननामात्र स्वपरकौ जानैं, ज्ञान यह ज्ञान  
 का विशेष है। जाननमात्रमें दूजा भाव न आवै तातैं सामान्य है।  
 स्वपरके जाननेमें सर्वज्ञ शक्ति प्रगटै है तातैं जाननमात्रमें वस्तुका  
 स्वभाव सधै है। स्वपर जाननां कहै ज्ञान की महिमा अनन्तशक्ति  
 परजायरूप सब जानीपरै है। अनन्त गुणकी अनन्तशक्ति परजाय जानेतैं  
 अनन्त गुण की अनन्त महिमा जानीपरी तब ज्ञानकरि तब सासता  
 आतम पदार्थ की महिमा जानी परी तब सब गुण द्रव्य की महिमा

.....  
 ज्ञान नैं प्रगट करी। जैसे कोई कटेरा काठी बेचै है, वानै कबहू  
 चिंतामणि रतन पाया तब अपने घर मैं धर्या, तब वाकरि प्रकाश  
 भया। तब अपनी नारीकौ कह्या-याके उजियारेमें रसोई करि, तेल  
 तेल की गरज सरी। बिना गुण जाने बहुत काल लागि काठी ढोई।  
 कबहू कोई पारखी पुरुष आया तानें दयाकरि चिंतामणि की महिमा  
 बताई, तब वाका सब्द करि दारिद्र गया। जो पारखी पुरुष न जनावता,  
 महिमा चिंतामणि की तौ छती महिमा अच्छी होती। तैसै अनंत संसार  
 के जीव अनंत महिमा अनंत गुण की न जानै है तातै दुखी भये  
 डोलै हैं। जब श्रीगुरु पारखी मिले तब अनंतगुण की अनंत महिमा  
 बताई तब जिसने भेद पाया सो संसारदारिद्र भेटि सुखी भया। ज्ञान  
 करि जानी परि बाकी महिमा श्री गुरु ज्ञानतै जानि कही, ज्ञान  
 वाके भये वाहनै जानी। तातैं ज्ञान सब गुण की महिमा प्रगट करै  
 है। ज्ञान प्रधान है। अनन्त गुण सिद्धन विषै है ते हू ज्ञान करि  
 जानैं हैं। ज्ञान सब गुण कौ प्रगट करै है, तब विनके गुणकी महिमा  
 प्रगटै है। तातै ज्ञानकी विशेषता कार्यकारी है। एसै ज्ञानसामान्यविशेष  
 करि ज्ञान वस्तु नाम पाया। ज्ञान वस्तुत्व का वान सरूप ज्ञान वस्तुत्व  
 मैं रहै है, तहां ज्ञान वस्तुत्व वानप्रस्थ कहिये।

### आगैं दरशनवस्तुत्व का वानप्रस्थ कहिये है।

दरशन देखनेमात्र परणम्या दरशन का सामान्य स्वपरभेद जुदे  
 देखै है यह दरशन का विशेष है। दरशन न देखै परकौ तब  
 सर्वद्रशित्व शक्ति न रहै। दरशन के अभाव होतैं निर्विकल्प सत्ता  
 का अवलोकन न रहै अनंत ज्ञेय पदार्थ का निर्विकल्प सत्ता सरूप  
 अवलोकन मिटता। तातैं दर्शनसामान्यविशेषरूप वस्तु तिसका भाव  
 दरशन वस्तु है। तिसका वान कहिये सरूप तिसमें तिष्ठता सो दरशन

वस्तुत्व वानप्रस्थ कहिये। ऐसैं सब गुण का वस्तुत्व मिलि एक वस्तुत्व नाम गुण है तिसमें रहना सो वस्तुत्व वानप्रस्थ कहिये।

### आगे द्रव्यत्व वानप्रस्थ कहिये है।

गुण पर्याय कौं द्रवै सो द्रव्य कहिये। द्रव्य के भाव कौं द्रव्यत्व कहिये। ज्ञान जानन रूप है सो आतमा का स्वभाव है। जो आतमा जानन रूप न परणवता तौं जानना न होता, जानना न भयें ज्ञान न होता, तातैं आतम के परनमन तैं ज्ञान भया, परनमन वा द्रव्यत्व गुण तैं भया। द्रव्यत्व गुण के भयें द्रव्य द्रवीभूत भया, जब द्रवीभूत भया तब द्रव करि परणाम प्रगट कीया। जब परणाम प्रगट्या तब गुण द्रव्य रूप परणया। गुण द्रव्य रूप परणया तब गुण द्रव्य प्रगटे। तातैं द्रव्यत्व गुण तैं सब का प्रगटना है ऐसे अनंतगुण कौं परणमें है। सो द्रव्यत्व गुण तैं द्रव्य द्रवै तब तौ गुण परजाय प्रगटै अरु गुण द्रवै तब गुण परणति कौं धीर परणति सौं एक होइ परणति द्रवै तब दोउ मिलै परणति द्रवै तब गुण द्रव्य कौं वेदै सरूप लाभ ले द्रव्य द्रवै परणाम प्रगटै। गुण द्रवै तब एक एक गुण सब गुण में व्यापि अनंत कौ आधार होय है। सब गुण अन्योन्य मिलि एक वस्तु होइ। ये सब द्रव्य गुण परजाय जु हैं सो द्रवततै हैं। सामान्य रूप तौ द्रवणैरूप परणम्या विशेष द्रव्य द्रवत्व द्रवणगुण द्रवण परजाय द्रवणा सो सामान्य विशेष द्रवणा मिलि द्रवत्व नाम भया। सो द्रवत्व अपनैं स्वरूप में रहै सो द्रवत्व वानप्रस्थ कहिए। ऐसैं सब गुण का वानप्रस्थ भेद जानिये।

### आगैं ऋषि, साधु, यति, मुनि ये भिक्षुक के भेद है सो कहिये है।

एक २ गुण में ये च्यारि भेद लागैं हैं। प्रथम सत्ता गुणमें

कहिये है-तातैं सत्ता कौं रिषि संज्ञा होय सत्ता सासती रिद्धि कौं लीये हैं। आप अविनासी है। सत्ता के आधार उत्पाद व्यय ध्रुव हैं। सत्ता अपनी सासती रिद्धि द्रव्य कौं दर्ई तब द्रव्य सासता भया। गुण कौं दर्ई तब गुण सासते भये। ज्ञान का जानपणा गुण, ज्ञान द्रव्य, ज्ञान परिणति परजाय। ज्ञान स्वसंवेदीज्ञान ज्ञेय ज्ञायक ज्ञान अपनैं आतमा के द्रव्य गुण परजाय का जाननहार ऐसैं ज्ञानकौं सासता सत्ता गुणनैं कीया सो ज्ञान सत्ता है। ज्ञान सत्ता तैं ज्ञान सासता यह सासती रिद्धि ज्ञानकौ सत्ता गुणनैं दी है। दरशन का सत तैं दरशन सासता है। दरशन सब परभाव स्वभावरूप सब ज्ञेयकौं देखै है, अपनैं आतमाके द्रव्य गुण पर्याय कौं देखै है। दरशन द्रव्य है, देखना गुण है, दरशनपरणति परजाय है। जो दरशन न होता तौ ज्ञायकता न होती, ज्ञायकता मिटै, चेतना का अभाव होता। तातैं सकल चेतना का कारण एक दरशन गुण है। सर्व द्रशित्व महिमा कौं घरें दरशन है ताकौं सासता दरशन सत्ता नैं कीया यह सासते राखिवे की रिद्धि दरशन कौं सत्ता ने दीनी है तातैं सत्ता की रिद्धि दरशन में है।

### आगे द्रव्यत्व गुणकौ सत्ता रिद्धि दी सो कहिये है।

द्रवत्व गुण करि द्रव्य गुण परजायन कौं द्रवैं। गुण परजाय द्रव्यकौं द्रवै द्रवीभूत द्रव्यकै भया तब द्रव्य परणया गुणनमें द्रयें बिना परिणति न होती। द्रव्य सासता नित्य ज्यौं था त्यौं न रहता तब परिणति बिना उत्पाद करि स्वरूप लाभ था सो न होता, व्यय न होता, तब परिणति स्वरूप निवास न करती ध्रुवता की सिद्धि न होती। उत्पाद व्यय बिना ध्रुव न होता तातैं परणतितैं उत्पाद व्यय, उत्पाद व्यय तैं ध्रुवसिद्धि, सो परिणति होना द्रवत तैं तातैं द्रव्य द्रया तब परिणति भई। गुण द्रये तब गुण परिणति गुणनतैं

भई सब गुण का जुगपत भाव गुण परणति नै कीया।

यहां कोई प्रश्न करै है-कि जुगपत गुण की सिद्धि परिणति नै करी तौं क्रमवरती तैं जुगपत भाव कैसैं सध्या ?

ताका समाधान-वस्तु जो है सो क्रम सहभावी भाव रूप है। गुण परिणति क्रम गुणका है। गुण लक्षण सहभावी है। सब गुण सहभाव क्रमभाव कौं धरै है। गुण अपने लक्षण रूप सदा सासते है सो विन गुण के लक्षण कौं गुण परिणति सिद्ध करै है। द्रव्य गुणन में परणया तब गुणपरिणति भई। द्रव्य गुण रूप न परणवता तब गुण की सिद्धि न होती, यातैं गुणकी सिद्धि परिणति गुण की तै है। गुणका वेदना गुणपरणति नै कीया है। वेदना भाव तैं गुण का सर्वस्वरस प्रगटै है। सर्वस्वरस प्रगटैं गुण की सिद्धि है। गुण बिना गुणी नहीं गुणी बिना गुण नहीं, यातैं गुण परणतिबिना नहीं, परणति गुणबिना नहीं। यातैं क्रम परणति तैं जुगपत गुण की सिद्धि है। ऐसैं द्रव्यत्व गुणकौं सासती रिद्धि सत्ता नै दी। तातैं सत्ता की रिद्धितैं द्रवत्वावलास की सिद्धि है। वस्तुत्वगुण वस्तु के भावकौ लीये है सो सासता है; सामान्यविशेष भावरूप वस्तुकी सिद्धि करै है। सब गुण अपना सामान्यविशेषभाव धारि आप वस्तुत्वरूप भये। सामान्य प्रकाश विशेष प्रकाश सामान्यविशेष तैं है सो सामान्य विशेष का विलास सब गुण करै है, वस्तु संज्ञा सब धरै है, सो सामान्यविशेषरूप वस्तुत्व विलास की सिद्धि सत्ता गुण नै सासत भाव दीया तातैं है सो सत्ता की सिद्धि सासताभाव सबकौं दे है। वीर्यगुण कौं वीर्यसत्ता नै सासताभाव दीया। वीर्य स्वस्वरूप निहपन्न राखवे की सामर्थ्यरूपगुण वीर्यगुण निहपन्न राखै, द्रव्यवीर्य द्रव्यकौं निहपन्न राखै। सामर्थ्यता अपनी करि पर्याय वीर्यपर्यायकौं निहपन्न राखैकौं समर्थ, वीर्यगुण का विलास वीर्य अपार शक्ति धरि करै है। ताकी सिद्धि एक वीर्यसत्तातैं

भई है। ऐसैं एक सत्ता की रिद्धि सब गुण में विसतरी है, तब सब सासते भये। यह सत्ता गुण की रिद्धि कही। ऐसी रिद्धि धारै है तातैं सत्ताकौं ऋषीश्वर कहिये।

### आगैं सत्ताकौं साधु कहिये है।

मोक्षमार्गकौं साधै सो साधु कहिये। सत्ता स्वपदकौं साधै। द्रव्यसत्ता द्रव्यकौं साधै, गुणसत्ता गुणकौं साधै, पर्यायसत्ता परजायकौं साधै, ज्ञानसत्ता ज्ञानकौं साधै, दरशन सत्ता दरशनकौं साधै, वीर्यसत्ता वीर्यको साधै, प्रमेयत्वसत्ता प्रमेयत्वकौं साधै, ऐसे अनंतगुणकी सत्ता अनंत गुणकौं साधै, द्रव्यसत्ता गुणकौं साधै, गुणसत्ता द्रव्यसत्ताकौं साधै। परजायसत्तातैं पर्याय है। परजाय उतपाद व्यय ध्रुवकौं करै। पर्याय बिना उतपाद व्यय ध्रुव (ध्रौव्य) न होय। उतपाद व्यय ध्रुव बिना सत्ता न होय, तातैं पर्याय सत्ता द्रव्यगुण कौं साधै। ज्ञानसत्ता न होय तो ज्ञान न होय। तब सब गुण द्रव्य पर्याय का जानपणा न होय। जानपणा न होय तब द्रव्य गुण पर्याय का सर्वस्व कौं न जानै। विनका सर्वस्व न जान्या तब ज्ञेय नांव भया। ज्ञान ज्ञेय अभाव भये वस्तु अभाव होय। दरशन सत्ता न होय तब दरशन का आभाव होय। दरशन अभावतैं देखना मिटै, तब ज्ञानविशेष, बिना सामान्य न होय। तातैं सबकौं सामान्यविशेष सिद्ध करै है। बिना सामान्य, विशेष नहीं, बिना विशेष सामान्य नहीं। तातैं दरशनसत्तातैं दरशन, दरशनतैं ज्ञान, तब वस्तुसिद्धि है।

प्रमेयसत्ता न होय तौ सब प्रमेय न रहै। तब प्रमाण करवेजोग्य द्रव्य गुण पर्याय न होय। तातैं सत्ता सबकौं साधै है। ऐसैं अनन्तगुण की, द्रव्य की, पर्याय की सिद्धि करै है सत्तागुण। तातैं सो सत्ता ही साधक तातैं साधु ऐसा नांव पावै है।

## आगैं सत्ता कौं यति कहिए।

असत् विकार कौं जीत्या है तातैं यति कहिये। सत्तामें असत्ता नांही तातैं यति। ताका विशेष लिखिये है-

सत्ता में नास्ति अभाव भया, नास्ति के विकार जीत्ये तातैं यति। ज्ञानसत्ता ज्ञान का नास्ति विकार मेट्या, दरशनसत्ता नैं दरशन का नास्तिपणा दूरि किया, वीर्यसत्ता नैं अवस्तुत्व का अभाव कीया। या प्रकार सब गुण की सत्ता प्रतिपक्षी अभाव करि तिष्ठै है तातैं यति कहिए।

## आगैं सत्ताकौं मुनिसंज्ञा करि कहिये है।

सत्ता अपने स्वरूप का प्रत्यक्ष प्रकाश सासता लक्षण करि करै अथवा प्रत्यक्ष केवल ज्ञान सत्ता धरैं तातैं मुनि कहिये।

## आगैं वस्तुत्वकौं रिषि आदि भेद लगाइये है ।

तामैं रिषिवस्तुत्व कौं कहिये-सामान्यविशेषरूप वस्तु ताके भावकौं धरें वस्तुत्व है सो सबमें व्यापक है। सब गुणमें सामान्यविशेषभावरूप वस्तुपणा करि रिद्धि वस्तुत्वनैं सबकौं दी है। जेते गुण हैं ते ते सामान्यविशेषतारूप हैं। ज्ञानमें जानपणां मात्र सामान्यभाव न होय तौ लोकालोकप्रकाशकविशेष कहां तैं होय, तातैं सामान्यतैं विशेष है, विशेष तैं सामान्य है। सामान्यविशेषभाव रिद्धि वस्तुतैं है। ऐसैं ही दरशन देखवेमात्र न होय तौ लोकालोक का निर्विकल्प सत्तामात्र वस्तु न देखै, तातैं सामान्य विशेष धरें है। सब गुण सामान्यविशेषभाव रिद्धि धरे है। सो सब एक वस्तुत्व की रिद्धि फैली है। वस्तु द्रव्यरूप द्रव्यवस्तु गुणरूप गुणवस्तु पर्यायरूप पर्यायवस्तु सब वस्तुत्वतैं हैं। संसारमें वस्तु न होय तौ नाम पदार्थ न होय।

इहा कोई प्रश्न करै है-शून्य है नाम शून्य मया वस्तु कहा कहोगे ?

ताकौ समाधान-एक शून्य आकाश है सो सामान्यविशेष लीये क्षेत्री वस्तु हैं। आकाश क्षेत्र में सब रहै हैं। दूजौ भेद यह जु अभावमात्र में सामान्य अभाव विशेष अभाव, सामान्यविशेष तौ है परि अभावमात्र है। सामान्यविशेष सामान्यविशेष वस्तुमें जैसें तैसें अभावमें कहिए। अभाव कौं शून्यता तौ है परि नाम सामान्यविशेष तैं अभाव कौं भयौ है। तातैं सब सिद्धि सामान्यविशेषतैं होय है। वस्तु के नाममात्र आवत ही सामान्यविशेष तातैं अभाव ऐसा नाम पाया। जो नास्ति तैं सिद्धि न होती तौ नास्तिस्वभाव स्वभावनमें न होता। सत्ता अस्ति इति सत् सामान्यसत् नास्ति अभाव सत् विशेष सत्ता का कहना भया। जो नास्ति का अभाव न होता तौ सत्तामें अस्तिभाव न होता तातैं अभाव ही तैं भाव भया है। वस्तु के प्रकाश कौ वस्तुत्व करै वस्तु जो है नास्ति नाही। वस्तु कौं ज्ञेय कहिए ज्ञायक कहिए ज्ञान कहिए सब प्रकाश एक चैतन्य वस्तु का है। वस्तुत्वपर्याय करि वस्तुत्व परिणामी है। परवस्तु करि अपरिणामी है। जीव वस्तु करि जीव रूप है। जड परवस्तु करि जीवरूप नाहीं है। चेतनमूरति चेतनावस्तुकरि है। अर जडमूरति नाहीं तातैं अमूरति है। अपने प्रदेश की विविक्षाकरि सप्रदेशी है। परप्रदेश नाही तातैं अप्रदेशी है। वस्तु एक की अपेक्षा एक है। गुणवस्तु करि अनेक है। आपने प्रदेश की अपेक्षा क्षेत्री है। पर वस्तु उपजनेका क्षेत्र नाहीं। अपनी पर्याय क्रियाकरि क्रियावांन है। परक्रिया न करै तातैं अक्रियावान है। वस्तुत्वकरि नित्य है। पर्यायकरि अनित्य है। आप अनन्तगुणकौं कारण है। आपकौ आप कारण है। जड़कौं अकारण है। आप परिणाम का आप कर्त्ता है। पर परिणाम का अकर्त्ता है। ज्ञानवस्तु की अपेक्षा सर्वगत है। पर की अपेक्षा निश्चयनय परमें न जाय तातैं सर्वगत है। अपने प्रदेशलक्षण करि आपमें प्रवेश आप करै है। निश्चयकरि परमें प्रवेश नाहीं।



वस्तुत्वकरि वस्तुत्व नित्य है। पर्यायकरि अनित्य है। वस्तुत्वकरि अभेद है। पर्यायकरि भेद है। वस्तुत्वकरि अस्ति है। पर्यायकरि नास्ति है। वस्तुत्वकरि एक है। पर्यायकरि अनेक है। वस्तुत्वकरि अभेद है। पर्यायकरि भेद है। वस्तुत्वकरि अस्ति है। पर्यायकरि नास्ति है। वस्तुत्वकरि एक है। पर्यायकरि अनेक है। वस्तुत्वकरि अनादि अनन्त, वस्तुत्वकरि अनादि पर्यायकरि सांत अनादिसांत, पर्यायकरि सादि वस्तुत्वकरि अनन्त सादिअनन्त, पर्यायकरि सादि सांत इत्यादि अनन्त भेद वस्तुत्व के है। अनन्त गुणकी महिमा वस्तुत्वतें है ऐसी रिद्धि वस्तुत्व धारे है तातें रिषि कहिए।

### आगैं वस्तुत्वकौं साधु आदि कहिये है।

वस्तुत्व सामान्यविशेषता देकरि सब द्रव्य-गुण-पर्याय कौं साधै है; आप परिणाम करि आपकौं साधै है तातें साधु कहिए है। अपने भावमें अवस्तुविकार न आवन दे तातें यति कहिए, विकार जीतें तातें यति। ज्ञानवस्तु अज्ञानविकार न आवन दे, दरशन अदरशनविकार न आवन दे, वीर्य अवीर्यविकार न आवन दे, अतेंद्री अनाकुल अनुभव-रसास्वाद-उत्पन्नसुख दुखविकार न आवन दे। गुण गुणका विकार अभाव भया तातें सबगुणवस्तुत्व यति नाम पाया। ज्ञानवस्तुत्व सबकौं प्रतक्ष करै तातें वस्तुत्वकौं मुनि कहिये।

### आगैं अगुरुलघुकौ च्यारि रिषि आदि भेद कहिए है।

अगुरुलघुगुण अनन्तरिद्धिधारी है, न गुरु कहिए भारी न हलका; द्रव्य जैसे का तैसा अगुरुलघुतें है। पर्याय जैसी की तैसी अगुरुलघुतें है। ज्ञान न हलका न भारी, दर्शन न हलका न भारी, वीर्य न हलका न भारी, प्रमेय न हलका न भारी, सब गुण न हलके न भारी। अगुरुलघुगुणकी रिद्धि सब गुणनमें आई तातें सब ऐसे भये। षट वृद्धि हानि विकार अगुरुलघु तें भया तातें सब द्रव्य गुण की

सिद्धि तातें सब जैसे के तैसे पाइये सोई कहिये है-सिद्ध के अनंतगुण में एक सत्तागुण रूप सिद्ध परणवै तहां अनंतवै भाग परणमन की वृद्धि कहिये। असंख्यातगुण में एक वस्तुत्व रूप परणवै ऐसा कहिये तब असंख्यात भाग परणमन की वृद्धि कहिये। आठ (गुण) में सम्यक्तरूप परणमै है ऐसा कहिये तब संख्यात भाग परणमन की वृद्धि कहिये। आठ गुण रूप परणमे है ऐसा कहिये तब संख्यात गुण परणमन की वृद्धि कहिये। असंख्यात गुणरूप परणमे है ऐसा कहिये तब असंख्यातगुण परणमन की वृद्धि कहिये। अनंतगुण रूप सिद्ध परणमे है ऐसा कहिए तब अनन्तगुणपरणमन की वृद्धि भई। ऐसैं षट् वृद्धि भई। परणमन वस्तु में लीन भया तहां हानि भई। छै भेद वृद्धि मिटि गई तातें हानि ऐसा नाम पाया। इन वृद्धिहानिकरि वस्तु ज्यों है त्यों रहै हैं। षट् वृद्धिमें सब गुणरूप परणया तब गुण का सरूप प्रगट परणये तै भया। न परणमता तौ गुण न प्रगटते तातें वृद्धिगुण कौ राखै है। हानि न होती तौ वस्तुका रसास्वाद ले परणाम लीन न होता। परणामलीनता बिना द्रव्य रसास्वाद सों तृप्त न होता। तब रसास्वाद की तृप्ति बिना द्रव्य द्रव्य की स्पष्टता न घरता, तब द्रव्यपणा न रहता। तातें द्रव्य के गुण के राखिवे कौं वृद्धि हानि द्रव्य में परणामद्वार है। तातें अगुरुलघुतें सब सिद्धि भई। यह सब सिद्धि करनै की रिद्धि अगुरुलघु लीये है। अनन्तगुणद्रव्यपर्याय की सिद्धि अगुरुलघु नै कीनी। तातें ऐसी रिद्धि का धारक अगुरुलघुगुण रिषि कहिये।

### आगैं अगुरुलघु कौं साधु कहिये-

यह अगुरुलघु सबकौं हैं तातें साधुसंज्ञा भई। वृद्धि हानि तें गुण जैसे के तैसे रहै तब न हलके होई न भारी होय, तब सबका साधक भया तब साधु कहिये। आपकौं आपकी परणति तें साधै तातें साधु है।

### आगें अगुरुलघु कौं यति कहिये है-

हलका भारी विकार जीति अपने सुभाव निवसै है। जो हलका होता तो पवन मैं उडता भारी होता तौ अघोपतन होता, तातैं ऐसे विकार का अभाव करि आपकी जतीवृत्ति आप प्रगट करी। आपके विकार मेटे और गुण के विकार मेटै। जती आपका विकार मेटै, पर का विकार मेटै। तातैं यति संज्ञा अगुरुलघुकौं कहिये।

### आगें अगुरुलघु कौं मुनिसंज्ञा कहिये है-

आपकौं आप प्रतक्ष करै ज्ञान का अगुरुलघु मैं ज्ञान प्रतक्ष आया तब अगुरुलघु प्रतक्ष ज्ञान का धारी भया तातैं प्रतक्षज्ञानीकौं मुनिसंज्ञा है। तातैं मुनि अगुरुलघुकौं मुनि कहिये। ये च्यारि भेद अगुरुलघुमैं भये।

### आगें प्रमेयकौं च्यारिभेद लगाइये है सो कहिये है।

प्रमेयत्वनैं सबकौं प्रमाण कहवे जोग्य कीये है। द्रव्य प्रमाणकरवेजोग्य गुण प्रमाणकरवेजोग्य पर्याय प्रमाणजोग्य प्रमेयनैं कीये है। प्रमेयबिनां वस्तु प्रमाणजोग्य न होय। अप्रमाण दूरि करनै कौं प्रमाण कीये तैं प्रमाणजोग्य प्रमेय राखै है। अनंतगुणमैं लक्षण प्रमाणकरवेजोग्य; प्रदेश प्रमाणजोग्य; सत्ता प्रमाण जोग्य, गुणकौं नाम प्रमाणजोग्य, क्षेत्र प्रमाणजोग्य, काल प्रमाणजोग्य, संख्या प्रमाणजोग्य, स्थान सरूप प्रमाणजोग्य, फल प्रमाणजोग्य, भाव प्रमाण (जोग्य) प्रमेयवस्तु (त्व) प्रमाणजोग्य, प्रमेयद्रव्यत्व प्रमाणजोग्य, प्रमेय अगुरुलघु प्रमाणजोग्य अनंतगुणप्रमेय प्रमाणजोग्य भये सो सब प्रमेय गुण की रिद्धि फैली है। प्रमेयतैं प्रमाणकी प्रसिद्धता है। प्रमाणतैं प्रमेय है। प्रमेय प्रमाण दोउनतैं वस्तु प्रसिद्ध प्रगट ठहराइये है। जैसे तीर्थकर सरवज्ञ वीतराग देवाधिदेव प्रमाणजोग्य है विनकौं वचन प्रमाणजोग्य है। तैसैं वस्तु प्रथम प्रमाणजोग्य है तौ गुण प्रमाण जोग्य होय। प्रमेय सब सरूप

की सर्वस्वताकौं प्रमाण करवे जोग्य करै है। तातैं ऐसी रिद्धि अखंडित धारें तातैं प्रमेय रिषि कहीये।

### आगें प्रमेय कौं साधु संज्ञा कहिये है-

प्रमेयपरणाम करि आपरूपकौं आप साधैं तातैं साधु, सब गुण प्रमाणकरवेजोग्यता करि साधैं तातैं साधु है। प्रमेय विकार कौं आवनै न दे तातैं यति। दरशन का अदरशनविकार दरशनप्रमेय न आवनै दै। ज्ञान का अज्ञानविकार ज्ञानप्रमेय न आवनैं दै। वीर्य का अवीर्यकार वीर्यप्रमेय न आवनैं दै। अतेन्द्री अनंतसुख भोग का इन्द्री नितसुखादिदुखविकार सो अतेन्द्रीभोगप्रमेय न आवनै दे। सम्यक्त निर्विकल्प यथावत सम्यक् निश्चयरूप निजवस्तु का सम्यक्त ताका विकार भिथ्यातकौं सम्यक्तप्रमेय न आवनैं दे। ऐसे अनंतगुणविकारकौं अनंतगुणप्रमेय न आवनैं दे। एक यतीपद प्रमेय न (ने) धर्या तातैं विकारता प्रमेय नैं हरी तातैं यती प्रमेयकौं कहिये। प्रमेय ज्ञान का तामैं अनंतज्ञान आया तातैं मुनि प्रमेयकौं कहिये। सब गुण कौं ज्ञान प्रत्यक्ष कीया, ज्ञान प्रमेय मैं ज्ञान तातैं प्रमेय मुनि भया।

### ऐसैं ज्ञानगुणकौं च्यारि भेद कहिये है।

ज्ञान कौं रिषि संज्ञा काहेतैं भई सो कहिये है-ज्ञान आपणां जानपणां का स्वसंवेदन विलास लीये है। ज्ञानके जानपणां है तातैं आपकौं आप जानै है। आपके जानै आप सुद्ध है। आनंदअमृतवेदना ज्ञानपरणतिद्वार तै आपही आप आपमैं अनायरसास्वादु ले हैं। जिसके उपचारमात्रमैं ऐसा कहिये। ज्ञानमैं तिहूं काल संबंधी ज्ञेयभाव प्रतिबिंबित भये सर्वज्ञता भई। लोकालोक असद्भूत उपचार करि ज्ञानमैं आये। ज्ञान अपने सुभाव करि थिर है, जुगप्त है, अखण्ड है, सासता है, आनन्दविलासी है, विशेष गुण है, सबमैं प्रधान है। अपने पर्यायमात्रकरि अनन्त पदार्थ का भासक है। वीर्यगुण दर्शनकौं

.....  
 निराकारनिहपन्न राखवे की सामर्थ्यता घरे। ज्ञाननिहपन्न राखवे की सामर्थ्यता धरें। प्रमेयनिहपन्न राखवे की सामर्थ्यता धरें। प्रदेशनिहपन्न राखवे की सामर्थ्यता धरें। सब द्रव्यगुणपर्यायनिहपन्न राखवे की सामर्थ्य धरें सो जो ज्ञान न होता तौ ऐसे वीर्य की सकल अनन्तशक्ति अनन्तपर्याय अनन्तनृत्यथटकलारूप सत्ताभाव रस तेज आनन्द प्रभावादि अनन्त भेदभावकों न जानता। जब न जानै तब देखना न होता। देखना न भये अद्रसि (अदृश्य) भया। जब अद्रश्य भया तब अभाव होता। तातें ऐसे वीर्य कौं ज्ञान ही प्रगट करै है। अरु प्रदेशगुण असंख्यातप्रदेश धरे हैं। एक २ प्रदेशमें अनन्त २ गुण है। एक २ गुण असंख्यात प्रदेशी अनन्त पर्याय अनन्त शक्तिमंडित सत्तासद्भाव वस्तुत्व भाव अगुरुलघुभाव सूक्ष्मभाव वीर्यभाव द्रव्यत्वभाव अवगाहभाव प्रमेयत्वभाव अमूर्तभाव प्रभुत्वभाव विभुत्वभाव तत्त्वभाव अतत्त्वभाव भावभाव अभावभाव एकभाव अनेकभाव अस्तिभाव सुद्धभाव नित्यभाव चैतन्यभाव परमभाव निजधरमभाव ध्रुवभाव आनंदभाव अखंडभाव अचलभाव भेदभाव अभेदभाव केवलभाव सासतभाव अरुपभाव अतुलभाव अजभाव अमलभाव सविकारभाव अछेदभाव अमितभाव प्रकाशभाव अपारमहिमाभाव अकलंकभाव अकर्मभाव अघटभाव अखेदभाव निर्मलभाव निराकारभाव निहपन्नभाव निःसंसारभाव नास्ति अन्य त्वभावतैरहितभाव कल्याणभाव स्वभाव पररहितभाव चेतनागुणसौं व्यापकभाव ऐसे अनन्तभाव एक एक गुण धरे है। ऐसे अनन्त अनन्त गुण एक एक प्रदेश घरें सो ज्ञाननै वै प्रदेश जानें तब प्रगटे बिना ज्ञान विन प्रदेशन की सकल विशेषता कौं न जानता। तातें प्रदेश महिमा जानवे कौं ज्ञान है। सत्तागुण सासतलक्षणकौं धरें द्रव्यसत् गुणसत् पर्यायसत् अगुरुलघुसत् सूक्ष्मसत् अनन्तगुणसत् महासत् अवांतरसत् एकपर्यायसत् अनेकपर्यायसत् विश्वरूपसत् एकरूपसत् सर्वपदार्थस्थितिसत् एक एक पदार्थस्थितिसत् त्रिलक्षणसत्

.....  
 अत्रिलक्षणसत् ऐसे सत्ताभेद ज्ञान जानै है तब प्रगटै है। तातें प्रधान है। सूक्ष्म के भेद द्रव्यसूक्ष्म गुणसूक्ष्म पर्यायसूक्ष्म ज्ञानसूक्ष्म दरशनसूक्ष्म वीर्यसूक्ष्म सुखसूक्ष्म अगुरुलघुसूक्ष्म द्रव्यत्वसूक्ष्म वस्तुत्वरूपसूक्ष्म ऐसैं अनन्तगुणसूक्ष्मभेद ज्ञान प्रगट करै है। तातें ज्ञान प्रधान है। ऐसैं अनन्तगुण के अनन्त अपार महिमा मंडित भेद ज्ञान प्रगट करै है। तातें ज्ञानमें ऐसी ज्ञायकरिद्धि है तातें ज्ञान रिषि कहिये।

**आगें ज्ञानकौं साधु कहिये है-**ज्ञान अपनी ज्ञायकपरणति करि आपकों आप साधै। अनन्तज्ञानमें सब व्यक्त भये तातें सब प्रगट कीये। तातें सबके प्रगटभाव करणें का साधक है तातें साधु। ज्ञानकरि सरुपसर्वस्व सधै। आत्मज्ञान ही तैं सर्वज्ञमहिमाकौं पावै है। ज्ञान सकल चेतनामें विशेषचेतना है तातें सरुपसाधन है। आत्मकै परमप्रकाश ज्ञानही का बडा है प्रधानरूप है, तातें सब प्रभुत्व साधक है। ज्ञान अनन्त अविनासी आनंद का साधक है सो ज्ञानकी साधकता क्रमकरि न हैं, जुगपत साध्यसाधकभाव है, काहेतैं एक बार सबका प्रकाशक हैं। यातैंजे ज्ञान भाव साधु भला समझैगे तो अविनासी नगरी का राजा होहिगे। तातें ज्ञानकौं साधु जानि सब जीव सुख पावो।

**आगें ज्ञानकौं यति कहिये-**ज्ञान अज्ञानविकार के अभावतैं सुद्ध है। इस संसारमें सब जीव अनादिकरमयोगतैं परकों आप मानि मोहित होइ दुखी भये सो एक अज्ञान की महिमा तातें जन्मादिदुखतैं व्याकुल हैं। ता अज्ञान विकारकौं मेट्या तब पूर्व कथित ज्ञान प्रभाव प्रगट्या तातें अज्ञानविकार जीत्या तातें ज्ञान यति भया। ऐसे ज्ञान यतिभावकों जानें तौ ऐसे ज्ञान यतिभावकों पावै, तातें ज्ञानयतिभाव जानना जोग्य है।

**आगें ज्ञानकौं मुनि कहिये है-**ज्ञान प्रतक्ष का धारी मुनि है सो

ज्ञान आपसरूपही है। औरकों प्रतक्ष जानें हैं तातें मुनि है।

### आगैं दरशनकौ च्यारिभेद कहिये है।

दरशन रिषि है। दरशन देखवेमात्र है। उपचारतै लोकालोककों देखै है, अनंतगुणकों देखै है, द्रव्यकों देखै है परजायकौ देखै है। जो दरशन न होता तौ द्रव्य अदृशि होता तब ज्ञान कौनकों जानता। ज्ञान न जानता तब परणमन न होता तब दरशन ज्ञान चारित्र का अभाव भयें वस्तु का अभाव होता। तातें दरशन देखनैं रिद्धितैं सब सिद्धि है। ज्ञानकों न देखता तौ ज्ञानका सामान्यभावकों अद्रशिता आवती, तब सामान्य अदृशि भयें विशेष भी न होता। सामान्यविशेष का अभाव भयें वस्तु-अभाव होता तातें ज्ञानकी सिद्धि दरशन की रिद्धितै है। सत्ताकों न देखता तब सामान्यभाव अद्रशि भयें विशेषता जाती तब सत्ता न रहती। वीर्यकों न देखता तब वीर्य भी सत्ता की नाई अद्रशि भयें नाश होता। ऐसैं अनन्तगुण दरशन के देखवेमात्र रिद्धितैं सिद्धिभये देखनां निर्विकल्परसकौ प्रगट करै है। जहां देखना तहां जानना, जानना तहां परणमना। तातें दरशन के देखिवेतैं उपयोगरिद्धि है। एक गुणके अभावतैं सब अभाव होय, तातें दरशन अपनी रिद्धितैं सबकी सिद्धि करै है। दरशन सर्वदरशी है। दरशन असाधारणगुण गुण (?) है। दरशन मुख्य चेतना है। दरशन प्रधान है, तातें दरशन ऐसी रिद्धि के धारे तैं रिषि कहिये है।

**आगैं दरशन साधु कहिये है-**दरशन दरशनपरणति करे आपकों आप साधै है। और के देखनेंकरि विनकों प्रगट करणा साधै आप सबकौ देखै। दरशनकरि आतम देखै तातें सर्वदरशीपणा कौ आतमामैं साधै। अपने देखनेंभावकरि जानना ज्ञान का होई। काहेतैं यह सामान्यविशेषरूप सब पदार्थ का निर्विकल्पसत्ता अवलोकन दरशन करै, सो ज्ञानमैं तौ निर्विकल्प सत्ता अवलोकन नहीं तातें यह दरशन

का भाव है। जो सामान्य न होय तौ विशेष ज्ञान न होय सब अद्रशि भयें ज्ञान किसका होय। तातें द्रशि (श्य) दरशनतैं भयें अद्रशिपणां मिट्या। ज्ञान भी विशेष ज्ञाता भया। ज्ञान-दरशन का जुगपतभाव है। तातें दरशन सारे गुणकौ प्रगट करि साधै तातें साधु है।

**आगैं दरशन कौ यति कहिए है-**दरशन अदरशन विकार दूरि कीया है। जो विकार रहता तौ सर्वशक्ति दरशनमें न होती। विकार जीतें जती भया। दरशन विकार कौ सुद्धतामैं न आवनैं दे। सकलसुद्धता दरशन की मैं अतीचार भी न लागै ऐसी निराकार शक्ति प्रगटी तातें यति भया।

**आगैं दरशनकों मुनि कहिये है-**दरशनमें ज्ञानभी दरस्यागया तहां केवल दरशनमें केवलज्ञानका अवलोकन भया तब प्रतक्षज्ञानीकों मुनिसंज्ञा है। दरशन अनंतगुणकों प्रतक्ष देखै है। जो प्रतक्ष करै ताकों मुनि कहिये है। तातें दरशनकों मुनिसंज्ञा कहिये। ऐसैं सबगुणमें च्यारि २ भेद जानने।

### आगैं परमातमराजा कै अमराव अनन्त है ज्याहमैं केतायेक नाम लिखिये है

प्रभुत्वनाम, विभुत्वनाम, तत्त्वनाम, अमलभावनाम, चेतनप्रकाशनाम, निजधरमनाम, असंकुचितविकासनाम, त्यागउपादानशून्यत्वनाम, परणामशक्तित्वनाम, अकर्तृत्वनाम, कर्तृत्वनाम, अभोक्तानाम, भोक्तानाम, भावनाम, अभावनाम, साधारणप्रकाशनाम, असाधारणप्रकाश, कर्त्तानाम, करमनाम, करणनाम, संप्रदाननाम, अपादाननाम, अधिकरणनाम, अगुरुलघुनाम, सूक्ष्मनाम, सत्तानाम, वस्तुत्वनाम, द्रव्यनाम, प्रमेयत्वनाम, इत्यादि अनंत हैं। अपने अपने औधे का काम सब करै है। इनका विशेष आगैं कहेंगे।



प्रदेशदेसनमें गुण जो पुरुष कहे अर गुणपरणति नारी कही तो विलास कैसें करै हैं सो कहिये है-

वीर्यगुण नर के परणति वीर्य की नारी सो दोउ मिलि भोग करै है सो कहिये है। वीर्य के अनंत अंग है, सत्तावीर्य, ज्ञानवीर्य, दरशनवीर्य, प्रमेयवीर्य ऐसे अनंतगुणके अनंत वीर्यरूप अनंत अंगकरि अपनी नारी जु परणति ताके भोगकों करै। ऐसे सब अंगमें वीर्य परणति परणई। वीर्य परणति का अंग वीर्य नरसौ व्याप्य व्यापक भया तब दोऊ अंग के मिलनतैं अतेन्द्री भोग भया तब आनंद पुत्र भया। तब सब गुण परिवारमें वीर्यशक्ति फैलि रही थी, तातैं वह वीर्य की शक्तितैं निहपन्न थे। याके पुत्र भयें सब गुण वीर्यअंग था, वीर्यअंग परिफूलित भये तब सब गुण परिफूलित भये तातैं सब गुणनर में मंगल भया। ऐसैही ज्ञान नर मंत्र पदका का धणी था यह अपनी ज्ञान परणतिसौं मिलि भोग करै है ताका वरणन कीजिये है-

ज्ञान अनंतशक्ति स्वसंवेदरूप घरें लोकालोक का जाननहार अनंतगुणकों जानैं। सत् परजाय सत् वीर्य सत् प्रमेय सत् अनंतगुणके अनंत सत् जानै अनंत महिमा निधि ज्ञानरूप ज्ञान ज्ञानपरणति नारी ज्ञानसौं मिलि परणति ज्ञान का अंग २ मिलनतैं ज्ञान का रसास्वाद परणति ज्ञान की ले ज्ञान परणतिका विलास करै। जाननरूप उपयोग चेतना ज्ञानकी परणति प्रगट करै। जो परणति नारी का विलास न होता तौ ज्ञान अपने जानन लक्षणकों यथारथ न राखि सकता। जैसे अभव्यके ज्ञान है ज्ञानपरणति नहीं। तातैं ज्ञान यथारथ न कहिये। तातैं ज्ञान ज्ञानपरणतिकों धरै तब यथारथ नांव पावै। तातैं ज्ञानपरणति ज्ञान यथारथ प्रभुत्व राखै है। जैसे भली नारी अपने पुरुष के घर का जमाव करै है तैसें ज्ञान स्ववससुखजुक्त घर ज्ञानपरणति करै है। ज्ञानपरणति ज्ञान के अंगकौ वेदि वेदि विलसै है। ज्ञानके संगि

सदा ज्ञानपरणति नारी है। अनंतशक्ति जुगपत सब ज्ञेय जाननकी ज्ञानमें तौ है परि जब ताई ज्ञानके परणति नारीसौ भेट न भई तब ताई अनंतशक्ति दबी रही। यह अनंतशक्ति परणति नारी नैं खोली है। जैसे विशल्या नैं लक्ष्मन की शक्ति खोली तैसें ज्ञानपरणतिनारीनैं ज्ञान की शक्ति खोली। ऐसैं ज्ञान अपनी परणतिनारी का विलास अपने प्रभुत्वका स्वामी भया। परणतिनैं जब ज्ञान वेद्या वेदतां भोग अतेन्द्री भया तब ज्ञानपरमणति का संभोग ज्ञानपुरुष कीया तब दोऊके संभोगयोगतैं आनंद नाम पुत्र भया तब सब गुण परिवार ज्ञानमें आये थे सो ज्ञानके आनंद पुत्र भयें हरष भया सबके हरष मंगल मया।

आगै दरशनगुणके दरशन परणति नारी है सो अपनी नारी का विलास दरशन करै है सो कहिये है-

दरशन परणति नारी दरशन अंगसौं मिले है तब दरशन अपने अंग करि विलसै है। दरशनतैं नारी हैं नारीतैं दरशन सरूप सधै है। दरशनपरणति नारी का सुहाग भी दरशनपतिसौं मिले है। जब तक दरशनसौं दूरि थी तब तक निर्विकल्प रस न पावै थी-व्याकुल रूप थी। तातैं अनंतसर्वद्रशित्व शक्ति का नाथ अपना पति भेंटतही अनाकुल दसा धरै है। ऐसी महिमा वटै है। सारा वेद पुराण जाकौ जस गावै है दरशन वेदै तब वा परणति सुद्ध परणतितैं दरशन सुद्ध दरशनके अनुसार परणति है। परणति कै अनुसार दरशन है। परणति जब दरशन घरै आप आपमें तब सुखी है। दरशन अपनी परणति न धरै तब आप अति असुद्ध भया तब सुद्धता न रहै। परणतिकों दरशन बिनां विश्राम नहीं। दरशनकों परणतिविनां सुख नहीं-सुद्धता नहीं। परणति दरशन के वेदिवे गुणका प्रकाश राखै है। न परणवै तौ देखना न रहै। दरशन न होय तौ परणतिकिसके आश्रय होइ

किसकों परणवै। यह परणति दरशनपतिसौ मिलि संभोगसुख ले है। दरशनपरिणति कौं अपने अंगसौं मिलाय महासंभोगी हूवा वरतै है। तहां दोऊ के संभोग करि आनन्दनाम पुत्र की उत्पत्ति होइ है। तब सब गुण परिवार महाआनंदी भयै मंगल कौं करै है। तातैं इस नारी का पुरुष का विलास वरणन करवे कौं कौन समर्थ है।

### आगैं द्रव्य नर अपनी परणति तिय का संभोग करै है सो कहिये है

द्रव्य आप द्रवत तैं नाम पाया है। द्रव्य जब द्रवै है तब गुण परजाय की सिद्धि द्रव्य अपनैं अन्वयी गुण कौं द्रवै व्यापै है क्रमवर्ती परजाय कौं द्रवै है तातैं द्रव्य है। द्रयेंवे बिना परणति न होती, परणयें बिनां गुण न होते तब द्रव्य (का) अभाव होता तातैं द्रवनां द्रव्यकौं सिद्ध करै है। द्रवत गुण द्रवरूप परणतितैं है। जो द्रवरूप न परणवता तौं द्रव न होता तब द्रव्य न होता। तातैं परणति द्रवतकौं कारण है। तातैं परणतिनारीतैं द्रवतपुरुष की सिद्धि है। द्रवत अपनी परणतिनारी का अंग विलसै है। परणतिनारी द्रवत पुरुषकौं विलसै है। द्रवत सब गुण में है सो सब गुण के द्रवत के सब अंग एकबारमें परणतितिया विलसै है। जब सब गुण के द्रवत में विलसी तब सब गुण के द्रवत आधार सब गुण थे। ऐसे द्रवत के विशेष विलास की करणहारी भई। परणति मिलें द्रवत की सिद्धि तातैं परणतिनारी का विलास द्रवतकौं अनंतगुण का आधार पदकौं थापै है।

**प्रश्न-**द्रवत परणति सब गुणमें पैठी इहां द्रवत ही का विलास काहैकौं कहौ ? सब गुण कहौ सब गुण की परणति कहौ।

**ताकौ समाधान-**सब गुण में तौ द्रवत भया द्रवत की परणति द्रवत की साथि भई। तातैं द्रवत की परणति द्रवतमें कहिये अनन्तगुण की परणति अनन्तगुण में कहिये। कोऊ गुण की परणति कोऊ

गुण में न कहिये। जिस गुणकी परणति जिस गुण में कहिये विस गुण के द्वार सबगुण में आवो और गुणमें कहिये तब और गुण की मई। तातैं द्रवत के द्वार द्रवत की है तातैं परणति का परम विलास परम है अनंत अतिसय कौं लीये है। द्रवत गुणपुरुष अपनी परणति का विलास करै है सो महिमा अपार है। सारसुख उपजैं है। इन दोउ के संभोगतैं आनन्द नामा पुत्र भयो है तहां सब गुणपरिवार के परममंगल भयो है।

### आगैं अगुरुलघु अपनी परणतितिया का विलास करै है सो कहिये है।

अगुरुलघु का विकार षट्गुणी वृद्धिहानि है। षट्गुणी वृद्धि अपनैं अनन्तगुण में परणवनतैं होय है। अनन्तगुण परणवन में अनन्तगुण का रस प्रगटै है। अनन्त भेदभाव कौं लीयें अनन्तरस अनन्तप्रभुत्व अनन्तअतिसय अनन्तनृत्य अनन्तथटकलारूप सत्ताभाव प्रभाव विलास ता विलासमें नवरस वरतैं हैं। सो सब गुण गुण का रस नव षट्गुणीवृद्धि में सधै है सो कहिये है।

**सत्तागुण में नवरस साधिये है-**प्रथम सत्ता में सिंगार रस साधिये है। सत्ता सत्तालक्षण कौं धरें है। सत्ताकौ सिंगार अनन्तगुण है। सत्ता सासती है। सत्तानै ज्ञान सब ज्ञेय कौं ज्ञाता अनन्तगुण ज्ञाता जानन प्रकाश सर्वज्ञशक्तिधारी स्वसंवेदरसधारी अनन्त महिमा निधि सब अनन्त द्रव्यगुणपर्याय जामैं व्यक्तभये एसौ ज्ञान आभूषण सत्ता पहरी सत्तासिंगार भयो। निर्विकल्पदरशन निर्विकल्परसधारी अविकारी भेदविकल्प कौ अभाव जामैं सकल पदार्थ कौ सकल सामान्यभावदरसी सत्तामात्र अवलोकी एसौ आभूषण सत्ता पहरी तब यह सिंगार सत्ता कौ भयो। वीर्य सब निहपन्न राखवे समर्थ सो सत्ता धर्यौ तब सत्ता की सोभा भई। प्रमेयगुण सबकौं प्रमाण करवेजोग्य सब जातैं प्रमाण

भये सो सत्तानें धर्यो तब सत्ता प्रमाणरूप भई तब सोभाई। तब सत्ताकों सिंगार है अगुरुलघु सत्तानें धर्यो तब सत्ता हलई (की) भारी न भई तब सत्ता अपने सुद्धरूप रही तब भली लागी तब सत्ता की सोभा भई। ऐसे अनंतगुण सत्तानें धरें आपमांही तब सत्ताके आभूषण सब भये सो ही सिंगार जानौ।

**इहां कोई प्रश्न करै-**गुणमें गुण नहीं, सत्ता अनंतगुणधारी काहे कहौ ?

**ताकौ समाधान-**सत्ताके है लक्षण की अपेक्षा सब है लक्षणरूप गुण हैं। हैलक्षण सत्ताकौ है यातें सत्तामें आये। द्रव्यतौ सब गुणके सब लक्षणकौ आधार है। सत्ता एक हैलक्षण करि आधार ऐसौ भेद विविक्षातें प्रमाण है। ऐसैं सत्ता सब रूप आभूषण बनावकरि सिंगारकों धरि सोभावती है। सत्ता द्रव्य गुण पर्याय के विलास भाव विलसै है। सब विलासरस सत्तामें है तातें सिंगाररस सत्तामें भयो। सत्ता अरु सत्तापरणति दोउकी रसवृत्ति प्रवृत्ति सिंगार है। सत्ता परणति सत्ताकों वेदै तब रस निहपत्ति होई अरु सत्ता अपणी परणति धरै तब आपही परणति रसकों धरै तब दोउके मिलापतें आनंदरस होय सो सिंगार है।

**आगें वीररस सत्तामें कहिए है-**सत्तातें प्रतिकूल का अभाव सत्तानै कीया अपनी वीरवृत्ति करि ऐसी वीर्यशक्ति सत्ता में है तिसतें सत्ता सासती निहपत्ति धरै है। है विलास द्रव्य गुण परजाय का वीर्य तें सत्ता करै है तातें वीररस में है। जेते गुण हैं अपने अपने प्रभाव कौ धरै है ते ते सब गुण में सासताभाव विकाशभाव आनंदभाव वस्तुत्वभाव प्रकाशभाव अबाधितभाव ऐसे अनन्तभाव वीरत्व में आये शक्ति तें वीर्य की यातें वीररस में सबके राखणें का पराक्रम आया तातें वीररस सत्ता में भया। सत्ता तातें सबकों है भाव दीया। निहपत्ति

वीर्य नै करी तातें वीररस सत्ता में कहिये।

**आगें करुणरस सत्ता में कहिए है-**सत्तामें करुणा है। काहेतें सत्ता हैभाव और गुणकों न देता तौ सब विनसते, तातें अपनां हैभाव सबकौ देकरि राखे तब करुणा सधी तातें करुणरस सत्तामें आया।

**आगें सत्तामें वीभत्सरस कहिए है-**सत्ता अपने हैभाव कै प्रभाव का विलास बडा देख्या तब और प्रतिकूलभाव सों ग्लानि भई तब प्रतिकूलभाव न धर्य ब वीभत्स कहिए।

**आगें भयरस सत्तामें है सो कहिये है-**सत्ता ऐसे भय कौ धरें है, असत्तामें न आवै सो भय कहिए।

**सत्ता हास्यकों धरें है सो कहिये है-**दरशन ज्ञानपरणति करि जो उल्हास आनंद करै दरशन ज्ञान चारित्र की सत्ता सो ही हास्य नाम जानना।

**आगें रौद्ररस कहिये है-**सत्ता असत्ता प्रतिकूलताकों अपने वीर्यतें जीति सदा रहै है तहां सदा परभाव का अभाव करणां। परके अभावरूप भाव सो ही रौद्ररस है।

**आगें अद्भुतरस कहिए है-**अद्भुतता सत्तामें ऐसी है-साकारज्ञान है, निराकार दरसन है, दोऊ की सत्ता एक है। यह अद्भुतभावरस है।

**शांतरस-**सत्ता में और विकल्प नहीं स्व शांतरूप है तातें शान्तरस है।

ऐसैं नऊ रस एक सत्ता में सधै है। ऐसैं ही अनन्तगुणन में नवों रस सधै है सो जानियो। रसयुक्त काव्य प्रमाण है। जैसे भोजन लवणरस सों नीकौ लगै तैसे काव्य रस सहित भला लगै। तैसे अनन्तगुण अपने रसभरे सोभा पावै तातें रस वर्णन कीयो।

## आगैं गुणपुरुष गुणपरणतिनारी का विलास कैसें करै है सो कहिये है।

ज्ञानगुण अपनी ज्ञानपरणति का विलास करै है। ज्ञानके अंग में परणति का अंग आया तब अविनासी अखंडित महिमा निज घर की प्रगटी। ज्ञान का जुगप्त भाव परणति नै वेद्या तब एकतारस उपज्या। परणति ज्ञान में न होती तौ अनन्तशक्तिरूप ज्ञान न परणवता तब महिमा ज्ञान की न रहती। तातैं ज्ञान निज परणति धरि विलास ज्ञान करै है। ज्ञान में जानपणां था सो परणति परणई तब जानपणां वेद्या। तब ज्ञानरस प्रगट्य ज्ञानमें अतीन्द्रियभोग परणतितिया के संजोगतैं है। तातैं ज्ञान अपनी नारी का विलास करै है। तहां आनंद पुत्र होय है। ऐसैं अनंत गुणपुरुष सब अपनी गुणपरणति का विलास करै है। सब गुण का सरवस्व परणति सब गुण की है। वेद्यवेदकतारुप रस सब परणतितैं सबमें प्रगटै है।

**प्रश्न-**एक गुण सब गुण के रूप होइ वरतै है। तहां सब गुण की परणति नैं सबका विलास कीयाक न कीया ?

**ताका समाधान-**गुणरूप परणति जिस गुण की है तिसही की है और की नाहीं। विनमें जो परजाय द्वारकरि व्यापकता करी है तिस परजायरूप अपने अंग में परणवै है तिस विलास कौं करै है। तातैं अपने अंग गुण के है ते ते विलसे है। गुण निज पुरुष जो है ताकौं विलसै है। जो यौ न होय तौ और गुण की परणति और गुण रूप होइ तब महादूषण लागै। तातैं अपनी परणति कौं गुण जो है सोही विलसैं है। यहां अनन्तसुख विलास एक २ गुणपरणतितिया जोगतैं करै है। सब याही प्रकार विलास करै है। अनन्त महिमा कौं धरै हैं ऐसै परमात्म राजा के राज में सब गुणपुरुष नारी अनन्त विलास कौं करि सुखी हैं।

## दरशन मंत्री परमात्म राजा कौं कैसें सेवै है सो कहिये है।

परमात्मराजा की प्रजा अनन्तगुण शक्ति परजाय सकल राजधानी दरशन देखवे तैं दरसि भई तब साक्षात भई। दरशन न देखता तब अदरसि भयें ज्ञान कहां तैं जानता। देखनें जानने में न आवै तब ज्ञेय वस्तु न होय तब सब परमात्म का पद न रहता। तातैं दरशन गुण देखि देखि सकल सर्वस्व कौं साक्षात करै है। ज्ञान कौं देखै है तब ज्ञान अदरसि न होय है तब ज्ञान का अभाव न भयें सदभाव ज्ञान का रहै है। वीर्य कौं देखै है तब वीर्य अदृश्य न होय है तब ज्ञान वीर्य कौं जानैं है तब साक्षात होय है। ऐसैं अनंतगुण परमात्मा के राखवे कौं दरशन कारण है। दरशन निराकार रूप नित्य है सो नीराकार शक्ति जनावै है। सामान्य सत् निर्विकल्पनैं अवलोकै है। तामैं निर्विकल्पसेवा दरशन की है जो ऐसी निर्विकल्प सेवा दरशन न करता तौ निर्विकल्प सत् न रहता साक्षातकार निर्विकल्पता दरशन नैं दिखाई है। निर्विकल्प ही वस्तु का सर्वस्व है। प्रथम सामान्यभाव होई तौ विशेष होइ। सामान्यभाव बिना विशेष न होय। सामान्य विशेषकौं लीये हैं। तातैं दरशन निर्विकल्प प्रगट करै है तहां विशेष की भी सिद्धि होय है। काहेतैं, सामान्य भये विशेषनांव पावै है। तातैं वस्तु की सिद्धि दरशन करै है। ऐसी सेवा करै है। दरशन सब गुणमें बहोत बारीकीकौं धरै है। काहेतैं, विशेषमें बहु पावै दरशन सामान्य अवलोकन मात्रमें सब सिद्धि तो है परि याकौं अंग अतिसूक्ष्मरूप निर्विकल्पदसारुप निराकाररूप अक्रियरूप अमूरतिरूप अखंडितरूप तामै गम्य जब होइ तब सब सिद्धि होय। बिरला जन दरशन में गम्य करै, संसार अवस्था में विशेष कहे सब जानै। सामान्यमात्रमें कोई बिरला पावै विशेषमें बहु पावै। सो



यह कथन संसार विविक्षा को है। दरशन की सिद्धि सामान्य जनायवे कौं कह्यौ है। जो कोई अपने प्रभु समीप जाय है सो प्रथम देखै है तब सब क्रिया होय है। प्रभुको न देखै है तो कछु न होय तैसें परमात्म राजा के देखैं सब सिद्धि है। जैसें निर्विकल्प रीति करि दरशन सेवै ताकों निर्विकल्प आनंदफल होय है।

### आगे ज्ञानमंत्री परमात्म राजा को कैसें सेवै है

परमात्म राजा के जो विभव है ताकों विशेष जामें अनंतगुण की अनंतशक्ति अनंतपर्याय, एक २ गुण की परजायमें अनंतनृत्य, नृत्यमें अनंत थट, थटमें अनंतकला, कलामें अनंतरूप, रूपमें अनंतरूप, रूपमें अनंतसत्ता, सत्तामें अनंतभाव, भावमें अनंतरस, रसमें अनंतप्रभाव, प्रभावमें अनंत विभव, विभवमें अनंतरिद्धि, रिद्धिमें अनंत अतीन्द्रिय अनाकुल अनोपम अखंडित स्वाधीन अविनासी आनंद ये सब भाव ज्ञान जानै तब व्यक्त होय तब नांव पावै। ज्ञान न जानै तब वेदवो न होय तब हूवा ही न हूवा। तातैं ज्ञान अनन्तगुणपर्याय की समुदाय कौ प्रगट करै है। तब परमात्म कौ पद प्रगट करै है। तब परमात्म कौ पद प्रगट होय है। ज्ञान जानै परमात्मनातैं तब सर्वस्व परमात्म कौ प्रगटै। ज्ञान त्रिकालवर्ती पदार्थ जानै या शक्ति ज्ञानमें है। स्वसंवेदन ज्ञान तातैं ज्ञान सकल विशेष भाव स्वपर का लखावावालौ छै सो ज्ञान सकल नै प्रगट करै। सो परमात्म राजा कौ प्रभुत्व ज्ञान प्रगट करै छै। ज्ञान बिना परमात्म राजा की विशेष विभूति कुन प्रगट करै, ज्ञान ही प्रगट करै। ज्ञान मंत्री (कौ) ज्ञायकरूप जानि परमात्म राजा (नै) सर्वमें प्रधानता दर्ई। राजा कौ राज ज्ञानकरि है। जैसें काहू के घर में निधान है, न जानै तौ वह निधान भयो ही न भयो। तैसें परमात्म राजा के अनन्त निधान ज्ञान न जानै तौ सब वृथा होय। तातैं सब पद की सिद्धि ज्ञानमंत्री तै है। सत्तामें

सासतालक्षण (नै) और गुणकौ सासता कीया। उत्पादव्यय कौ धरे द्रव्य गुण पर्याय का आधार सो ज्ञान नै जनाया। परमात्म राजा कौ वीर्यमें निहपन्न राखवे का भाव है, सबकौ निहपन्न राखै सो ज्ञान नै जनाया। गुणन का भाव पर्यायभाव ज्ञान नै जनाया। तातैं ज्ञानमंत्री सब का जनावनहार है। सबकौ ज्ञान करि परमात्म राजा जानै है, तातैं यह जानै है मेरे ज्ञानमंत्री करि मैं सब जानौं हौं। यह ज्ञानमंत्री प्रधान सब परि प्रधान है। या ज्ञानमंत्री कौ अपना सर्वस्व सौंप्या है। अरु विशेष अतीन्द्रिय आनंद की रिद्धि ज्ञान पावै है। ज्ञानतैं इस परमात्म राजा के और बडा नाहीं। सर्वज्ञता यहि कौ संभवै है।

### आगे चारित्रमंत्री कैसें सेवै है सो कहिये है।

परमात्म राजा के जेता कछु राजरिद्धि का भाव है। तेता भावकौ चारित्र आचरै है थिरता राखै है। ज्ञान के जानपनै कौ आस्वादी होय थिरता राखै आचरै। ज्ञान स्वसंवेदभाव धरें परम आनन्द उपजावै है सो चारि दरशन में सर्वदरशी शक्ति है। स्वरूपकौ देखै है परमात्म राजा के देखवेतैं जो आनन्द पावै है-थिरताभाव पावै है सो चारित्रतैं। वीर्य निहपन्नता की थिरता पावै हैं सो चारित्रतैं, प्रमेय सत्ता आदि सब गुण थिरता पावै हैं सो चारित्रतैं। वेदकभाव सबका चारित्र करै है। चारित्र सब द्रव्य गुण पर्याय शक्ति लक्षण सरूप रूप सर्वस्व वेदै है थिरता राखै है। चारित्र मंत्रीतैं अपने घर की रिद्धि का जो सुख है सो परमात्म राजा विलसै है। जो चारित्र न होता तौ अपनी राजधानी का सुख आप परमात्म राजा न विलसता। काहेतैं यह रसास्वाद करणें का अंग इस ही का है ओर मैं नाहीं। राजा का पद सफल अनंतसुखतै है सो सुख इसतै है। तातैं यह राजपद की सफलता का कारण है। अर्थक्रिया षट कारक यातैं

है। उत्पाद व्यय ध्रुवतामें स्वरूप लाभ स्वभाव प्रच्यवन अवस्थित भाव या करि सिद्ध है है। सब गुण की अनंत महिमा यानै सफल करी है। सबमें प्रवेश करि वेदि विनके स्वरूप भाव की प्रगटता करि वरतैं हैं। तब परमात्म राजा जानैं। यातैं सबकी प्रगटता अरु रसास्वाद है। परमसुख याही करि भयो है। या बिना वेदकता नहीं। यह चारित्र मंत्री सब गुण कौं सफल करै है। याही करि मेरी गुण प्रजा का विलास है सो जान्या जाय है। और तौ जे लक्षण रीति धरे है सो तिन लक्षण कौं सफलता करि परमात्म राजा की राजधानी राखै है। तातैं चारित्रमंत्री सब घर की निधि की सिद्धि करै है। बारैं ही बारैं सिद्धि न करै, विनके घर में प्रवेश करि विनकी निधि महिमा का विलास व्यक्त करै है ऐसा चारित्र प्रधान है। चारित्र काहू का आचरण न करै तौ सब गुण की भेट परमात्मराजा सौं भई ही न भई, तब निज प्रजा का अभाव भयें राजा किसका कहावै तातैं राजपद का राखणसील बड़ा मंत्री है।

### आगैं सम्यक्त फौजदार का वर्णन करिये है।

सम्यक्त फौजदार; सब गुणप्रजा सब असंख्यदेसन की है तिस प्रजा कौ भलीभांति पालै है। तिस गुणप्रजा के प्रतिकूली है तिनका प्रवेश न होण दे है। काहू की जोरी चोरी न चलै है। ज्ञान का प्रतिकूल अज्ञान ताकरि संसारी अंध भये डोले हैं निजतत्व कौं न जानै है। स्वरूप तैं भिन्न पर कौं हेय न जाने है। परकौं स्व मानि मानि मोह बैरी कौ प्रबल करि अपणी शक्ति मंदकरि चौरासी लाख जोनि-देशन में अनादि के हींडै है थिरता का लेसभी न पावै हैं। ऐसी अज्ञान महिमा ताकौं यह सम्यक्त फौजदार अपने देशन में प्रवेश अंसमात्र हू न करनैं दे है। अर दरसनावरणी स्वरूप का दरशन न होनै दे है विसतैं प्राणी परके देखवेमें वरतै है तहां आत्म

रति मानै है। अनादि आवरण ऐसा है। चक्षुद्वार परावलोकन होय है सो हू न होनै दे है। चक्षु दरशनावरणी ऐसा है। अचक्षुदरशनावरणी अचक्षुदरशन हू न होनै दे। अवधिदरशनावरणी अवधिदरशन न होनैं दे। केवलदरशनावरणी केवलदरशन न होनैं दे। निद्रा पांच, जागरत का आवरण करै है सो स्वरूप दरशन कहां तैं होनैं दे। तातैं दरशनावरणी स्वरूप दरशन का घातक है। ऐसे प्रतिकूलों कौं सम्यक्त फौजदार प्रवेश न होनै दे। मोह, सम्यक्त का घातक अनंत सुख का घातक स्वरूपाचरण चारित्र का घातक। इस मोह (नै) जगत के जीव बहिरमुख करि राखे हैं, पर का फंद पारि व्याकुल करि अनात्म अभ्यासतैं दुखी कीये हैं। साम्यभाव-अमृतरस न चाखनैं दे है। अतत्वमें श्रद्धा रुचि प्रतीति करि मानी है पर पद का अभिमानी रागतैं उन्मत्त पैंड पैंड परि नया स्वच्छंद दसा धारि विषय कषायसौं व्यापव्यापकता परपरणति असुद्धता करि संसारवारा तिस मोहनैं कराया हैं इन संसारी जीवन कौं। मोह की महिमा शरीरादि अनित्य मानै, मोहतै परम प्रेम करि सुख दुख मानै है। महामोह की कल्पना ऐसी है। अनंतज्ञान के धणी कौं भुलाय राख्या है। ऐसा प्रतिकूली बैरी कौं सम्यक्त फौजदार न आवनै दे। परमात्म राजा की आण ऐसी मनावै है। वेदनीय कर्म करि संसारी साता असाता पावै है तहां सुख दुख वेदै हैं। हरष सोक मानि मानि महा परवसि भये स्वरूप अनुभव न करि सकै। परास्वादमें रस मानै है। ऐसे प्रतिकूली कौं न आवनैं दे है। नामकर्म की करी नाना विचित्रता है। कोई देवनाम नरनाम नारकनाम तिरजंचनाम जात्यादिनाम सरीरादिनाम अनेक नाम हैं ते धरैं हैं। संसारी ते सूक्ष्मगुण कौं न पावै है। ऐसे प्रतिकूली का प्रवेश न होनै दे है सम्यक्त फौजदार। ऊंच नीच गोत्रकर्म के उदयतैं ऊंच नीच गोत्र संसारी धरै है। तातैं

अगुरुलघु गुणकों न पावै है। ऐसै कर्म का प्रवेश न होनै दे है। आयुकर्म च्यारि प्रकार, अंतराय पांच प्रकार इनकों न आवनै दे है सम्यक्त फौजदार। भावकर्म नोकर्म का प्रवेश न होय ऐसा तेज सम्यक्त का है। परमात्मा राजा की राजधानी यथावत जैसी है तैसी राखै है। परमात्मा राजा के जेते गुण हैं तेते सुद्ध या सम्यक्ततैं हैं तातैं याकों ऐसा काम सौंप्या है।

### आगैं परिणाम कोटवाल का वर्णन कीजिये है।

परणाम कोटवाल, मिथ्यातपरणाम-परपरणाम चोर का प्रवेश न होने दे है। परपरणाम चोर कैसै हैं सो कहिये है-

स्वरूप रूप परणाम के द्रोही हैं, पररूपकों धुके है, परपद का निवास पाय आतम निधि चोरवे कौ प्रवीन हैं। रागादि रूप अवस्था नैं अनाकुल सुख का संबंध जिनकै कबहू न भया है। पररस के रसिया हैं। भववासी जीवकों अतिविषम है तोऊ प्रिय लागै हैं। बंधन के करता हैं। पराधीन हैं। विनासीक है। अनादि सादि पारणामीकता कौ लीये हैं। परंपरया अनादि है। ऐसे परपरणाम का प्रवेश परणाम कोटवाल न होने दे है। विस परणाम कोटवाल नै परमात्मा राजा के देस की प्रजा की संभार समय समय करी है। विस कै बडा जतन है। परमात्मा राजा नै एक स्वरूपरूप अनन्तगुणन की रखवाली का ओहदा सौंप्या है। हमारे देस की सब सुद्धता तातैं है। तब ऐसा जानि गुणप्रजा की समय समय और राजा की समय समय संभार करै है। सब गुण के घर में प्रवेश करि विनके निधान कौ साबूत करि प्रतक्ष विनका प्रभाव प्रगट करै है। या कोटवाल में ऐसी शक्ति है जो नैक वक्र होय तौ राजा का सब पद असुद्ध होय शक्ति मंद होय संसारी की नाई। तातैं परणाम कोटवाल सकल पद कौ सुद्ध राखै है। परणाम के आधीन राजपद है तातैं परमरक्षाकारी

कोटवाल है। परणाम कोटवाल में ऐसी शक्ति है सो सब राज कौ, राजा की गुण प्रजा कौ, मंत्री कौ, फौजदार कौ अपनी शक्ति मिलाय विद्यमान राखै है। सब अपणी महिमा कौ यातैं धरें हैं। याकरि विनका सर्वस्व है ऐसा परणाम कोटवाल परमात्मा पद का कारण है तातैं यामैं अपार शक्ति है।

### आगैं परमात्मा राजा का वर्णन कीजिये है।

परमात्मा राजा अपनी चिदपरणतितिया सों रमै है। कैसी है चेतनापरणति महा अनन्त अनोपम अनाकुल अबाधित सुख कौ दे हैं। परमात्मा राजा सौं मिलि मिलि एक रस द्वै है। परमात्मा राजा अपनां अंग सौं मिलाय एकरूप करै है।

**कोई इहां प्रश्न करै-**जो परणति समय समय ओर ओर होय है तातैं परमात्मा राजा कै अनन्त परणति भई तब अनन्तपरणतितिया कहौ।

**ताकौ समाधान-**परमात्मा राजा एक हैं, परणतिशक्ति भाविकाल में प्रगट ओर ओर होने की है परि वर्तमानकाल में व्यक्तरूप परणति एक है सोही विस राजा कौ रमावै है। जो परणति वर्तमान की कौ राजा भोगवै है सो परणति समयमात्र आतमीक अनन्त सुख देकरि विलय जाय है। परमात्मा में लीन होय है। जैसै देव कै देवांगना एक विलय होइ तब दूजी उपजै तासौं देव भोग करै। परि ए तौ विशेष, बाकी रहणि धणी, याकी एक समय मात्र। अरु वा विलय होइ और थानक उपजै, या परि तिस रूप ही में समावै है। वर्तमान अपेक्षा एक है अनन्त रस कौ करै है। सरूपकों वेदि अंतर में मिलि स्वरूप निवास करि फेरि दूजै समय उपजै है। स्वरूप के शरीर में प्रवेश करि सुख दै मिलि गई फेरि उपजि करि दूजै समय फेरि सुख दे है। उपजतां स्वरूप सुख लाभ दे

व्यय करि स्वरूप में निवास करि ध्रुवताकों पोषि आनंद पुंजकों करि स्वरसकी प्रवृत्ति करणहारी कामिनी नवा स्वांग धरै है। परमात्म राजा का अंग सकल पुष्ट करै है। ओर तिया बलकों हरै है, या बल करै है। ओर कबहू कबहू रस भंग करै है, या सदा रसकों करै है। या सदा आनंदकों करै है। परमात्म राजा कौ प्यारी सुख दैनी परम राणी अतीन्द्रिय विलास करणी अपनी जानि आप राजा हू यासौं दुराव न करै। अपनों अंग दे समय समय मिलाय ले है अपने अंगमें। राजा तौं वासौं मिलतां वाकै रंगि होय है। वा राजासौं मिलतां राजा कै रंगि होय है। एक रस रूप अनृप भोग भोगवै है। परमात्म राजा अरु परणति तिया का विलास सुख अपार, इनकी महिमा अपार है। यह परमात्म राजा का राज सदा सास्वत अचल है। अनंत वर्णन कीयें हू पार न आवैं। विस्तारमें आजि थोडी बुद्धि तातैं न समझि परै। तातैं स्तोक कथन कीया है। जे गुणवान हैं ते या थोडी बहुत करि समझेंगे। इसहीमें सारा आया है। समझिवार जानैगे।

### सवैया ।

परम पुराण लखे पुरुष पुराण पावे सही ह्वै स्वज्ञान जाकी महिमा अपार है।

ताकी कीयें धारण उधारणा स्वरूप का ह्वै ह्वै है निसतारणा सो लहै भवपार है।।

राजा परमात्मा कौ करत बखाण महा दीपकौ सुजस बढै सदा अविकार है।

अमल अनृप चिदरूप चिदानंद भूप तुरत ही जानै करै अरथ विचार है।।१।।

### दोहा ।

परम पुरुष परमात्मा, परम गुणनकौ थान।  
ताकी रुचि नित कीजिये, पावै पद भगवान।।२।।

।। इति परमात्मपुराण ग्रंथ सम्पूर्ण ।।

## स्वर्गीय कविवर दीपचंदजी कृत ज्ञानदर्पण

### दोहा।

गुण अनंत ज्ञायक विमल, परमज्योति भगवान।  
परमपुरुष परमात्मा, शोभित केवलज्ञान॥१॥

### सवैया इकतीसा (मनहर)

ज्ञानगुणमाहि ज्ञेय भासना भई है जाकैं,  
ताके शुद्ध आत्माको सहज लखाव है।  
अगम अपार जाकी महिमा महत महा,  
अचल अखंड एकताको दरसाव है॥  
दरसन ज्ञान सुख बीरज अनंत धारै,  
अविकारी देव चिदानंद ही को भाव है।  
ऐसो परमात्मा परमपदधारी जाकौं,  
दीप उर देखै लखि निहचै सुभाव है॥२॥  
देखैं ज्ञानदर्पणकौं मति परपण१ होय,  
अर्पण सुभावकौ सरुपमैं करतु हैं।  
उठत तरंग अंग आतमीक पाइयतु,  
अरथ विचार किए आप उधरतु हैं॥  
आतमकथन एक शिवहीकौ साधन है,  
अलख अराधनके भावकौं भरतु हैं।  
चिदानंदरायके लखायवेकौं है उपाय,  
याके सरधानी पद सासतौ वरतु हैं॥३॥

परम पदारथकौं देखैं परमारथ है,  
स्वारथ सरुपकौ अनूप साधि लीजिए॥  
अविनासी एक सुखरासी सोहै घटहीमें,  
ताकौ अनुभौ सुभाव सुधारस पीजिये॥  
देव भगवान ज्ञानकलाकौ निधान जाकौं,  
उरमें अनाय२ सदाकाल थिर कीजिए॥  
ज्ञानहीमें गम्य जाकौ प्रभूत्व अनंत रूप,  
वेदि निज भावनामैं आनंद लहीजिए॥४॥  
दशा है हमारी एक चेतना विराजमान,  
आन परभावनसौं तिहू काल न्यारी है।  
अपनौ सरुप शुद्ध अनुभवै आठौं जाम,  
आनंदकौ धाम गुणग्राम विसतारी है॥  
परम प्रभाव परिपूरन अखंड ज्ञान,  
सुखकौ निधान लखि आन रीति डारी है॥  
ऐसी अवगाढ़ गाढ़ आई परतीति जाके,  
कहै दीपचंद ताकौं वंदना हमारी है॥५॥  
परम अखंड बृहमंड विधि लखै न्यारी,  
करम विहंड करै महा भवबाधिनी।  
अमल अरुपी अज चेतन चमतकार,  
समैसार साधै अति अलख अराधिनी॥  
गुणकौ निधान अमलान भगवान जाकौं,  
प्रतछ दिखावै जाकी महिमा अबाधिनी।  
एक चिदरुपकौं अरुप अनुसरै ऐसी,  
आतमीक रुचि है अनंतसुखसाधिनी॥६॥  
अचल अखंडपद रुचिकी धरैया भ्रम,



भावकी हरैया एक ज्ञानगुनधारिनी।  
 सकति अनंतकौ विचार करै बारबार,  
 परम अनूप निज रूपकौ उधारिनी॥  
 सुखकौ समुद्र चिदानंद देखै धटमाहि,  
 मिटै भव बाधा मोख पंथ की बिहारिनी॥  
 दीप जिनराजसौ सरूप अवलौके ऐसी,  
 संतनकी मति महामोक्ष अनुसारिनी॥७॥  
 चेतनसरूप जो अनूप है अनादिहीकौ,  
 निहचै निहारि एकताहीकौ चहतु हैं।  
 स्वपरविवेक कला पाई नित पावन ह्वै,  
 आतमीक भावनमें थिर ह्वै रहतु हैं॥  
 अचल अखंड अविनासी सुखरासी महा,  
 उपादेय जानि चिदानंदकौ गहतु हैं।  
 कहै दीपचंद ते ही आनंद अपार लहि,  
 भवसिंधुपार शिवद्वीपकौ लहतु है॥८॥  
 चेतनको अंक एक सदा निकलंक महा,  
 करम कलंक जाँमें कोऊ नहीं पाइए॥  
 निराकार रूप जो अनूप उपयोग जाके,  
 ज्ञेय लखैं ज्ञेयाकार न्यारौ हू बताइये॥  
 बीरज अनंत सदा सुखतौ समुद्र आप,  
 परम अनंत तामैं और गुण गाइये॥  
 ऐसो भगवान ज्ञानवान लखै धटही मैं,  
 ऐसो भाव भाय दीप अमर कहाइये॥९॥  
 व्यवहार नयके धरैया व्यवहार नय,  
 प्रथम अवस्था जाँमें करालंब कह्यो है।

चिदानंद देखै व्यवहार झूठ भासतु है,  
 आतमीक अनुभौ सुभाव जिहि लह्यो है॥  
 देव चिदरूपकी अनूप अवलोकनिमें,  
 कोऊ विकल्प भाव भेद नहीं रह्यो है॥  
 चेतन सुभाव सुधारस पान होय जहां,  
 अजर अमरपद तहां लह लह्यो है॥१०॥  
 ज्ञान उर होत ज्ञाता उपादेय आप मानै,  
 जानै पर न्यारौ जाके कला है विवेककी॥  
 करम कलंक पंक डंक नहीं लागै कोऊ,  
 देव निकलंक रुचि भई निज एककी॥  
 निरभै अखंडित आबधित सरूप पायौ,  
 ताहीकरि मेटी भ्रमभावना अनेककी॥  
 देव हियबचि बसै सासतौ निरंजन है;  
 सो ही धनि दीप जाके रीति सुध टेककी॥११॥  
 मेरो ज्ञानज्योतिकौ उद्योत मोहि भासतु है,  
 तातैं परज्ञेयको सुभाव त्याग दीनौ है॥  
 एक निराकार निरलेप जो अखंडित है,  
 ज्ञायक सुभाव ज्ञानमाहि गहि लीनौ है॥  
 जाकी प्रभुतामैं उटि गए हैं विभाव भाव,  
 आतम लखावहीतैं आप पद चीनौ है॥  
 ऐसैं ज्ञानवानके प्रमान ज्ञान भाव आपौ,  
 करनौ न रह्यौ कछु कारिज नवीनौ है॥१२॥  
 मेरो है अनूप चिदरूप रूप मोहिमाहि,  
 जाकै लखै मिटै चिर महा भवबाधना॥  
 जाके दरसावमैं विभाव सो बिलाय जाय,

जाकी रुचि कीए सधै अलख अराधना॥  
जाकी परतीति रीति प्रीतिकरि पाई तातैं,  
त्यागी जगजाल जेती सकल उपाधना॥  
अगम अपार सुखदाई सब संतनकौं,  
ऐसी दीप साधै ज्ञानी सांची ज्ञानसाधना॥१३॥  
आप अवलोके विना कछु नाही सिद्धि होत,  
कोटिक कलेशनिकी करौ बहु करणी।  
क्रिया पर कीएं परभावनकी प्रापति है;  
मोक्षपंथ सधै नाही बंधहीकी धरणी॥  
ज्ञान उपयोगमें अखंड चिदानंद जाकी,  
सांची ज्ञान भावना है मोक्षअनुसरणी॥  
अगम अपार गुणधारीकौ सुभाव साधै,  
दीप संत जीवनकी दशा भवतरणी॥१४॥  
वेदत सरूप पद परम अनूप लहै,  
गहै चिदभाव महा आप निज थान है॥  
द्रव्यकौ प्रभाव अरु गुणकौ लखाव जामें,  
परजायको उपावै ऐसो गुणवान है॥  
व्यय उतपाद ध्रुव सधै सब जाहीकरि,  
ताहीतैं उदोत लक्ष्य लक्षणको ज्ञान है।  
महिमा महत जाकी कहांलौ कहत कवि,  
स्वसंवेदभावदीप सुखकौ निधान है॥१५॥  
चिदानंदराइ सुखसिंधु है अनादिहीकौ,  
निहचै निहारि ज्ञानदिष्टि धार लीजियै।  
नय विवहारहीतै करम कलंक पंक,  
जाके लागि आए तौऊ सुद्धता गहीजिये।

जैसी दिष्टि देखै सब ताकौ तैसौ फल होइ,  
सुध अवलोकै सुधउपयोगी हूजियै।  
दीप कहै देखियतु आतमसुभाव ऐसौ,  
सिद्धके समान ज्ञानभावना करीजियैं॥१६॥  
मेटत विरोध दोउ नयनको पछिपात(!)  
महा निकलंक स्यातपद अंकधारणी।  
ऐसी निजवाणीके रमैया समैसार पावै,  
ज्ञानज्योति लखैं करैं करमनिवारणी।  
सिद्ध है अनादि यह काहूपै न जाइ खंड्यौ,  
अलख अखंडरीति जाकी सुखकारणी।  
लहिकैं सुभाव जाकौं रहि हैं सुथिर जेही,  
तेही जीव दीप लहैं दशा भवतारणी॥१७॥  
मानि परपद आपौ भूले ए अनादिहीके,  
ऐसे जगवासी (निजरूप) न संभारै हैं।  
घटहीमें सासतो निरंजन जो देव बसै,  
ताकौं नहीं देखैं तातैं हितकौं निवारै हैं।  
जोति निजरूपकी न जागी कहुं हीये माहिं,  
यातै सुखसागर सुभावकौं विसारै हैं।  
देशना जिनेंद्र दीप पाय जब आपा लखैं,  
होइ परमात्मा अनंत सुख धारै हैं॥१८॥  
सहज आनंद पाइ रह्यो निजमें लौ लाइ,  
दौरि २ ज्ञेयमें धुकाइ क्यों परतु है।  
उपयोग चंचलके कीयेही असुद्धता है,  
चंचलता मेटैं चिदानंद उधारतु है।  
अलख अखंड जोति भगवान दीसतु है,

नै एकतै देखि ज्ञाननैन उधरतु हैं।  
 सिद्ध परमात्मा सौ निजरूप आत्मा है,  
 आप अवलोकि दीप सुद्धता करतु हैं॥१९॥  
 अचल अखंड ज्ञानजोति है सरुप जाकौ,  
 चेतनानिधान जो अनंतगुणधारी है।  
 उपयोग आतमीक अतुल अबाधित है,  
 देखिये अनादि सिद्ध निहचै निहारी है॥  
 आनंदसहित कृतकृत्यता उद्योत होइ,  
 जाही समै ब्रह्मदिष्टि देत जो संहारी है।  
 महिमा अपार सुखसिंधु ऐसो धटही मैं,  
 देव भगवान लखि दीप सुखकारी है॥२०॥  
 परपरिणाम त्यागि तत्त्वकी संभार करै,  
 हरै भ्रमभावज्ञान गुणके धरैया हैं।  
 लखै आपा आपमाहिं रागदोष भाव नाहिं,  
 सुद्ध उपयोग एक भावके करैया हैं॥  
 थिरतासुरुपहीकी स्वसंवेदभावनमें,  
 परम अतेंद्री सुख नीरके ढरैया हैं।  
 देव भगवान सौ सरुप लखैं धटहीमें,  
 ऐसे ज्ञानवान भवसिंधुके तरैया हैं॥२१॥  
 लोकालोक लखिकैं सरुपमें सुथिर रहैं,  
 विमल अखंड ज्ञानजोतिपरकासी हैं।  
 निराकार रूप सुद्धभावके धरैया महा,  
 सिद्धभगवान ऐक सदा सुरवरासी हैं।  
 ऐसौ निजरूप अवलोकत हैं निहचैमैं,  
 आप परतीति पाय जगसौं उदासी हैं।

अनाकुल आतम अनूप रस वेदतु हैं,  
 अनुभवी जीव आप सुख के विलासी हैं॥२२॥  
 करम अनादि जोग जातैं निज जान्यो नाहिं,  
 मानि परमाहिं आपौ भवमैं बहतु हैं।  
 गुरु उपदेश समै पाय जो लखावै जीव,  
 आप पद जानै भ्रमभावकौ दहतु है।  
 देवनको देव सो तो सेवत आनादि आयौ,  
 निजदेव सेए बिनु शिव न लहतु है।  
 आप पद पायवेकों श्रुतसौ बखान्यौ जिन,  
 तातैं आत्मीक ज्ञान सबमें महतु है॥२३॥  
 गगनकै बीचि जैसें घनघटामाहिं रचि,  
 आप छिप रह्यौ तोऊ तेज नहिं गयो है।  
 करमसंजोग जैसें आवर्यौ है उपयोग,  
 गुप्त सुभाव जाकौ सहज ही भयौ है।  
 ज्ञेयकौ लखत ऐसो ज्ञानभाव यामैं कोऊ,  
 परम प्रतीति धारि ज्ञानी लखि लयो है।  
 उपयोगधारी जामैं उपयोग कीएं सिद्धि,  
 और परकार नहीं जिनवैन चयो है॥२४॥  
 महा दुखदानी भव थितिके निदानी जातैं,  
 होय ज्ञान हानी ऐसैं भावक चमैया हैं।  
 अति ही विकारी पापपुंज अधिकारी सदा,  
 ऐसे राग दोष भाव तिनके दमैया हैं।  
 दया दान पूजा सील संजमादि सुभभाव,  
 ए हू पर जानैं नाहिं इनमें उम्हैया हैं।  
 सुभासुभ रीति त्यागि जागे है सरुपमाहिं,



तेई ज्ञानवान चिदानंदके रमैया हैं॥२५॥  
 देहपरिमाण गति गतिमाहिं भयौ जीव,  
 गुप्त लै रह्यो तौऊ धारें गुणवृंद है।  
 करम कलंक तोऊ जामें न करम कोऊ,  
 रागदोष धारे हू विसुद्ध निरफंद है।  
 धारत सरीर तोऊ आतमा अमूरतीक,  
 सुध पक्ष गहे एक सदा सुखकंद है।  
 निहचै विचार देख्यौ सिद्ध सो सरूप दीप,  
 मेरे तौ अनादिकौ सरूप चिदानंद है॥२६॥  
 व्यवहारपक्ष परजाय धरि आयौ तौउ,  
 सुद्धनै विचारे निज परमै न फँसा है।  
 ज्ञान उपयोग जाकी सकति मिटाई नाहि,  
 कहा भयौ जो तू भववासी होय वसा है।  
 द्वैतकौ विचार कीएं भासत संयोग पर,  
 देखै पद एक पर ओर नहिं धसा है।  
 निहचै बिचारकैं सरूपमें संभारि देखी,  
 मेरी तौ अनादिहीकी चिदानंद दसा है॥२७॥  
 ज्ञानकी सकति महा गुपति मई है तौऊ,  
 ज्ञेयकी लखैया जाकी महिमा अपार है।  
 प्रतच्छ प्रतीतिमें परोक्ष कहो कैसें होई,  
 चिदानंद चेतनकौ चिह्न अविकार है।  
 परम अखंड पद पूरन विराजमान,  
 तिहुं लोकनाथ कीएं निहचै विचार है।  
 अखैपद यौ ही एक सासतो निधान मेरे,  
 ज्ञान उपयोगमें सरूपकी संभार है॥२८॥

बहु विसतार कहु कहांलौं बखानियतु,  
 यह भववास जहां भावकी असुद्धता।  
 त्यागि गृहवास है उदास महाव्रत धारें,  
 यह विपरीति जिनलिंग माहिं सुद्धता।  
 करमकी चेतनामैं शुभउयोग सधै,  
 ताहीमैं ममत ताकै तातैं नाहीं सुद्धता।  
 वीतराग देव जाकौ यौही उपदेश महा,  
 यह मोखपद जहां भावकी विशुद्धता॥२९॥  
 ज्ञान उपयोग जोग जाकौन वियोग हूवो,  
 निहचै निहारैं एक तिहुंलोकभूप है।  
 चेतन अनंत चिन्ह सासतौ विराजमान,  
 गतिगति भम्यौ तौऊ अमल अनूप है।  
 जैसें मणिमाहिं कोऊ काचखंड मानै तोऊ,  
 महिमा न जाय वामैं वाहीका सरूप है।  
 ऐसे ही संभारिकैं सरूपकौं विचार्यौं मैने,  
 अनादिकौ अखंड मेरो चिदानंद रूप है॥३०॥

### दोहा ।

चिदानंद आनंदमय, सकति अनंत अपार।  
 अपनौ पद ज्ञाता लखै, जामें नहिं अवतार॥३१॥

### छप्पय ।

सहज परम धन धरन, हरन सब करन भरममल।  
 अचल अमल पद रमन, वमन पर करि निज लहि थल॥  
 अतुल अबाधित आप, एक अविनासी कहिए।  
 परम महासुखसिंधु, जास गुण पार न लहिए॥  
 जोती सरूप राजत विमल, देव निरंजन धरम धर।

निहचै सरुप आतम लखै, सो शिवमहिला होय वर॥३२॥

### अथ बहिरात्मा कथन

मुनिलिंग धारि महाव्रतकौ सधैया भयौ,  
 आप बिनु पाए बहु कीनी सुभकरणी।  
 यतिक्रिया साधिकै समाधिकौ न जानै भेद,  
 मुढमति कहै मोक्षपदकी वितरणी।  
 करमकी चेतनामै सुभ उपयोग रीति,  
 यह बिपरीति ताहि कहै भवतरणी।  
 ऐसे तौ अनादिकी अनंद रीति गहि आयौ,  
 क्रिया नहिं पाई ज्ञानभूमिअनुसरणी॥३३॥  
 सुभउपयोगसेती जैसे पुण्यबंध होय,  
 पात्तरकौ दान दीयै भोगभूमि जाइये।  
 सतसंगसेती जैसे हितकौ सरुप सधै,  
 थिरताकें आएँ जैसे ज्ञानकौ बढाइये।  
 गृहवासत्याग सो उदासभाव कीये होय,  
 भेदज्ञान भावमें प्रतीति आप भाइये।  
 कारणतैं कारिजकी सिद्धि है अनादिहीकी,  
 आतमीकज्ञानतैं अनंत सुख पाइये॥३४॥  
 जामैं परवेदना उछेदना भई है महा,  
 वेदै निज आतमपद परम प्रकासतौ।  
 अनाकुल आत्मीक अतुल अतेंद्री सुख,  
 अमल अनूप करै सुखकौ विलासतौ।  
 महिमा अपार जाकी कहाँलौं बखानै कोय,  
 जाहीके प्रभाव देव चिदानंद भासतौ।  
 निहचै निहारिकै सरुपमें सँभारि देख्यौ,

स्वसंवेदज्ञान है हमारौ रुप सासतौ॥३५॥  
 परम अनंत गुण चेतनाकौ पुंज महा,  
 वेदतु है जाके बल ऐसौ गुणवान है।  
 सासतौ अखंड एकद्रव्य उपादान सो तौ,  
 ताहीकरि सधै यामैं और न विनान है।  
 जाहीके सुभावतैं अनंतसुख पाइयतु,  
 जाहीकरि जान्यौ जाय देव भगवान है।  
 महिमा अनंत जाकी ज्ञानहीमें भासतु है,  
 स्वसंवेदज्ञान सोही पदनिरवान है॥३६॥  
 रागदोष मोहके विभाव धारि आयौ तौउ, निहचै  
 निहारि नाहिं परपद गह्यो है।  
 एक ज्ञानजोतिकौ उद्योत यौ अखंड लीयें,  
 कहा भयौ जो तौ जगजालमाहिं बह्यौ है।  
 महा अविकारी सुद्धपद याकौ ऐसौ जैसे,  
 जिनदेव निजज्ञानमाहिं लहलह्यो है।  
 ज्ञायक प्रभामैं द्वैतभाव कोऊ भासै नाहिं,  
 स्वसंवेदरुप यौं हमारो बनि रह्यो है॥३७॥  
 ज्ञान उपयोग ज्ञेयमाहिं दे अनादिहीकौ,  
 करि अरुझार आप एक भूलि बह्यौ है।  
 अमल प्रकाशवत मूरतिस्थौं बँधि रह्यौ,  
 महा निरदोष तातैं परहीमें फह्यौ है।  
 ऐसे है रह्यौ है तौऊ अचल अखंडरुप,  
 चिदरुपपद मेरो देव जिन कह्यौ है।  
 चेतना निधानमें न आन परवेस कोऊ,  
 स्वसंवेदरुप यौ हमारो बनि रह्यौ है॥३८॥

जीव नटै नाट थाट गुण है अनंत भेष,  
पातरि सकति रसरिति विसताराकी।  
चेतना सरूप जाकौ दरसन देखतु है,  
सत्ता मिरदंग ताल परमेय प्याराकी।  
हाव भाव आदिक कटाक्षनकौ खेयवौ जो,  
सुरकौ जमाव सब समकितधाराकी।  
आनंदकी रीति महा आप करै आपहीकौं,  
महिमा अखंड ऐसी आतम अपाराकी॥३९॥  
जैसैं नर कोऊ भेष पशुके अनेक धरै,  
पशु नहीं होइ रहै जथावत नर है।  
तैसैं जीव च्यारिगति स्वांग धरै चिरहीकौं,  
तजै नाहि एक निज चेतनाकौ भर है।  
ऐसी परतीति कीये पाइये परमपद,  
होइ चिदानंद सिवरमणीकौ वर हैं।  
सासतौ सुथिर जहां सुखकौ विलास करै,  
जामैं प्रतिभासैं जेते भाव चराचर है॥४०॥

### दोहा।

निज महिमामैं रत भए, भेदज्ञान उर धारि।  
ते अनुभौ लहि आपकौ, करमकलंक निवारि॥४१॥

### मनहर।

मूरति पदारथ जे भासत मयूर जामैं,  
विकारता उपल मयूर मकरंदकी।  
भावनकी ओर देखे भावना मयूर होइ,  
रहै जथावत दसा नहीं परफंदकी।  
तैसैं परफंदहीमैं परही सौ भासतु हैं,

परही विकार रीति नहीं सुखकंदकी।  
एक अविकार शुद्ध चेतनकी वोर देखैं,  
भासत अनूप दुति देवचिदानंदकी॥४२॥

### मत्तगयन्द सवैया।

मेरो सरूप अनूप विराजत,  
मोहिमैं और न भासत आना।  
ज्ञान कलानिधि चेतन मूरति,  
एक अखंड महासुखथाना॥  
पूरण आप प्रताप लिए,  
जहँ जोग नहीं परके सब नाना।  
आप लखैं अनुभाव भयौ अति,  
देव निरंजनकौ उर ज्ञाना॥४३॥

ज्ञान कला जागी जब पर बुद्धि त्यागी तब,  
आतमीक भावनमैं भयो अनुरागी है।  
पर परपंचन मैं रंचहूं न रति मानै,  
जानै पर न्यारौ जाकै सांची मति जागी है।  
महा भवभारके विकार ते उठाइ दीए,  
भेदज्ञान भावनसौं भयौ परत्यागी है।  
उपादेय जानि रति मानी है सरूपमाहि,  
चिदानंददेवमैं समाधि लय लागी है॥४४॥  
दरसन ज्ञान सुद्ध चारितकौ एक पद,  
मेरो है सरूप चिन्ह चेतना अनंत है।  
अचल अखंड ज्ञान जोति है उद्योत जामैं,  
परम विशुद्ध सब भावमैं महंत है।  
आनंदकौ धाम अभिराम जाकौं आठौं जाम,

अनुभयें मोक्ष कहै देव भगवंत है।  
 सिवपद पाइवेकौ और भांति सिद्धि नाहि,  
 यातैं अनुभयो निज मोक्षतियाकंत है॥४५॥  
 अलख अरुपी अज आतम अमित तेज,  
 एक अविकार सार पद त्रिभुवनमें।  
 चिर ले सुभाव जाकौ समै हू समार्यौ नाहि,  
 परपद आपौ मानि भम्यौ भवबनमें।  
 करम कलोलनिमें डोल्यौ है निशंक महा,  
 पद पद प्रति रागी भयौ तन तनमें।  
 ऐसी चिरकालकी हू विपति बिलाय जाय,  
 नैक हू निहारि देखौ आप निजधनमें॥४६॥  
 निहचै निहारत ही आतमा अनादिसिद्ध,  
 आप निज भूलिहीतैं भयौ व्यवहारी है।  
 ज्ञायक सकति जथाविधि सो तौ गोप्य दर्ई,  
 प्रगट अज्ञानभाव दसा विसतारी है।  
 अपनौ न रूप जानै औरहीसों और मानै,  
 ठानै भवखेद निज रीति न सँभारी है।  
 ऐसै तो अनादि कहौ कहा साध्य सिद्धि अब,  
 नैक हूं निहारौ निधि चेतना तुम्हारी है॥४७॥  
 एक वनमाहिं जैसें रहतु पिशाची दोइ,  
 एक नर ताकौं तहां अति दुख द्यावै है।  
 एक वृद्ध विकराल भाव धरि त्रास करै,  
 एक महा सुंदर सुभावकौं लखावै है।  
 देखि विकराल ताकौ मनमाहिं भय मानै,  
 सुंदरकौं देखि ताकौं पीछैं दौरि धावै है।

ऐसौ खेदखिन्न देखि काहू जन मंत्र दीयौ,  
 ताकौं उर आनि वो निसंक सुख पावै है॥४८॥  
 तैसें याही भव जामैं संपति विपति दोऊ,  
 महा सुखदुखरूप जनकौं करतु है।  
 गुरुदेव दीयौ ज्ञानमंत्र जब जब ध्यावै,  
 तब न सतावै दोऊ दुखको हरतु है।  
 करिकै विचार उर आनिअ अनूप भाव,  
 चिदानंद दरसाव भावकौं धरतु है।  
 सुधा पान कीएं और स्वादको न चाखै कोऊ,  
 कीएं सुध रीति सुधकारिज सरतु है॥४९॥  
 देव जिनराजसे अनादिके बताय आए,  
 तैसौ उपदेश हम कहांलौं वतावैंगे।  
 गहैं पररूप ते सररूपकी चितौनी चुके,  
 अनुभौसों केतेई भवमें भमावैंगे।  
 एतौ हू कथन कीएं लागै जो न उरमाही,  
 तिनसे कठोर नर और न कहावैंगे।  
 कहै दीपचंद पद आदि देकैं कोऊ सुनौ,  
 तत्वके गहैया भव्य भवपार पावैंगे॥५०॥  
 एक गुण सूच्छमकौ एतौ विसतार भयौ,  
 सबै गुण सूच्छम सुभाव जिहि कीने है।  
 एक सत सूच्छमके भेद है अनंत जामैं,  
 अगुरुलाघुताहूकौं सुच्छमता दीने हैं।  
 अगुरुलघुताई सो सारे गुणमाहिं आई,  
 अनंता अनंत भेद सूच्छम यौं लीने है।  
 सबै गुणमाहिं ऐसैं भेद सधि आवत है,

तेही जन पावै दीप चेतनता चीने हैं॥५१॥  
जगवासी अंध यौ तौ बंध्यौ है करमसेती,  
फंद्यौ परभावसौं अनादिकौ कलंक है।  
नर देव तिरजँच नारकी भयौ है जहां,  
अहंबुद्धिहीमें डोल्याँ अति निसंक है।  
करमकी रीति विपरीतिहीसौं प्रीति जातैं,  
रागदोष धारि धारि भयौ बहु बंक है।  
करम इलाजमें न काज कोऊ सिद्ध भयौ,  
अब तू पिछान जीव चेतनाकौ अंक है॥५२॥  
स्वपर विवेक धारि आत्मस्वरूप पावै,  
चिदानंद मूरतिमें जेई लीन भए हैं।  
परसेती न्यारौ पद अचल अखंडरूप,  
परम अनूप आप गुण तेई लए हैं।  
तिहुंलोक सार एक सदा अविकार महा,  
ताकौ भयौ लाभ तातैं दोष दूरि गए हैं।  
अतुल अबाधित अनंत गुणधाम ऐसौ,  
अभिराम अखैपद पाय थिर थए हैं॥५३॥  
राग दोष मोह जाकौ मूल है असुभ सुभ,  
ऐसे जोग भावमें अनादि लागि रह्यौ है।  
भेदज्ञान भावसेती जोगकों निरोधि अति,  
आत्म लखावहीमें निज सुख लह्यौ है॥  
परद्रव्य इच्छा परत्याग भयौ जाही समै,  
आप है अनंत गुणभई जाही गह्यौ है।  
कारण सुकारिजकौ सिद्धि करि याही भांति,  
सासतौ सदैव रहै देव जिन कह्यौ है॥५४॥

आपके लखैया परभावके नखैया रस,  
अनुभौ चखैया चिदानंदकौं चहतु हैं।  
परम अनूप चिदरूपकौ सरूप देखि,  
पेखैं परमात्मको निजमें महतु हैं।  
ज्ञान उर धारि मिथ्यामोहकौ निवारि सब,  
डारि दुख दोष भवपार जे लहतु हैं।  
लोकके सिखरि सुध सासतौं सुथान लहि,  
लोकालोक लखिकैं सरूपमें रहतु हैं॥५५॥  
परपद त्यागि आप पदमाहिं रति मानै,  
जगी ज्ञान जोति भाव स्वसंवेद वेदी है।  
अनुभौ सरूप धारि परबाहरूप जाके,  
चाखत अखंड रस भ्रमकौ उछेदी है॥  
त्रिकालसंबंधि जब द्रव्य-गुण-परजाय,  
आप प्रतिभासै चिदानंदपद भेदी है॥  
महिमा अनंत जाकी देव भगवंत कहैं, सदा रहै,  
काहूपै न जाय सो न खेदी है॥५६॥  
जगमें अनादिहीकी गुप्त भई है महा,  
लुपतसी दीसै तौऊ रहै अविनासी है।  
ऐसी ज्ञानधारा जब आपहीकौं आप जाने,  
मिटै भ्रमभाव पावै सुखरासी है॥  
अचल अनूप तिहुंलोकभूप दरसावै,  
महिमा अनंत भगवंत देव वासी है।  
कहै दीपचंद सो ही जयवंत जगतमें,  
गुणकौ निधान निज ज्योतिकौ प्रकासी है॥५७॥  
मेरे निज स्वारथकौं मैं ही उर जानत हौं,

कहिवेकों नाहिं ज्ञानगग्य रस जाकौ है।  
 स्वसंवेद भावमें लखाव ह्वै सरूपहीकौ,  
 अनाकुल अतेंद्री अखंड सुख ताकौ है।  
 ताकी प्रभुतामें प्रतिभासित अनंत तेज,  
 अगम अपार समैसारपद वाकौ है।  
 सुद्धदिष्टि दीएं अवलोकन ह्वै आपहीकौ,  
 अविनासी देव देखि देखै पद काकौ है॥५८॥

अतम दरब जाकौ कारण सदैव महा,  
 ऐसौ निज चेतनमें भाव अविकारी है।  
 ताहिकी धरणहारी जीवन सकति ऐसी,  
 तासों जीव जीवें तिहुलोक गुणधारी है।  
 द्रव्य गुण परजाय एतौ जीवदसा सब,  
 इनहीमें वस्तु जीव जीवनता सारी है।  
 सबकौ अधार सार महिमा अपार जाकौ,  
 जीवन सकति दीप जीव सुखकारी है॥५९॥

दरसन-गुण जामें दरसि सकति महा,  
 ज्ञायक सकति ज्ञानमाहीं सुखदानी है।  
 अतुल प्रताप लीएँ प्रभूत्व सकति सोहै,  
 सकति अमूरति सो अरूपी बखानी है।  
 इत्यादि सकति जे हैं जीवकी अनंत रूप,  
 तिन्हें दिढ़ राखिवेकौ अति अधिकानी है।  
 बीरज सकति दीप भाएं निज भावनमें,  
 पावन परम जातैं होई सिवथानी है॥६०॥

तिहुंकाल विमल अमूरति अखंडित है,  
 आकरती जाकी परजाय कही व्यंजनी।

अचल अबाधित अनूप सदा सासती है,  
 परदेस असंख्यात धरै है अभंजनी।  
 विकल्प भावकौ लखाव कोउ दीसै नाहिं,  
 जाकी भवि जीवनकै रुचि भव-भंजनी।  
 महा निरलेप निराकार है सरूप जाकौ,  
 दरसि सकति ऐसी परम निरंजनी॥६१॥

सकति अनंत जामें चेतना प्रधानरूप,  
 ताहूमें प्रधान महा ज्ञायक सकति है।  
 परम अखंड बृहमंडकी लखैया सो है,  
 सूक्ष्म सुभाव यों सहजहीकी गति है।  
 सुपर प्रकासनी सुभासनी सरूपकी है,  
 सुखकी विलासनी अपाररूप अति है।  
 उपयोग साकार बन्यौ है सरूप जाकौ,  
 ज्ञानकी सकति दीप जानैं सांची मति है॥६२॥

सुसंवेद भावके लखाव करि लखी जाहै,  
 सबहीका पाहै कहांलौ कहीजिये।  
 अचल अनूप माया सास्वती अबाधित है,  
 अतिंद्री अनाकुलमें सुरस लहीजिये।  
 अविनाश-रूप है सरूप जाकौ सदाकाल,  
 आनंद अखंड महा सुधापान कीजिये।  
 ऐसी सुख सकति अनंत भगवंत कही,  
 ताहीमें सुभाव लखि दीप चिर जीजिये॥६३॥

सत्ताके अधार ए विराजत हैं सबै गुण,  
 सत्तामाहिं चेतना है चेतनामें सत्ता है।  
 दरसन ज्ञान दोऊ एऊ भेद चेतनाके,



चेतना सरूपमें अरूप गुण पत्ता है।  
 चेतना अनंत गुण रूपतैं अनंतधा है,  
 द्रव्य परजाय सोऊ चेतनका नत्ता है।  
 जडके अभावमें सुभाव सुध चेतनाकौ,  
 यातैं चिद सकतिमें ज्ञानवान रत्ता है॥६४॥  
 सूच्छम सुभावकौ प्रभाव सदा ऐसौ जिहि,  
 सबै गुण सूच्छम सुभाव करि लीने हैं।  
 बीरज सुभावकौ प्रभाव भयौ ऐसौ तिहि,  
 अपने अनंत बल सबहीकौ दीने है।  
 परम प्रताप सब गुणमें अनंत ऐसैं,  
 जानैं अनुभवी जे अखंड रस भीने हैं।  
 अचल अनूप दीप सकति प्रभुत्व ऐसी,  
 उरमें लखावै ते सुभाव सुध कीने है॥६५॥  
 अगुरुलधुत्वको विभूति है महत महा,  
 सब गुण व्यापिकै सुभाव एक रूप है।  
 ऐसे गुण गुणनिमें विभूति बखानियतु,  
 जानियतु एक रूप अचल अनूप है।  
 निज निज लक्षणकी सकति है न्यारी न्यारी,  
 जिही विसतारी जामैं भाव चिदरूप है।  
 कहै दीपचंद सुख कहूं मैं सकति ऐसी,  
 विभूति लखेतैं जीव जगतको भूप है॥६६॥  
 सकल पदारथकी अवलोकनि सामान्य,  
 करै है सहज सुधाधारकी चरसनी।  
 जामै भेद भावकौ लखाव कोउ दीसै नाहि,  
 देखै चिदजोति शिवपदकी परसनी।

सकति अनंती जेती जाहीमें दिखाई देत,  
 महिमा अनंत महा भासत सुरसनी।  
 कहै दीपचंद सुख कंदमें प्रधान-रूप,  
 सकति बनी है ऐसी सरव दरसनी॥६७॥  
 सकल पदारथकौ सकल विशेष भाव,  
 तिनकौ लखाव करि ज्ञान जोति जगी है।  
 आतमीक लच्छनकी सकति अनंत जेती,  
 जुगपद जानिवेकौ महा अति वगी है।  
 सहज सुरस सुसंवेदहीमै आनंदकी,  
 सुधाधार होइ सही जाकै फरस (?) पगी है।  
 परम प्रमाण जाकौ केवल अखंड ज्ञान,  
 महिमा अनंत दीप सकति सरबगी है॥६८॥  
 आतम अरूपी परदेसकौ प्रकास धरै,  
 भयौ ज्ञेयाकार उपयोग समलीन है।  
 लक्षण है जाको ऐसो विमल सुभाव ताकौ,  
 वस्तु सुद्धताई सब वाहीकै अधीन है।  
 जथारथ भावकौ लखाव लिए सदाकाल,  
 द्रव्यगुण परजाय यह भेद तीन है।  
 कहै दीपचंद ऐसी स्वच्छ है सकति महा,  
 सो ही जिय जानै जाकै सुखकी कमी न है॥६९॥  
 अनंत असंख्य संख्य भाग वृद्धि होय जहां,  
 संख्य सु असंख्य सु अनंतगुणी वृद्धि है।  
 एऊष्ट भेद वृद्धि निज परिणाम करै,  
 लीन होइ हानि सो ही करै व्यक्त सिद्धि है।  
 परणति आपकी सरूपसौं न जाय कहूं,

चिदानंद देव जाके यहै महा ऋद्धि है।  
 सकति अगुरुलघु महिमा अपार जाकी,  
 कहै दीपचंद लखै सब ही समृद्धि है॥७०॥  
 दरब सुभावकरि ध्रौव्य रहै सदाकाल,  
 व्यय उतपाद सो ही समै २ करै है।  
 सासतौ खिणक उपादान जानै पाईयतु,  
 सोही वस्तु मूल वस्तु आपहीमें धरै है।  
 द्रव्य गुण परजैकी जीवनी है याही यातैं,  
 चेतना सुरसकौ सुभाव रस भरै है।  
 कहै दीपचंद यौ जिनेंदकौ बखान्यौ बैन,  
 परिणाम सकतिकौ भव्य अनुसरै है॥७१॥  
 काहू परकार काहू काल काहू खेतरमें,  
 ह्वै है न विनाश अविनासी ही रहतु है।  
 परम प्रभाव जाकौ काहूपै न मेटयौ जाय,  
 चेतना विलासके प्रकासकौ गहतु है।  
 आन अवभाव जामैं आवत न कोउ जहां,  
 अतुल अखंड एक सुरस महतु है।  
 असंकुचित विकास सकति बनी है ऐसी,  
 कहै दीप ज्ञाता लखि सुखकौ लहतु है॥७२॥  
 गुण परजाय गहि बण्यौ है सरुप जाकौ,  
 गुण परजाय बिनु द्रव्य नाहि पाईये।  
 द्रव्यकौ सरुप गहि गुण परजाय भये,  
 द्रव्यहीमें गुण परजाय ये बताईये।  
 सहज सुभाव जातैं भिन्न न बतायौ द्रव्य,  
 विन ही वस्तु कैसैं ठहराईये।

तातैं स्यादवाद विधि जगमें अनादिसिद्ध,  
 बचनके द्वारि कहो कहां लागि पाईये॥७३॥  
 गुणके सरुपहीतैं द्रव्य परजाय ह्वै है,  
 केवलीउकति धुनि ऐसैं करि गावै है।  
 द्रव्य गुण दोऊ परजायहीमें पाईयतु,  
 द्रव्यहीमें गुण परजाय ये कहावै है।  
 यातैं एक २ में अनेक सिद्धि होत महा,  
 स्यादवादद्वारि गुरुदेव यौ बतावै है।  
 कहै दीपचंद पद आदि देके कोऊ सुनो,  
 आप पद लखें भवि भवपार पावै है॥७४॥  
 एक गुणसेती दूजे गणसौं लगाय भेद,  
 सधत अनंतवार सात भंग नीके हैं।  
 एक २ गुणसेती अनंता अनंतवार,  
 साधत अनंत लागि लगैं नाहि फीके हैं।  
 अनंता अनंतवार एक २ गुणसेती,  
 साधिए सपतभंग भेदिये सुहीके हैं।  
 यातैं चिदानंदमें अनादिसिद्ध सुद्धि महा,  
 पूरण अनंत गुण दीप लखे जीके हैं॥७५॥  
 गुण एक २ जाके परजै अनंत कहे,  
 प्रजैमै अनंतानंत नाना विसतर्यौ है।  
 नानामैं अनंत थट थटमैं अनंत कला,  
 कलाजिं अखंडित अनंतरुप धर्यौ है।  
 रुपमैं अनंत सत्ता सत्तामैं अनंत भाव,  
 भावकौ लखाव हू अनंत रस भर्यौ है।  
 रसके सुभावमें प्रभाव है अनंत दीप,



सहज अनंत यौ अनंत लगी कयौ है ॥७६॥  
 दरवस्वरूप सो तो द्रव्यमाहिं रहै सदा,  
 औरकों न गहै रहै जथारथताई है।  
 गुणकौ स्वरूप गुणमाहिं सो विराज रहै,  
 परजाय दसा वाकी वाहीमाहिं गाई है।  
 जैसौ गुण जाकौ जाकौ जाही भांति करै और,  
 विषमता हरै वामैं ऐसी प्रभुताई है।  
 तत्त्व है सकति जामैं विभुत्व अखंड तामैं,  
 कहै दीप ऐसैं जिनवाणीमें दिखाई है ॥७७॥  
 जाकै देस देसमें विराजित अनन्त गुण,  
 गुणमाहिं देस असंख्यात गुण पाइए।  
 एक एक गुणनिमें लक्षण है न्यारो न्यारो,  
 सबनकी सत्ता एक भिन्नता न गाइए।  
 परजाय सत्तामाहिं व्यय उत्तपाद ध्रुव,  
 षटगुणी हानि वृद्धि ताहीमें बताइए।  
 निहचै स्वरूप स्वके द्रव्य गुण परजाय,  
 ध्यावौ सदा तातैं जीव अमर कहाइए ॥७८॥  
 गुण एक एकमें अनेक भेद ल्यायकरि,  
 द्रव्य गुण परजाय तीनों साधि लीजिए।  
 नय उपचार और नयकी विविक्षा साधि,  
 ताही भांति द्रव्यमाहिं तीनों भेद कीजिए।  
 परजाय परजायमाहिं मुख्य द्रव्य सो है,  
 याही रूप गुण तीनों यामैं साधि दीजिए।  
 याही भांति एककर अनेक भेद सबै साधि,  
 देखि चिदानंद दीप सदा चिर जीजिए ॥७९॥

आप सुद्ध सत्ताकी अवस्था जो स्वरूप करै,  
 सो ही करतार देव कहै भगवान है।  
 परिणाम जीवहीको करम करावै यातैं,  
 पणति क्रिया जाकौ जानै सो ही जान है।  
 करता करम क्रिया निहचै विचार देखैं,  
 वस्तुसौं न भिन्न होइ यहै परमान है।  
 कहै दीपचन्द ज्ञाता ज्ञानमें विचारै सो ही,  
 अनुभौ अखंड लहि पावै सुखथान है ॥८०॥  
 गुणकौ निधान अमलान है अखंडरूप,  
 तिहूँलोकभूप चिदानन्द सो दरसि है।  
 जामैं एक सत्तारूप भेद त्रिधा फैलि रह्यौ,  
 जाके अवलोकैं निज आनन्द वरसि है।  
 द्रव्यहीतैं नित्य परजायतै अनित्य महा,  
 ऐसैं भेद धरिकै अभेदता परसि है।  
 कहिए कहांलौं जाकी महिमा अपार दीप,  
 देव चिदरूपकी सुभावता सरसि है ॥८१॥  
 सहज आनन्दकन्द देव चिदानन्द जाकौ,  
 देखि उरमाहिं गुणधारी जो अनन्त है।  
 जाके अवलोकैं यौ अनादिकौ विभाव मिटै,  
 होय परमात्मा जो देव भगवन्त है।  
 सिवगामी जन जाकौं तिहूंकाल साधि साधि,  
 वाहीकौ स्वरूप चाहै जेते जगि सन्त है।  
 कहै दीप देखि जो अखंड पद प्रभुकौ सौ,  
 जातैं जगमाहिं होय परम महन्त है ॥८२॥  
 आतम करम दोऊ मिले हैं अनादिहीके,

याहीतैं अज्ञानी ह्वैकैं महा दुख पायौ है।  
 करिकै विचार जब स्वपर विवेक ठान्यौ,  
 सबै पर भिन्न मान्यौ नाहिं अपनायौ है।  
 तिहुंकाल शुद्धज्ञान-ज्योतिकी झलक लीए,  
 सासतौ स्वरूप आपपद उर भायौ है।  
 चेतना निधानमें न आन कहूं आवन दे,  
 कहै दीपचंद संतवंदित कहायौ है॥८३॥  
 आगम अनादिकौ अनादि यौं बतावतु हैं,  
 तिहुंकाल तेरो पद तोहि उपादेय है।  
 याहीतैं अखंड ब्रह्ममंडकौ लखैया लखि,  
 चिदानंद धारै गुणवृंद सोही धेय है।  
 तू तौ सुखसिंधु गुणधाम अभिराम महा,  
 तेरौ पद ज्ञान और जानि सब ज्ञेय है।  
 एक अविकार सार सबमें महंत सुद्ध,  
 ताहि अवलोकि त्यागि सदा पर हेय है॥८४॥  
 याही जगमाहिं ज्ञेय भावकौ लखैया ज्ञान,  
 ताको धरि ध्यान आन काहे पर हेरै है।  
 परके संयोगतैं अनादि दुख पाए अब,  
 देखि तू सँभारि जो अखंड निधि तेरै है।  
 वाणी भगवानकीकौ सकल निचोर यहै,  
 समैसार आप पुन्य पाप नहिं नेरै है।  
 यातैं यह ग्रंथ सिव-पंथको सधैया महा,  
 अरथ विचारि गुरुदेव यौं परे रहैं॥८५॥  
 व्रत तप सील संजमादि उपवास क्रिया,  
 द्रव्य भावरूप दोउ बंधकौं करतु हैं।

करम जनित तातैं करमकौ हेतु महा,  
 बंधहीकौ करैं मोक्षपंथकौं हरतु है।  
 आप जैसो होइ ताकौं आपके समान करै,  
 बंधहीकौ करैं मूल यातैं बंधकौ भरतु हैं।  
 याकौं परंपरा अति मानि करतूति करैं,  
 तेई महा मूढ भव-सिंधुमें परतु हैं॥८६॥  
 कारण समान काज सब ही बखानतु है,  
 यातैं परक्रियामाहिं परकी धरणि है।  
 याहीतै अनादि द्रव्य क्रिया तौ अनेक करी,  
 कछु नाहिं सिद्धि भई ज्ञानकी परणि है।  
 करमकौ वंस जामैं ज्ञानकौ न अंश कोउ,  
 वढे भववास मोक्ष-पंथकी हरणि है।  
 यातैं परक्रिया उपादेय तौ न कही जाय,  
 तातै सदा काल एक बंधकी ढरणि है॥८७॥  
 पराधीन बाधायुत बंधकी करैया महा,  
 सदा विनासीक जाकौ ऐसौ ही सुभाव है।  
 बंध उदै रस फल जीमै च्या-यौं एक रूप,  
 सुभ वा असुभ क्रिया एक ही लखाव है।  
 करमकी चेतनामें कैसैं मोक्षपंथ सधै,  
 मानें तेई मूढ हीए जिनकै विभाव है।  
 जैसो बीज होय ताकौ तैसो फल लागै जहां,  
 यह जग माहिं जिन-आगम कहाव है॥८८॥  
 क्रिया सुभ कीजै पै न ममता धरीजै कहूं,  
 हूजै न विवादी यामैं पूज्य भावना ही है।  
 कीजै पुन्यकाज सो समाज सारो परहीको,

चेतनाकी चाहि नाहि सधै याके याही हैं।  
याकों हेय जानि उपादेयमें मगन हूजै,  
मिटै है विरोध बाद रहै न कहां ही है।  
आठोंजाम आतमकी रुचिमें अनंत सुख,  
कहै दीपचंद ज्ञान भावहू तहां ही है॥८९॥

इति बहिरात्मकथन

### अथ पंचपरमेष्ठी कथन

#### दोहा।

सकल एक परमात्मा, गुण ज्ञानादिक सार।  
सुध परणति परजाय है, श्रीजिनवर अविकार॥९०॥

### छियालीस गुण कथन

#### सवैया।

विमल सरीर जाकौ रुधिर बरण खीर।  
स्वेद तन नाहि आदिसंस्थानधारी है।  
संहनन आदि अति सुन्दर सरूप लीएँ,  
परम सुगंध देह महा सुखकारी है।  
धरै सुभ लक्षणकों हित मित वैन जाके,  
बल है अनंत प्रभु दोषदुखहारी हैं।  
अतिसै सहज दस जनमतेँ होंइ ऐसे,  
तिहुंलोकनाथ भवि जीव निसतारी है॥९१॥  
गगन गमन जाकै होय रात जोजनमें,  
सुरभिक्ष च्यारों दिसि छाया नाहि पाइए।  
नयन पलक नाहि लगै न आहार ताकै,  
सकल परम विद्या प्रभुकै बताइए।

प्राणीकौ न बध उपसर्ग नहि पाईयतु,  
फटिक समान तन महा सुद्ध गाईए।  
केस नख बढै नाहि धातिया करम गएं,  
अतिसै जिनेँदजीके मनमें अनाइए॥९२॥  
सकल अरथ लीएँ मागधीय भाषा जाकै,  
तहां सब जीवनके मित्रता ही जानिए।  
दरपण सम भूमि गंधोदकवृष्टि होय,  
परम आनंद सब जीवकौ बखानिए।  
सब रितु के फल फूल द्वै बनासपति,  
यों न देव भूमिमें जै उजूल (?) यौ मानिए।  
चरणकमल तलि रचहिं कमल सुर,  
मंगल दरब वसु हीयेमें प्रमानिए॥९३॥  
विमल गगन दिसि बाजत सुगंध वायु,  
धान्यकौ समूह फलै महा सुखदानी है।  
चतुरनिकाय देव करत हंकार (?) जहां,  
धर्मचक्र देखि सुख पावै भवि प्रानी है॥  
देवनके कीए यह अतिसै चतुरदस,  
महिमा सुपुण्यकेरी जगमें बखानी है।  
कहै दीपचंद जाकों इंदहूसे आय नमें,  
ऐसौ जिनराज प्रभु केवल सुज्ञानी है॥९४॥  
करत हरण शोक ऐसौ है अशोक-तरु,  
देवनकी करी फूलवृष्टि सुखदाई है।  
दिव्यध्वनिकरि महा श्रवणकों सुख होत,  
सिंहासन सोहै सुर चमर ढराई है।  
भामंडल सोहै सुखदानी सब जीवनकों,

दुंदुभि सुबाजें जहां अति अधिकाई है।  
 त्रिभुवनपति प्रभु यातैं हैं छतर तीन,  
 महिमा अपार ग्रंथ ग्रंथनमें गाई है॥१५॥  
 परम अखंड ज्ञानमाहि ज्ञेय भासत है,  
 ज्ञेयाकार रूप विवहारनै बतायौ है।  
 निहचै निरालो ज्ञान ज्ञेयसौं बखान्यौ जिन,  
 दरसन निराकार ग्रंथनिमें गायौ है।  
 बीरज अनंत सुख सासतौ सरूप लीएँ,  
 चतुष्टै अनंत वीतराग देव पायौ है।  
 जिनकाँ बखानत ही ऐसे गुण प्रापति है,  
 यातै जिनराजदेव दीप उर भायौ है॥१६॥

### दोहा

सकल करमसौं रहित जो, गुण अनंत परधान।  
 किंच ऊन परजाय है, बहै सिद्ध भगवान॥१७॥  
 गुण छतीस भंडार जे, गुण छतीस हैं जास।  
 निज शरीर परजाय है, आचारज परकास॥१८॥  
 पूरवांग ज्ञाता महा, अंगपूरव गुण जानि॥  
 जिह सरीर परजाय है, उपाध्याय सो मानि॥१९॥  
 आठबीस गुणकाँ धरै, आठबीस गुणलीन॥  
 निज सरीर परजाय है, महासाधु परवीन॥१००॥

### सवैया इकतीसा

गुणपरजायजुत द्रव्य जीव जाके गुण,  
 है अनंत परजाय परपरणति है।  
 परमाणू द्रव्यरूप सपरस रस गंध,  
 गुण परजाव षट् वृद्धिहानिवति है।

गति थितिहेतु द्रव्य गतिथिति गुण पर-  
 जाय वृद्धि हानि धर्म अधर्म सुसति (?) है॥  
 अवगाह बरतना हेतु दोउ दरबमें,  
 येही गुण परजाय वृद्धि हानि मति है॥१०१॥  
 संज्वल कषाय थूल उदै मोह सूक्ष्मके,  
 थूल मोह क्षय तथा उपसम कह्यो है।  
 याही करि कारणतै संजमको भाव होय,  
 छट्टा गुणथानमाहि महा लहि लह्यो है।  
 ताकाँ मिथ्यामती केउ मूढ जन मानतु है,  
 नयकी विविक्षा भेद कछू नाहिं गह्यो है।  
 सहज प्रतच्छ शिव-पंथमें निषेध कीने,  
 यहां न विरोध कोउ रचहू न रह्यो है॥१०२॥

### अथ छट्टो भेद सामायिक कथन

सुभ वा असुभ नाम जागैं समभाव करै,  
 भली बुरी थापनामें समता करीजिएँ।  
 चेतन अचेतन वा भलो बुरो द्रव्य देखि,  
 धारिकैं विवेक तहां समता धरीजिएँ।  
 शोभन अशोभन जो ग्राम वनमाहि सम,  
 भले बुरे समै हूं मैं समभाव कीजिएँ।  
 भले बुरे भावनिमें कीजे समभाव जहां,  
 सामायिक भेद षट यह लखि लीजिएँ॥१०३॥  
 करम कलंक लागि आयौ है अनादिहीको,  
 यातैं नहिं पाई ज्ञानदृष्टि परकाशनी।  
 गति गति माहिं परजायहीकाँ आपौ मान्यौ,  
 जानी न सरूपकी है महिमा सुभासनी।

रंजक सुभावसेती नाना बंध करै जहां,  
 परि परफंद थिति कीनी भववासनी।  
 भेदज्ञान भयमें सरुपमें संभारि देखी  
 मेरी निधि महा चिदानंदकी विलासनी॥१०४॥  
 महा रमणीक ऐसौ ज्ञान जोति मेरौ रूप,  
 सुद्ध निज रूपकी अवस्था जो धरतु है।  
 कहा भयौ चिरसौं मलीन ह्वैकै आयौ तौउ,  
 निहचै निहारे परभावन करतु है।  
 मेघ घटा नभ माहि नाना भांति दीसतु है,  
 घटासौं न होय नभशुद्धता बरतु है।  
 कहै दीपचंद तिहुँलोक प्रभुताई लीए,  
 मेरे पद देखें मेरौ पद सुधरतु है॥१०५॥  
 काहै पर भावनमें दौरि २ लागतु है,  
 दसा पर भावनकी दुखदाई कही है।  
 जनमाहिं दुख परसंगतै अनेक सहे,  
 तातैं परसंग तोकाँ त्याग जोगि सही है।  
 पानी के विलोएँ कहु पाईये धिरत नाहि,  
 काच न रतन होय ढूँढौ सब मही है।  
 यातैं अवलोकि देखि तेरे ही सरुपकी सु,  
 महिमा अनंतरुप महा बनि रही है॥१०६॥  
 भेदज्ञानधारा करि जीव पुदगल दोउ,  
 न्यारा न्यारा लखि करि करम विहंडनी।  
 चिदानंद भावकौ लखाव दरसाव कीयो,  
 जामैं प्रति भासै थिति सारी बृहमंडनी।  
 करम कलंक पंक परिहरि पाई महा,

सुद्धज्ञानभूमि सदा काल है अखंडनी।  
 तेई समकिती हैं सरुपके गवेषी जीव,  
 सिवपदरुपी कीनी दसा सुखपिंडनी॥१०७॥  
 आप अवलोकनिमें अगम अपार महा,  
 चिदानंद सुख-सुधाधारकी बरसनी।  
 अचल अखंड निज आनंद अबाधित है,  
 जाकी ज्ञान दशा शिवपदकी परसनी।  
 सकति अनंतकौ सुभाव दरसावै जहां,  
 अनुभौकी रीति एक सहज सुरसनी।  
 घनि ज्ञानवान तेई परम सकति ऐसी,  
 देखी है अनंत लोकालोक की दरसनी॥१०८॥  
 तत्त्व सरधानकरि भेदज्ञान भासतु है,  
 जातै परंपरा मोक्ष महा पाइयतु है।  
 तत्त्व की तरंग अभिराम आठों जाम उटै,  
 उपादेयमाहिं मन सदा लाइयतु है।  
 चिंतन सरुपको अनूप करै रुचिसेती,  
 ग्रंथनमें परतीति जाकी गाइयतु हैं।  
 परमारथ पंथ वा सम्यक व्योहरि नाम,  
 जाकौ उर जानि जानि जानि भाईयतु है॥१०९॥  
 आगम अनेक भेद अवगाहै रुचिसेती,  
 लखिकै रहसि जामैं महा मन दीजिये।  
 अरथ विचारि एक उपादेय आप जानै,  
 पर भिन्न मानि मानि मानिकैं तजीजिए।  
 जामैं जैसौ तत्त्व होय जथावत जानै जाहि,  
 लखि परमारथकाँ ज्ञान-रस पीजिए,



गुनि परमारथ यों भेदभाव भाइयतु,  
 चिदानन्द देवकौ सरुप लखि लीजिए॥११०॥  
 सुद्ध उपयोगी देखि गुणमें मगन होय,  
 जाकौ नाम सुनि हीए हरख धरीजिए।  
 मेरौ पद मोहिमें लखायो जिहि संगसेती,  
 सोही जाकी उरि भाय भावना करीजिए।  
 साधरमी जन जामें प्रापति सरुपकी ह्वै,  
 ताकौ संग कीजै और परिहरि दीजिए।  
 यतिजनभेवा वह जान्यौ भेद सम्यककौ,  
 कहै दीप याकौ लखि सदा सुख कीजिए॥१११॥  
 मिथ्यामती मूढ़ जे सरुपकौ न भेद जानैं,  
 परहीकौ मानै जाकी मानि नहीं कीजिए।  
 महा सिवमारगकौ भेद कहुं पावै नाहि,  
 मिथ्यागम लागे ताकौ कैसें करि थीजिए।  
 अनुभौ सरुप लहि आपमें मगन ह्वै है,  
 तिनहीके संग ज्ञान-सुधारस पीजिए।  
 मिथ्यामग त्यागि एक लागिए सरुपहीमें,  
 आप पद जानि आप पदकौ लखीजिए॥११२॥  
 जाकौ चिदलच्छन पिछानि परतीति करै,  
 ज्ञानभई आप लखि भयौ है हितारथी।  
 राग दोष मोह मेटि भेटयौ है अखंड पद,  
 अनुभौ अनूप लहि भयौ निज स्वारथी।  
 तिहुँलोकनाथ यौ विख्यात गायौ वेदनिमें,  
 तामें थिति कीनी कीनों समकित सारथी।  
 सरुपके स्वादी अहलादी चिदानंदहीके,

तेई सिवसाधक पुनीत परमारथी॥११३॥

### सवैया तेईसा

पैड़ी चढ़ै सुध चाल चलैं,  
 मुक्ताफल अर्थ की ओर ढरै।  
 कंटकलीन कमल लखैं,  
 तिहि दोष विचारिकै त्यागि धरैं।  
 उज्जल वाणि नहीं गुणहानि,  
 सुहावनि रीतिकौ ना विसरै।  
 अक्षर मानसरोवरमाहिं,  
 कितेक विहंग किलोल करै॥११४॥

### कवित्त ।

करतार करता है करता अकरता है,  
 करता अकरताकी रीतिमों रहतु है।  
 मूरतीक मूरतिकी उपेक्षा अमूरती है,  
 सदा चिनमूरतिके भाव सौं सहतु है।  
 एकमै अनेक एक है अनेकमाहिं एक,  
 एकमें अनेक है अनेकता गहतु है।  
 लच्छिनकी लच्छि लीएं परतच्छ छिपाइयतु,  
 कहूं न छिपाइयतु जगमें महतु है॥११५॥  
 है नाही है नाहिं वैनगौचर हू नाही यह,  
 है नाही है नाहीमाहिं तिहुं भेद कीजियैं।  
 स्वपरचतुष्कभेदसेती जहां साधियतु,  
 सोही नयभंगी जिनवाणीमें कहीजिए।  
 स्यातपदसेती सात भंगकौ सरुप साधै,

परमाणु भंगीसों अभंग साधि लीजिये।  
 दोउसों रहत सौ तौ दुरनय भंगी कही,  
 यहै तीनभेद सातभंगीके लखीजिये॥११६॥  
 स्वसंवेद ज्ञान अमलान परिणाम आप,  
 आपनकौ दए आप आपहीसों लए हैं।  
 आपही स्वरूप लाभ लहयौ परिणामनिमें,  
 आपहीमें आपरूप ह्वैकैं थिर थए हैं।  
 सासतो खिणक आप उपादान आप करै,  
 करता करम क्रिया आप परणए हैं।  
 महिमा अनंत महा आप धरै आपहीकी,  
 आप अविनासी सिद्धरूप आप भए हैं॥११७॥

### अथ वहिरात्मा-कथन लिख्यते।

मणिके मुकुट महा सिरपै विराजतु हैं,  
 हीए मांहि हार नाना रतनकें पोये हैं।  
 अलंकार और अंग अंग में अनूप बने,  
 सुन्दर सरूप दुति देखैं काम गोए हैं।  
 सुरतरु कुंजनिमें सुरसंध साथ देखैं,  
 आवत प्रतीति ऐसी पुन्य बीज बोए है।  
 करमके ठाठ ऐसैं कीने हैं अनेक बार,  
 ज्ञान बिनु भाए यौ अनादिहीके सोए हैं॥११८॥  
 सुरपरजायनिमें भोग भाव भए जहां,  
 सुख रंग राचौ रति कीनी परभावमें।  
 रंभा हाव भावनिको निरखि निहारि देखैं,  
 प्रेम परतीति भई रमणिरमावमें।  
 देखि देखि देवनिके पुंज आय पाँय परै,

हियमें हरष धरै लगिनि लगावमें।  
 पर परपंचनिमें संचिकै करम भारी,  
 संसारी भयौ फिरै जु परके उपावमें॥११९॥

### छप्पय।

अजर अमर अविलिप्त, तप्त भव भय जहँ नाहीं।  
 देव अनंत अपार, ज्ञानधारक जगमाहीं।  
 जिहि वाइक जग सार, जानि जे भवदधि तरि हैं।  
 गुर निरगंथ महंत, संत सेवा सब करि हैं।  
 देववाणि गुरु परखि यह, करि प्रतीति मनमै धरै।  
 कहै दीपचंद ह्वै बंद सो, अविनासीसुखकौ वरै॥१२०॥

### सवैया इकतीसा।

धरें गुणवृंद सुखकंद है सरूप मेरो,  
 जामें परफंदकौ प्रवेश नाहिं पाइए।  
 देव भगवान चिदानंद ज्ञानजोति लीएं,  
 अचल अनंत जाकी महिमा बताइए।  
 परम प्रतापमें न ताप भव भासतु है,  
 अचल अखंड एक उरमें लखाइए।  
 अनुभो अनूप रसपान लै अमर हूजे,  
 सामतो सुथिर जम जुग जुग गाइए॥१२१॥  
 चेतनाविलास जामें आनन्दनिवास नित,  
 ज्ञान परकास धरें देव अविनासी है।  
 चिदानन्द एक तूही सासतो निरंजन है,  
 महा भयभंजन है सदा सुखरामी है।  
 अचल अखंड शिवनाथनकौ रमैया तू है,  
 कहा भयौ जो तो होय रह्यौ भववासी है।

सिद्ध भगवान जैसौ गुणकौ निधान तू है,  
 निहचै निहारि निधि आप परकासी है॥१२२॥  
 रमणि रमावमाहिं रति मानि राच्यौ महा,  
 मायामैं मगन प्रीति करै परिवारसौं।  
 विषैभोगसौंज विषतुल्य सुधापान जानै,  
 हित न पिछानै वंध्यौ अति भव भारसौं॥१२३॥  
 एक इंद्रिआदि लै असैनी परिजंत जहां,  
 तहां ज्ञान कहां रुक्यौ करम विकारसौं।  
 अबै देव गुरु जिनवाणीकौ संजोग जुयौ,  
 सिवपंथ साधौ करि आत्मविचारसौं।  
 परपद आपौ मानि जगमैं अनादि भम्यौ,  
 पायौ न सरूप जो अनादि सुखथान है।  
 राग दोष भावनिमैं भवथिति बांधी महा,  
 बिन भेदज्ञान भूल्यौ गुणकौ निधान है।  
 अचल अखंड ज्ञानजोतिकौ प्रकाश लीए,  
 घटहीमैं देव चिदानन्द भगवान है।  
 कहै दीपचन्द आय इंदहूसे पाँय परै,  
 अनुभौ प्रसाद पद पावै निरवान है॥१२४॥

### दोहा

चिदलच्छन पहचानतैं, उपजै आनन्द आप।  
 अनुभौ सहज स्वरूपकौं, जामैं पुन्य न पाप॥१२५॥

### कवित्त इकतीसा

जगमैं अनादि यति जेते पद घारि आए,  
 तेऊ सब तिरे लहि अनुभौ निधानकौं।  
 याके बिन पाए मुनिहू सो पद निंदित है,

यह सुख सिंधु दरसावै भगवानकौ।  
 नारकी हू निकमि जे तीर्थकरपद पावैं,  
 अनुभौ प्रभाव पहुंचावै निरवानकौं।  
 अनुभौ अनंत गुणके धरै याहीकौं,  
 तिहुंलोक पूजै हित जानि गुणवानकौं॥१२६॥  
 अनुभौ अखंड रस धाराधर जग्यौ जहां,  
 तहां दुख दावानल रंच न रहतु है।  
 करमनिवास भववास घटा भानवेकौं,  
 परम प्रचंड पौन मुनिजन कहतु है।  
 याकौ रस पीएं फिरि काहूकी इच्छा न होय,  
 यह सुखदानि जगमैं महतु है।  
 आनंदकौ धाम अभिराम यह संतनकौ,  
 याहीके धरैया पद सासतौ लहतु है॥१२७॥  
 आत्म-गवेषी संत याहीके धरैया जे हैं,  
 आपमैं मगन करैं आन न उपासना।  
 विकल्प जहां कोऊ नहीं भासतु है,  
 याके रस भीने त्यागी सब आन वासना।  
 चिदानंद देवके अनंतगुण जेते कहे,  
 जिनकी सकति सब ताहिमाहिं भासना।  
 व्यय उत्तपाद ध्रुव द्रव्य गुण परजाय,  
 महिमा अनंत एक अनुभौविलासना॥१२८॥

### दोहा

गुण अनंतके रस सबै, अनुभौ रसकेमाहिं।  
 यातैं अनुभौ सारिखौ, और दूसरो नाहिं॥१२९॥

### सवैया इकतीसा

जगतकी जेती विद्या भासी कर रेखावत,  
कोटिक जुगांतर जो महा तप कीने हैं।  
अनुभौ अखंड रस उरमें न आयौ जो तौ,  
सिवपद पावै नाहिं पररस भीने हैं।  
आप अवलोकनिमें आप सुख पाईयतु,  
पर उरझार होय परपद चीने हैं।  
तातैं तिहुंलोकपूज्य अनुभौ है आतमाकौ,  
अनुभवी अनुभौ अनूप रस लीने है॥१३०॥

### अडिल्ल ।

परम धरमके धाम जिनेश्वर।  
शिवपद प्रापति हेतु आप उर आनिये॥  
निहचै अरु व्यौहार जिथारथ पाइये।  
स्यादवादकरि सिद्धिपंथ शिव गाइये॥१३१॥

### सवैया इकतीसा

लक्षणके लखें बिनु लक्ष्य नहिं पाईयतु,  
लक्ष्य बिनु लखे कैसें लक्षण लखातु है।  
यातैं लक्ष्य लक्षिनके जानिवेकौं जिनवानी,  
कीजिए अभ्यास ज्ञान परकास पातु है।  
ऐसौ उपदेस लखि कीनौ है अनेक बार,  
तौहू होनहारमाहिं सिद्धि ठहरातु है।  
निहचै प्रमाण कीएं उद्यम विलाय जाय,  
दोउ नैविरोध कहु किम यौ मिटातु है॥१३२॥  
मानि यह निहचैकौ साधक व्यौहार कीजे,

साधकके बाधै कहुं निहचौ न पाइये।  
जद्यपि है होनहार तद्यपि है चिन्ह वाकौ,  
साधि जाको साधन यौ लक्षण लखाइये।  
आए उर रुचि यह रोचक कहावै महा,  
रुचि उर आएं विनुरोचक न गाइये।  
अंतरंग उद्यमतैं आतमीक सिद्धि होत,  
मंदिरके द्वारि जैसें मंदिरमें जाईये॥१३३॥  
प्रकृति गएतैं वह आतमीक उद्यम है,  
सो तौ होनहार भए प्रकृति उठान है।  
नाना गुण गुणी भेद सीख्यौ न सरूप पायौ,  
काल ले अनादि बहु कीनौ जो सयान है।  
यातैं होनहार सार सारै जग जानियतु,  
होनहारमाहिं तातैं उद्यम विणान है।  
चाहौ सोही करो सिद्धि निहचैके आए ह्वै है,  
निहचै प्रमाण यातैं सत्यारथ ज्ञान है॥१३४॥  
तीरथसरूप भव्य तारण है द्वादशांग,  
वाणी मिथ्या होय तौ तौ काहे जिन भासी है।  
जिनवानी जीवनकौ कीनौ उपगार यह,  
याकी रुचि कीएं भव्य पावै सुखरासी है।  
करत उच्छेद याकौ कैसें तत्त्व पाईयतु,  
मोक्षपंथ मिटै जीव रहै भववासी है।  
निहचै प्रमाण तोउ जाही ताही भांति,  
अति अनुभौ दिढायौ गहि दीजिए अध्यासी है॥१३५॥  
यह तौ अनादिहीकौ चाहत अभ्यास कीयौ,  
याकै नहीं सारै पावै कालकी लवधितैं।

जतनके साध्य सिद्धि होती तौ अनादिहीके,  
 द्रव्यलिंग धारे महा अतिही सुविधितैं।  
 काज नहीं सर्यौ तातैं कछू न बसाय याकौ,  
 होनहार भए काज सीझै जथाविधितैं।  
 यासैं भवितव्यतौ सो काहूपै न लंधी जाय,  
 करि है उपाय जो तौ नाना ये विविधितैं॥१३६॥  
 एक नै प्रणाम ह्वै तौ काहैकौं जिनेंद्रदेव,  
 कहै धनि जीवनकौं उद्यम बतावनी।  
 तत्त्वकौं विचार सार वाणीहीतैं पाईयतु,  
 वाणीके उथापे याकी दसा है अभावनी।  
 मोक्षपंथ साधि साधि तिरे जिनवाणीहीतैं,  
 यह जिनवाणी रुचें याकी याकी भली भावनी।  
 याहीके उथापें भली भावनी उथापी जासैं,  
 यह भली भावनी सो उद्यमतैं पावनी॥१३७॥  
 उद्यम अनादिहीके कीए हैं न ओर आयौ,  
 कहुं न मिटायौ दुख जनम मरणकौ।  
 यौं तो केउ बेर जाय जाय गुरुपास जांच्यौं,  
 स्वामी मेरो दुख मेटौ भवके मरणकौ।  
 दीनी उन दीक्षा इनि लीनो भले भावकरि,  
 समै विनु आए काज कैसैं हवै तरणकौ।  
 यातैं कहै विविधि बनायकै उपाय ठानैं,  
 बली काज जानि होनहारकी ठरणकौ॥१३८॥  
 जैसें काहू नगरमें गए विनु काज न हवै,  
 पंथ बिनु कैसैं जाय पहुंचै नगरमें।  
 तैसें विवहार नय निहचैकौ साधतु है,

दीपकउद्योत वस्तु ढूढ लीजै घरमें।  
 साधक उच्छेद सिद्धि कोउ न बतावतु है,  
 नीके मूनिहारि काहै परै जूठी हरमें।  
 अनादि निधान श्रुतकेवली कहत सोही,  
 कीजिए प्रमाण मोखवधू होय करमें॥१३९॥  
 मोक्षबधू ऐसे जो तो याके करमाहिं होय,  
 तौ तो केवलीके वैन सुने है अनादिके।  
 जतन अगोचर अपूरव अनादिकौ है,  
 उद्यम जे कीए जे जे भए सब वादिके।  
 तातैं कहा सांचको उथापतु है जानतु ही,  
 भोरो होय बैठो वैन मेटि मरजादिके।  
 जो तौ जिनवाणी सरधानी है तो मानि मानि,  
 वीतरागवैन सुखदैन यह दादिके॥१४०॥  
 उद्यमके डारे कहूं साध्य सिद्धि कहीं नाहिं,  
 होनहार सार जाको उद्यम ही द्वार है।  
 उद्यम उदार दुखदोषको हरनहार,  
 उद्यममें सिद्धि वह उद्यम ही सार है।  
 उद्यम विना न कहूं भावी भली होनहार,  
 उद्यमकौं साधि भव्य गए भवपार है।  
 उद्यमके उद्यमी कहाए भवि जीव तातैं,  
 उद्यम ही कीजे कीयौ चाहै जो उद्धार है॥१४१॥  
 आडंबर भारतैं उद्धार कहूं भयौ नाहीं,  
 कही जिनवाणीमाहिं आप रुचिं तारणी।  
 चक्री भरतेश जाके कारण अनेक पाप,  
 भए पै तथापि विरयौ दसा आप धारणी।



आनकों उथापि एक जिनमत थाप्यो यों,  
 समंतभद्र तीर्थकर होसी या विचारणी।  
 कारणतैं कारिजकी सिद्धि परिणामहीतैं,  
 भाषी भगवान है अनंत सुखकारणी॥१४२॥  
 करि क्रिया कोरी कहुं जोरीसों मुकति न हवै,  
 सहज सरूप गति ज्ञानी ही लहतु हैं।  
 लहिके एकांत अनेकांतकौ न पायौ भेद,  
 तत्त्वज्ञान पाये विनु कैसेकै महतु हैं।  
 सकल उपाधिमें समाधि जो सरूप जानै,  
 जगकी जुगतिमाहिं मुनिजन कहतु है।  
 ज्ञानमई भूमि चढि होइकै अकंप रहैं,  
 साधक हवै सिद्ध तेई थिर हवै रहतु हैं॥१४३॥  
 अविनाशी तिहुंकाल महिमा अपार जाकी,  
 अनादि निधन ज्ञान उदैकों करतु है।  
 ऐसे निज आतमाकौ अनुभौ सदैव कीजै,  
 करम कलंक एक छिनमें हरतु है।  
 एक अभिराम जो अनंत गुणधाम महा,  
 सुद्ध चिदजोतिके सुभावकों भरतु है।  
 अनुभौ प्रसादतैं अखंड पद देखियतु,  
 अनुभौ प्रसाद मोक्षबधूकों वस्तु है॥१४४॥  
 तिहुंकालमाहिं जे जे शिवपंथ साधतु हैं,  
 रहत उपाधि आप ज्ञान जोतिधारी हैं।  
 देखैं चितमूरतिकों आनँद अपार होत,  
 अविनासी सुधारस पीवैं अविकारी हैं।  
 चेतना विलासकौ प्रकास सो ही सार जान्यौ,

अनुभौ रसिक हवै सरूपके सँभारी है।  
 कहै दीपचन्द चिदानंदकों लखत सदा,  
 ऐसैं उपयोगी आपपद अनुसारी हैं॥१४५॥  
 अलख अखंड जोति ज्ञानकौ उद्योत लीएं,  
 प्रगट प्रकास जाकौ कैसे हवै छिपाईये।  
 दरसन-ज्ञानधारी अविकारी आतमा है,  
 ताहि अवलोकिकैं अनंत सुख पाईये।  
 सिवपुरी कारण निवारण सकल दोष,  
 ऐसैं भाव भएं भवसिंधु तिरि जाईये।  
 चिदानंद देव देखि वाहीमें मगन हूजे,  
 यातैं और भाव कोउ ठौर न अनाईये॥१४६॥  
 करमके बंध जामैं कोउ नाहिं पाईयतु,  
 सदा निरफंद सुखकंदकी धरणि है।  
 सपरस रस गंध रूपतैं रहत सदा,  
 आतम अखंड परदेसकी भरणि है।  
 अक्षसों अगोचर अनंत काल सासती है,  
 अविनासी चेतनाकी होय न परणि है।  
 सकति अभूरती बखानी वीतरागदेव,  
 याके उर जानैं दुखदंदकी हरणि है॥१४७॥  
 कर्म करतूतितैं अतीत है अनादिहीकी,  
 सहज सरूप नही आन भाव करै है।  
 लक्षण सरूपकी नै लक्षण लखावत है,  
 तौऊ भेद भाव रूप नहीं विसतरै है।  
 करता करम क्रिया भेद नहीं भासतु है,  
 अकर्तृत्व सकति अखंड रीति धरै है।

याहीके गवेषी होय ज्ञानमाहिं लखि लीजै,  
याहीकी लखनि या अनंत सुख भरै है॥१४८॥  
करम संजोग भोग भाव नाहि भासतु है,  
पदके विलासकौ न लेस पाईयतु है।  
सकल विभावकौ अभाव भयौ सदाकाल,  
केवल सुभाव सुद्धरस भाईयतु है।  
एक अविकार अति महिमा अपार जाकी,  
सकति अभोकतरि महा गाईयतु है।  
याहीमें परम सुख पावन सधत नीके,  
याहीके सरुपमाहिं मन लाईयतु है॥१४९॥  
पर है निमित्त ज्ञेय ज्ञानकार होत जहां,  
सहज सुभाव अति अमल अकंप है।  
अतुल अबाधित अखंड है सुरस जहां,  
करम कलंकनिकी कोऊ नहीं झंप है।  
अमित अनन्त तेज भासत सुभावहीमें,  
चेतनाकौ चिन्ह जामें कोऊकी न चम्प है।  
परिनाम आत्म सुसकति कहावत है,  
याके रूपमाहिं आन आवत न संप है॥१५०॥  
काहू कालमाहिं पररुप होय नहीं यह,  
सहज सुभावहीसों सुथिर रहतु है।  
आनकाज कारण जे सबै त्यागि दीए जहां,  
कोऊ परकार पर भाव न चहतु है।  
याहीतैं अकारण अकारिज सकतिहीकौं,  
अनादिनिधन श्रुत ऐसैं ही कहतु है।  
परकी अनेकता उपाधि मेटि एकरुप,

याकौं उर जानैं तेई आनन्द लहतु है॥१५१॥  
अपने अनन्त गुण रसकौ न त्यागि करै,  
परभाव नहीं धरै सहजकी धारणा।  
हेय उपादेय भेद कहौ कहां पाइयतु,  
वचनअगोचरमें भेद न उचारणा।  
त्याग उपादान सून्य सकति कहावै यामें,  
महिमा अनन्तके विलासका उधारणा।  
केवली उक्त धुनि रहस रसिक जे हैं,  
याकौ भेद जानैं करैं करम निवारणा॥१५२॥

### दोहा

गुण अनन्तके रस सबै, अनुभौ रसके माहिं।  
यातैं अनुभौ सारिखौ, और दूसरो नाहिं॥१५३॥  
पंच परम गुरु जे भए, जे ह्वैंगे जगमाहिं।  
ते अनुभौ परसादतैं यामैं धोखौ नाहिं॥१५४॥

### सवैया इकतीसा

ज्ञानावरणादि आठकरम अभाव जहां।  
सकल विभवकौ अभाव जहां पाइए।  
औदारिक आदिक सरीरकौ अभाव जहां,  
परकौ अभाव जहां सदा ही बताइए।  
याहीतैं अभाव यह सकति बखानियतु,  
सहज सुभावके अनन्त गुण गाइए।  
याके उर जानैं तत्त्व आतमीक पाईयतु,  
लोकालोक ज्ञेय जहां ज्ञानमें लखाइए॥१५५॥  
दरसन ज्ञान सुख वीरज अनंतधारी,  
सत्ता अविकारी ज्योति अचल अनंत है।

चेतना विलास परकास परदेशनिमें,  
 बसत अखंड लखै देव भगवंत है।  
 याहीमें अनूप पद पदवी विराजतु है,  
 महिमा अपार याकी भाषत महंत है।  
 सहज लखाव सदा एक चिदरूप भाव,  
 सकति अनंती जानै वंदै सब संत हैं॥१५६॥  
 परजाय भावकौ अभाव समै समै होय,  
 जलकी तरंग जैसे लीन होय जलमें।  
 याही परकार करै उतपाद व्यय धरै,  
 भावकौ अभाव यहै सकति अचलमें।  
 सहज सरूप पद कारण वखानी महा,  
 वीतराग देव भेद लह्यौ निज थलमें।  
 महिमा अपार याकी रुचि कीए पार भव,  
 लहै भवि जीव सुख पावै ज्ञान कलमें॥१५७॥  
 अनागत काल परजाय भाव भए नाहि,  
 तेई समै समै होय सुखकौ करतु हैं।  
 याहीतैं अभाव भाव सकति बखानियतु,  
 अचल अखंड जोति भावकौ भरतु हैं।  
 लच्छनिमें लक्षण लखाइयतु याकौ महा,  
 याकै भाव अविनाशी रसकौ धरतु हैं।  
 कहिये कहांलौ याकी महिमा अपार रूप,  
 चिदरूप देखैं निजगुण सुधरतु हैं॥१५८॥  
 परकौ अभाव जो अतीत काल हो आयौ,  
 अनागत कालमें हू देखिए अभाव है।  
 भाव नहीं जहां ताकौ कहिए अभाव तहां,

ताहीकौ अभाव तातैं कीजे यो लखाव है।  
 अभाव अभाव यातैं सकति बखानियतु,  
 चिदानंद देव जाकौ सांचौ दरसाव है।  
 याहीके लखैया लक्ष्य लक्षणकौ जानतु हैं,  
 याके परसाद अविनासी भाव भाव हैं॥१५९॥  
 काल जो अतीत जामैं जोई भाव ह्वै तौ जहां,  
 सो ही भाव भावमाहि सदाकाल देखिए।  
 यातैं भाव भाव यहै सकति सरूपकी है,  
 महिमा अपार महा अतुल विसेखिए।  
 चिद सत्ता भावकौ लखाव सो है दरवमें,  
 वह भाव गुणनिमें सहज ही पेखिए।  
 यातैं भाव भावकौ सुभाव पावैं तेई धन्य,  
 चिदानंद देवके लखैया जेई लेखिए॥१६०॥  
 स्वयं सिद्धि करता है निज परणामनिकौ,  
 ज्ञान भाव करता स्वभावहीमें कह्यौ है।  
 सहज सुभाव आप करै करतार यातैं,  
 करता सकति सुख जिनदेव लह्यौ है।  
 निहचैं विचारिए सरूप ऐसौ आपहीकौ,  
 याके बिनु जानें भवजालमाहि बह्यौ है।  
 करता अनंत गुण परिणामकेरो होय,  
 ज्ञानी ज्ञानमाहि लखि थिर होय रह्यौ हैं॥१६१॥  
 आतम सुभाव करै करम कहावै सो ही,  
 सुखकौ निधान परमाण पाईयतु है।  
 लक्षण सुभाव गुण पोखत पदारथकौ,  
 ग्रंथ ग्रंथमाहि जस जाकौ गाईयतु है॥

करम सकति काज आतम सुधारतु है,  
 चिदानंद चिह्न महा यों बताइयतु है।  
 लक्षणतैं लक्ष्य सिद्धि कही जिनआगममें,  
 यातैं भाव भावनाकौं भाव भाईयतु है॥१६२॥

आप परिणामकरि आप पद साधतु है,  
 साधन सरुप सो ही करण बखानिए।  
 आप भाव भए आप भवहीकी सिद्धि होत,  
 और भाव भए भावसिद्धि नहीं मानिए।  
 कारण सकति करै एकमें अनेक सिद्धि,  
 एक है अनेकमाहिं नीकैं उर आनिए।  
 निहचै अभेद कीएं भेद नाहीं भासतु है,  
 ज्ञानके सुभाव करि ताकौ रुप जानिए॥१६३॥

आपने सुभाव आप आपनकौं दए आप,  
 आप लै अखंड रसधारा बरसावै है।  
 संप्रदान सकति अनंत सुखदायक है,  
 चिदानंद देवके प्रभावकौ बढावै है।  
 याहीमें अनंत भेद नानावत भासतु हैं,  
 अनुभौसुरसस्वाद सहज दिखावैं है।  
 पावत सकति ऐसी पावन परम होय,  
 सारौ जग जस जाकौ जगि जगि गावै है॥१६४॥

आपनौ अखंड पद सहज सुथिर महा,  
 करै आप आपहीतैं यहै अपादान है।  
 सासतौ खिणक उपादान करै आपहीतैं,  
 आप ह्वै अनंत अविनासी सुखथान है।  
 याहीतैं अनूप चिदरुप रुप पाइयतु,

यातैं सब सकतिमें परम प्रधान है।  
 अचल अमल जोति भावकौ उद्योत लीएं,  
 जानै सो ही जान सदा गुणकौ निधान है॥१६५॥

किरिया करम सब संप्रदान आदिककौ,  
 परम अधार अधिकरण कहीजिए।  
 दरसन ज्ञान आदि बीरज अनंत गुण,  
 वाहीके अधार यातैं वामैं थिर हूजिये।  
 याहीकी महतताई गाई सब ग्रंथनिमें,  
 सदा उपादेय सुद्ध आतम गहीजिए।  
 सकति अनंतकौ अधार एक जानियतु,  
 याहीतैं अनंत सुख सासतौ लहीजिए॥१६६॥

परकौ दरब खेत काल भाव चार्यो यह,  
 सदाकाल जामैं पर सत्ताकौ अभाव है।  
 याहीतैं अतत्व महा सकति बखानियतु,  
 अपनी चतुक सत्ता ताकौ दरसाव है।  
 आनकौ अभाव भएं सहज सुभाव ह्वै है,  
 जिनराज देवजीकौ बचन कहाव है।  
 याके उर जानैतैं अनंत सुख पाईयतु,  
 एक अविनासी आप रुपकौ लखाव है॥१६७॥

आतमसरुप जाके कहै हैं अनंत गुण,  
 चिदानंद परिणति कही परजाय है।  
 दोऊ माहिं व्यापिकैं सदैव रहै एक रुप,  
 एकत्व सकति ज्ञानी ज्ञानमें लखाय है।  
 सुखकौ समुद्र अभिराम आप दरसावै,  
 जाकै उर देखै सब दुबिधा मिटाय है।

सहज सुरसकौ विलास यामें पाईयतु,  
 सदा सब संतजन जाके गुण गाय है।।१६८।।  
 एक द्रव्य व्यापिकैं अनेक गुण परजाय,  
 अनेकत्व सकति अनंत सुखदानी है।  
 लक्षण अनेकके विलास जे अनंते महा,  
 करि है सदैव याही अति अधिकानी है।  
 प्रगट प्रभाव गुण गुणके अनंते करै,  
 ऐसी प्रभुताई जाकी प्रगट बखानी है।  
 महिमा अनंत ताकी प्रगट प्रकाशरूप,  
 परम अनूप याकी जगमें कहानी है।।१६९।।  
 देखत सरूपकै अनंत सुख आतमीक,  
 अनुपम द्वै है जाकी महिमा अपार है।  
 अलख अखंड जोति अचल अबाधित है,  
 अमल अरूपी एक महा अविकार है।  
 सकति अनंत गुण धरै हैं अनंते जेते,  
 एकमें अनेक रूप फुरै निरधार है।  
 चेतना झलक भेद धरै हूं अभेदरूप,  
 ज्ञायक सकति जानै जाकौ विसतार है।।१७०।।  
 स्वसंवेद ज्ञान उपयोगमें अनंत सुख,  
 अतिंद्री अनुपम द्वै आपका लखावना।  
 भवकै विकार भार कोऊ नहीं पाईयतु,  
 चेतना अनंत चिन्ह एक दरसावना।  
 ऐसी अविकारता सरूपहीमें सासती है,  
 सदा लखि लीजैं तातैं सिद्धपद पावना।  
 आतमीक ज्ञानमाहि अनुभौ विलास महा,

यह परमारथ सरूपका बतावना।।१७१।।  
 ज्ञान गुण जानै जहां दरसन देखतु है,  
 चारित सुथिर है सरूपमें रहतु है।  
 बीरज अखंड वस्तु ताकौं निहपन्न करै,  
 परम प्रभाव गुण प्रभुता गहतु है।  
 चेतना अनंत व्यापि एक चिदरूप रहै,  
 यह है विभूत ज्ञाता ज्ञानमै लहतु है।  
 महिमा अपार अविकार है अनादिहीकी,  
 आपहीमें जानै जेई जगमें महतु है।।१७२।।  
 सहज अनूप जोति परम अनूपी महा,  
 तिहुँलोकभूप चिदानंद-दशा-दरसी।  
 एक सुद्ध निहचै अखंड परमात्मा है,  
 अनुभौ विलास भयौ ज्ञानधारा बरसी।  
 अपनों सरूप पद पाण्हीतैं पाई यह,  
 चेतना अनंत चिन्ह सुधारस सरसी,  
 अतुल सुभाव सुख लहौ आप आपहीमें,  
 याहीतैं अचल ब्रह्म पदवीकौं परसी।।१७३।।  
 अरुझि अनादि न सरूपकी सँभार करी,  
 पर पदमाहिं रागी भए पग पगमें।  
 चहुँ गतिमाहिं चिर दुःखपरिपाटी सही,  
 सुखकौं न लेश लहौ भय्यौ अति जगमें।  
 गुरुउपदेश पाय आत्म सुभाव लैहै,  
 सुद्धदिष्टि देहै सदा सांचै ज्ञान-नगमें।  
 महिमा अपार सार आपनों सरूप जान्यौ,  
 तेई सिवसाधक है लागे मोक्ष-मगमें।।१७४।।



ज्ञानमई मूरतिमें ज्ञानी ही सुथिर रहै,  
करै नहीं फिरि कहुं आनकी उपासना।  
चिदानन्द चेतन चिमतकार चिन्ह जाकौ,  
ताकौ उर जान्यौ मेटी भरमकी वासना।  
अनुभौ उल्हासमें अनंत रस पायौ महा,  
सहज समाधिमें सरुप परकासना।  
बोध-नाव बैठि भव-सागरकों पार होत,  
शिवकों पहुंच करै सुखकी विलासना॥१७५॥  
ब्रह्मचारी गृही मुनि क्षुल्लक न रुप ताकौ,  
क्षत्री वैस्य ब्राह्मण न सुंदर सरुप है।  
देव नर नारक न तिरजग रुप जाकौ,  
वाकै रुपमाहिं नाहिं कोऊ दोरधूप है।  
रुप रस गंध फांस इनतैं वो रहै न्यारौ,  
अचल अखंड एक तिहुंलोकभूप है।  
चेतनानिधान ज्ञानजोति है सरुप महा,  
अविनासी आप सदा परम अनूप है॥१७६॥  
विधि न निषेध भेद कोउ नहीं पाईयतु,  
वेद न वरण लोकरीति न बताइए।  
धारणा न ध्यान कहुं व्यवहारीज्ञान कह्यौ,  
विकल्प नाहिं कोउ साधन न गाइए।  
पुन्य पाप ताप तेउ तहां नहीं भासतु हैं,  
चिदानन्दरुपकी सुरीति ठहराइए।  
ऐसी सुद्धसत्ताकी समाधिभूमि कही जामें,  
सहज सुभावकों अनंतसुख पाइए॥१७७॥  
विषैसुख भोग नाहीं रोग न विजोग जहां,

सोगको समाज जहां कहिये न रंच है।  
क्रोध मान माया लोभ कोउ नहीं कहै जहां,  
दान शील तपको न दीसै परपंच है।  
करम कलेस लेस लख्यौ नहीं परै जहां,  
महा भवदुःख जहां नहीं आगि अंच है।  
अचल अकंप अति अमित अनंत तेज,  
सहज सरुप सुद्ध सत्ताहीकौ संच है॥१७८॥  
थापन न थापना उथापना न दीसतु है,  
राग द्वेष दोऊ नहीं पाप पुन्य अंस है।  
जोग न जुगति जहां भुगति न भावना है,  
आवना न जावना न करमकौ वंस है।  
नहीं हारि जीति जहां कोऊ विपरीति नाहिं,  
सुभ न असुभ नहीं निंदा परसंस है।  
स्वसंवेदज्ञानमें न आन कोऊ भासतु है,  
ऐसौ बनि रह्यो एक चिदानंद हंस है॥१७९॥  
करण करावणको भेद न बताईयतु,  
नानावत भेस नहीं नहीं परदेस है।  
अधो भध्य ऊरध विसेख नहीं पाईयतु,  
कोउ विकल्पकेरो नहीं परवेस है।  
भोजन न वास जहां नहीं वनवास तहां,  
भोग न उदास जहां भवकौ न लेस है।  
स्वसंवेद ज्ञानमें अखंड एक भासतु है,  
देव चिदानन्द सदा जगमें महेस है॥१८०॥  
देवनके भोग कहुं दीसैं नहीं नारकमें,  
सुरलोकमाहिं नहीं नारककी वेदना।

अंधकारमाहिं कहुं पाइये उद्योत नाहि,  
 परम अणूकेमाहिं भासतु न वेदना।  
 आतमीक ज्ञानमें न पाईये अज्ञान कहुं,  
 वीतराग भावमें सरागकी निषेदना।  
 अनुभौ विलासमें अनंत सुख पाईयतु,  
 भवके विकारताकी भई है उच्छेदना॥१८१॥

आगतैं पतंग यह जलसेती जलचर,  
 जटाके बढायें सिद्धि ह्वै तौ बट धरै हैं।  
 मुंडनतैं उरणिये नगन रहेतैं पशु,  
 कष्टकों सहेतै तरु कहुं नाहि तरैं है।  
 पठनतैं शुक बक ध्यानके किएतैं कहुं,  
 सीझै नाहि सुनै यातैं भवदुख भरै हैं।  
 अचल अबाधित अनुपम अखंड महा,  
 आतमीक ज्ञानके लखैया सुख करै हैं॥१८२॥

तीनसैं तियाल राजू खेलत अनादि आयौ,  
 अरुझि अविद्या माहिं महा रति मानी है।  
 अपनै कल्याणकों न अंगीकार करै कहुं,  
 तत्वसौं विमुख जगरीति सांची जानी है।  
 इंद्रजालवत भोग वंचिकैं विलाय जाय,  
 तिनहीकी चाहि करै ऐसों मूढ प्राणी है।  
 ऐसी परबुद्धि सब छिनहीमें छूटत है,  
 आप पद जानै जौ तौ होय निज ज्ञानी है॥१८३॥

तिहुंलोक चालै जातैं ऐसों वज्रपात परै,  
 जगतके प्राणी सब क्रिया तजि देतु हैं।  
 समकिती जीव महा साहस करत यह,

ज्ञानमें अखंड आप रूप गहि लेतु है।  
 सहज सरूप लखि निर्भय अलख होय,  
 अनुभौ विलास भयौ समतासमेतु हैं।  
 महिमा अपार जाकी कहि है कहांलौं कोय,  
 चेतन चिमतकार ताहीमें सचेतु है॥१८४॥

कमलनी पत्र जैसै जलसेती बंध्यौ रहै,  
 याकी यह रीति देखि नय व्यवहारमें।  
 जलकौ न छीवैं वह जलसौं रहत न्यारौ,  
 सहज सुभाव जाकौ निहचै विचारमें।  
 तैसैं यह आतमा बंध्यौ है परफंदसेती,  
 आपणी ही भूलि आपौ मान्यौ अरुझारमें।  
 पाएं परमारथके परसों न पग्यौ कहुं,  
 आपनौ अनंत सुख करै समैसारमें॥१८५॥

पदमनीपत्र सदा पयहीमें पग्यौ रहै,  
 सब जन जानै वाकै पयकों परस है।  
 अपने सुभाव कहुं पमकों (?) न परसैं है,  
 सहज सकति लीएं सदा अपरस है।  
 तैसैं परभाव यह परसि मलीन भयौ,  
 लियौ नहीं आपसुख महा परवस है।  
 निहचै सरूप परवस्तुकों न परसै है,  
 अचल अखंड चिद एक आप रस है॥१८६॥

जैसैं कुंभकार करमाहिं गारपिड लेय,  
 भाजन बनावै बहु भेद अन्य अन्य है।  
 माटीरूप देखैं और भेद नहीं भासतु है,  
 सहज सुभावहीतैं आपही अनन्य है।

गतिगतिमाहिं जैसें नाना परजाय धरै,  
 ऐसौ है सरूप सौ तौ व्यवहारजन्य है।  
 अन्य संगसेती यह अन्यसौ कहावत है,  
 एकरूप रहै तिहुंलोक कहै धन्य है॥१८७॥

सिंधुमें तरंग जैसें उपजि विलाय जाय,  
 नानावत वृद्धि हानि जामें यह पाईए।  
 अपनै सुभाव सदा सागर सुथिर रहै,  
 ताकाँ व्यय उतपाद कैसै ठहराइए।  
 तैसें परजाय माहिं होय उतपति लय,  
 चिदानन्द अचल अखंड सुद्ध गाईए।  
 परम पदारथमें स्वार्थ सरूपहीकौ,  
 अविनासी देव आप ज्ञानजोति ध्याईए॥१८८॥

चेतन अनादि नव तत्वमें गुपत भयौ,  
 सुद्ध पक्ष देखै स्वसुभावरूप आप है।  
 कनक अनेक वान भेदकाँ धरत तोउ,  
 अपनै सुभावमें न दूसरो मिलाप है।  
 भेदभाव धरहू अभेदरूप आत्मा है,  
 अनुभौ किएतैमिटै भवदुखताप है।  
 जानत विशेष यौ असेष भाव भासतु है,  
 चिदानंद देवमें न कोऊ पुण्य पाप है॥१८९॥

फटिकके हेठि जब जैसें रंग दीजियत,  
 तैसें प्रतिभासै बामें वाहीकौसो रंग है।  
 अपनौ सुभाव सुद्ध उज्जल विराजमान,  
 ताकाँ नहीं तजै और गहै नहिं संग है।  
 तैसें यह आत्माहूँ परमाहिं परही सौ-भासै,

पै सदैव याकौ चिदानंद अंग है।  
 याहीतै अखंड पद पावै जगमाहिं जेई,  
 स्यादवादनय गहै सदा सरबंग है॥१९०॥

### छप्पय ।

परम अनूपम ज्ञानजोति लछमीकरि मंडित।  
 अचल अमित आनंद सहजतै भयौ अखंडित।  
 सुद्ध समयमें सार रहितभवभार निरंजन।।  
 परमात्म प्रभु पाय भव्य करि है भवभंजन।  
 महिमा अनंत सुखसिंधुमें, गणधरादि वंदित चरण  
 शिवतियवर तिहुंलोकपति जय ३ जिनवरसरण

### दोहा ।

सकल विरोध विहंडनी स्यादवादजुत जानि।  
 कुनयवादमतखंडनी, नमों देवि जिनवानि॥१९२॥

### अथ-ग्रंथ-प्रशंसा ।

#### (सवैया इकतीसा)

अलख अराधन अखंड जोति साधनसरूपकी,  
 समाधिको लाखाव दरसावै है।  
 याहीकै प्रसाद भव्य ज्ञानरस पीवतु है,  
 सिद्धसौ अनूप पद सहज लखावै है।  
 परम पदारथके पायवेकाँ कारण हैं,  
 भवदधितारणजहाज गुरु गावै है।  
 अचल अनंत सुख-रतन दिखायवैकाँ,  
 ज्ञानदरपण ग्रंथ भव्य उर भावै है॥१९३॥

## दोहा।

आपा लखवैकौ यहै, दरपणज्ञान गिरंथ।  
 श्रीजिनधुनि अनुसार है, लखत लहै शिवपंथ॥१९४॥  
 परम पदारथ लाभ ह्वै, आनंद करत अपार।  
 दरपणज्ञान गिरंथ यह, कियौ दीप अविकार॥१९५॥  
 श्रीजिनवर जयवंत है, सकल संत सुखदाय।  
 सही परम पदकौ करै, है त्रिभुवनके राय॥१९६॥

इति श्री शाह दीपचन्द्र साधर्मी कृत ज्ञानदर्पण ग्रन्थ समाप्त।  
 ॥ श्रीरस्तु ॥

## स्वरूपानन्द

## दोहा

परमदेव परमात्मा, अचल अखण्ड अनूप।  
 विमल ज्ञानमय अतुल पद, राजत ज्योतिसरूप॥११॥

## सवैया, २३

एक अनादि अनूप वण्यौ नहि,  
 काहू कियो अरु ना विछुरैगौ।  
 या जग के पद ये पर है सब,  
 ना करै ना कर नाहि करैगौ॥  
 वस्तु सो वस्तु अवस्तु न वस्तुसौं,  
 नांही टव्यो अरु नाहि टरैगौ॥  
 आप चिदानन्द के पदकौ सुधव्या,  
 यौ धरै अरु आगूं धरैगौ॥२॥  
 आप अनादि अखण्ड विराजत,  
 काहू पै खण्ड कियो नहीं जै है।  
 जो भव में भटक्यौ तौ उसास तौ,  
 ज्ञानभई पद और न पै है॥  
 चेतन तै न अचेतन ह्वै कहूं,  
 यौ सरधान किये सुख लै हैं॥  
 'दीप' अनूप सरूप महा लखि,  
 तेरौ सदा जग में जस ह्वै है॥३॥

या जग मैं यह न्याय अनादि कौ,  
 काहू की वस्तु कौं कोउ न छीवैं।  
 देह मलीन मैं लीन हवै दीन हवै,  
 देखै महादुख आप सदीवैं॥  
 याकी लगनि करै फिर वै दुख,  
 देखि है या भव माहि अतीवैं।  
 याही तैं आपकी आप गहैं निधि,  
 ज्ञानी सदा सुख अमृत पीवैं॥४॥  
 कोरि अनंत कहो किम तौं कहुं,  
 तू पर कौं मति ना अपनावैं।  
 ईश्वर आपहि आप वण्यौं तुव,  
 लागि पराश्रय क्यौं दुख पावैं॥  
 धारि समान सुसीख धरौं उरि,  
 श्रीगुरुदेव यौं तोहि बतावै।  
 संत अनेक तिरे इह रीति सौं,  
 याके गहैं तू अमर कहावैं॥५॥

### सवैया, ३१

चिर ही तैं देव चिदानंद सुखकंद वणों,  
 धरें गुणवृंद भवफंद न बताइये।  
 महा अविकार रस मैं सार तुम राजत हौं,  
 महिमा अपार कहीं कहां लागि गाइये॥  
 सुख कौं निधान भगवान अमलान एक,  
 परम अखंड जोति उर मैं अनाइये।  
 अतुल अनूप चिदरूप तिहुंलोक भूप,  
 ऐसौ निज आप रूप भावन मैं भाइये॥६॥

### सवैया, २३

आप अनूप सारुप बण्यौ,  
 परभावन कौं तुव चाहत काहै।  
 धरि अमृत मेटन कौ तिस,  
 भाडलीकौ लखि ज्यौं सठ जाहै॥  
 तैसौं कहा न करौ मति भूलि,  
 निधान लखौ निज ल्यौकिन लाहे।  
 लोक के नाथ या सीख लहौ मति,  
 भीख गहौ हित जो तुम चाहै॥७॥  
 तेरौ सारुप अनादि आगूं गहै,  
 है सदा सासतौ सो अबही है।  
 भूलि धरें भव भूलि रह्यौ अब,  
 मूल गहौं निज वस्तु वही है॥  
 अजाणि तैं और ही जाणि गही सुध,  
 वाणिकी हाणि न होय कही है।  
 भौरि भई सुभई वह भोरि,  
 सारुप अबैं सुसंभारि सही है॥८॥  
 तेरी ही वाणि कुं वाणि परी अति,  
 ओर ही तैं कछु ओर गही है।  
 सदा निज भाव कौ द्वै न अभाव,  
 सुभाव लखाव करे ही लही है॥  
 बिना पुन्य पापन कौं भव भाव,  
 अनूपम आप सु आप मही है।  
 भौरि भई सुभई वह भोरि,  
 अबैं सुसारुप संभारि सही है॥९॥



तेरी ही वोर कौं होय धुकै किन,  
 काहै कौं ढूढत जात मही है।  
 है धर में निधि जाचत है पर,  
 भूलि यहै नहीं जात कही है॥  
 तू भगवान् फिरै कहूँ आन,  
 बिना प्रभु जाणि कुवाणि गही है।  
 भोरि भई सुभई वह भोरि,  
 अबै लखि दीप सरूप सही है॥१०॥  
 लागे ही लागे पर माहि पगे,  
 ये सगे लखि कै निज वोर न आये।  
 लोक के नाथ प्रभू तुम आथ,  
 किये पर साथ कहा सुख पाये॥  
 देखौ निहारिकै आप संभारि,  
 अनूपम वै गुण क्यों विसराये।  
 अहो गुणवान् अबै धूरौं ज्ञान,  
 लहा सुख सौं भगवान् बताये॥११॥  
 बानर मूँठि न आपही खोलै,  
 कांच के मंदिर स्वान् भुसायें।  
 भाडली कौं लखि दौरत हैं मृग,  
 नैक नहीं जल देत दिखाये॥  
 सुक नै नलिनी दिढ तैं पकरी,  
 भूलि तैं आपही आप फंदाये।  
 बिनु ज्ञान दुखी भव माहि भये,  
 सो ही सुखी जिहि आप लखाये॥१२॥  
 वारि लखें धन हूँ वरषै,

निजपक्ष में चन्द करै परकासा।  
 रित्तु कौं लखिकै वनराय फलें,  
 जानै समौं पसू हूँ ग्रहै वासा॥  
 सीप हूँ स्वाति नक्षत लखै सुपरै,  
 जल बूंद ह्वै मुक्तविकासा।  
 पूज्य पदारथ यो समौं ना लखै,  
 यौं जग में है अजब तमासा॥१३॥  
 देव चिदानन्द है सुखकन्द,  
 लियें गुणवृन्द सदा अविनासी।  
 आनन्दधाम महा अभिराम,  
 तिहूँ जग स्वामि सुभाव विकासी॥  
 हैं अमलान प्रभू भगवान्,  
 नहीं पर आंन हैं ज्ञान प्रकासी।  
 सरूप विचारि लखें यह सन्त,  
 अनूप अनादि हैं ब्रह्म विलासी॥१४॥  
 नहीं भवभाव विभाव जहां,  
 परमात्म एक सदा सुखरासी।  
 वेद पुराण बतावत हैं जिहिं,  
 ध्यावत हैं मुनि होय उदासी॥  
 ज्ञानसरूप तिहूँ जगभूप,  
 वण्यौं चिदरूप है ज्योतिप्रकासी।  
 सरूप विचारि लखै यह सन्त,  
 अनूप अनादि हैं ब्रह्मविलासी॥१५॥

**सवैया, ३१**

नहीं जहां क्रोध मान माया लोभ है कषाय,

जगतको जाल जहां नही दरसाय हैं।  
 करम कलेस परवेस नहीं पाईयत,  
 जहां भव भोग को संजोग न लखाय हैं।  
 जहां लोक वेद तिया पुरुष नपुंसक ये,  
 बाल वृद्ध जुवान भेद कोउ नही थाय है।  
 काल न कलंक कोउ जहां प्रतिभासतु है,  
 केवल अखंड एक चिदानन्दराय है॥१६॥  
 जहां भव भोग को विलास नहीं पाईयत,  
 राग दोष दोउ जहां मूलि हूं न आय है।  
 जग उत्तपति जहां प्रलै न बताइयत,  
 करम भरम सब दूरि ही रहाय हैं॥  
 साधन न साधना न काहू की अराधना है,  
 निराबाध आप रूप आप थिरथाय हैं॥  
 सहज प्रकास जहां चेतना विलास लीयें,  
 केवल अखंड एक चिदानंदराय हैं॥१७॥  
 मोह की मरोर कौ न जोर जहां भासतु हैं,  
 नाहि परकासतु हैं पर परकासनां।  
 करम कलोल जहां कोउ नहीं आवत हैं,  
 सकल विभाव की न दीसत विकासनां॥  
 आनंद अखंड रस परखै सदैव जहां,  
 होत है अनंत सुखकंद की विलासनां।  
 ज्ञान दिष्टि धारि देखि आप हियै राजतु हैं,  
 अचल अनूप एक चिदानंद भासनां॥१८॥  
 देव नारक ये तिरजग ठाठ सारे सो तो,  
 एक तेरी भूलि ही का फल पावनां।

तू तौ सत चिदानंद आपकौ पिछानै नाहिं,  
 राग दोष मोह केरी करत उपावनां॥  
 पर की कलोल मैं न सहज अडोल पावै,  
 याहीतैं अनादि कीना भव भटकावनां।  
 आनंद के कंद अब आपकौं संभारि देखि,  
 आतमीक आप निधि होय विलसावनां॥१९॥  
 तू ही ज्ञानधारी क्यों भिखारी भयों डोलत हैं,  
 सकति संभारि सिवराज क्यों न करै है।  
 तू ही गुणधाम अभिराम अतिआनंद मैं,  
 आप भूलि का हम हा सब दुख भरै हैं।  
 तू ही चिदानन्द सुखकंद सदा सासतौ हैं,  
 दुखदाई देहसौं सनेह कहा धरै है॥  
 देवन के देव जौ तौ आप तू लखावै आपतौ  
 तौ भव वाधा एक छिन माहि हरै है॥२०॥  
 सहज आनंद सुखकंद महा सासतौ है,  
 तेरौ पद तोही मै विराजत अनूप है।  
 ताही तू विचारि और काहे पर ध्यावत है,  
 परम प्रधान सदा सुद्ध चिदरूप है॥  
 अचल अखंड अज अमर अरूपी महा,  
 अतुल अमल एक तिहुं लोक भूप है।  
 आन धध त्यागि देखि चेतना निधान आप,  
 ज्ञानादि अनंत गुण व्यक्त सरूप है॥२१॥  
 कह्यौ बार बार सार सहज सरूप तेरौ,  
 सुखरासी सुद्ध अविनासी वणि रह्यौ है।  
 दरसन ज्ञान अमलान है अनूप महा,

परम प्रधान भगवान देव कह्यो है।।  
सदा सुखथान करा नायक निधानगुण,  
अतुल अखंड ज्ञानी ज्ञान मांहि गह्यो है।  
ओर तजि भाव यो लखाव करि निहचै मैं,  
स्वसंवेद भमि यो हमारौ हम लह्यो है।।२२।।

### दोहा।

परम अनंत अखंड अज, अविनासी सुखधाम,  
प्रभू वंदत पद निज लहै, गुण अनूप अभिराम।।२३।।  
श्रीजिनवर पद बंदिकै, ध्यान सार अविकार।  
भवि हित काजैं करतु हौ, धरि भवि ह्वैं भवपार।।२४।।

### सवैया, ३१

सिद्धथान मांहि जेते सिद्ध भये ते ते सही,  
आतमीक ध्यान तैं अनूप ते कहाये हैं।  
धारिकैं धरमध्यान सुर नर भले भये,  
आरतिकौ ध्यान धारि तिरजंच थाये हैं।।  
रौद्र ध्यान सेती महा नारकी भये हैं जहां,  
विविध अनेक दुख धोर वीर पाये हैं।  
संसारी मुक्त दोउ भये एक ध्यानहीतैं,  
सुद्धध्यान धारि जो तो स्वगुण सुहाये हैं।।२५।।  
आप अविनासी सुखरासी हैं अनादिहीकौं,  
ध्यान नहीं धर्यौ तातैं फिर्यौ तू अपार है।  
अब तू सयानौं होहु सुगुरु बतावतु हैं,  
आप ध्यान धरै तौ तौ लहैं भवपार हैं।।  
चिदानन्दरूप जाका अविनासी राज दे हैं,

यातैं गुरुदेव यों बखान्यौ ध्यान सार है।  
अतुल अबाधित अखंड जाकी महिमा है,  
ऐसौ चिदानंद पावै याकौं उपकार है।।२६।।  
साम्यभाव स्वारथ जु समाधि जोग चित्तरोध,  
शुद्ध उपयोग की दरणि ढार ढरै है।  
लय प्रसंज्ञात मैं न वितर्क वीचार आवै,  
वितर्क वीचार अस्मि आनंदता करै है।।  
परकौ न अस्मि कहैं परकौ न सुख लहैं,  
आपकौं परखि कै विवेकता कौ धरै है।  
आतम धरम मैं अनंत गुण आतमा के निहचै  
मैं पर पद परस्यौ न परै है।।२७।।

### दोहा।

एक अशुद्ध जु शुद्ध हैं, ध्यान दोय परकार।  
शुद्ध धरै भवि जीव है, अशुद्ध धरै संसार।।२८।।  
शुद्ध ध्यान परसाद तैं, सहज शुद्ध पद होय।  
ताकौ वरणन अब करौं दुख नहीं व्यापै कोय।।२९।।

### सवैया, ३१

प्रथम धरम ध्यान दूजो है सुकलध्यान,  
आगम प्रमाण जामैं भले दोउ ध्यान हैं।  
पदस्थ पिंडस्थ सख रुपस्थ रुपातीत,  
अध्यातम विवक्षा मांहि ध्यान ये प्रमाण हैं।।  
मनकौ निरोध महा कीजियतु ध्यानमांहि,  
यातैं सब जोगनमैं ध्यान बलवान है।  
पौन वसि कीये सेती मन महा वसि होय,

यातैं गुरुदेव कहै पवन विज्ञान हैं॥३०॥  
 परिणाम नै निक्षेप कहैं सब ध्यान कीजै,  
 सब ही उपायन मैं यो उपाय सार है।  
 देवश्रुत गुरु सब तीरथ जु प्रतिमाजी,  
 चिदरूप ध्यान काजै सेवै गुणधार हैं॥  
 विवहार विधा सोहू एकागर तातैं सधै,  
 तातैं ध्यान परधान महा अविकार है।  
 केवली उकति वेद याके गुण गावत हैं,  
 ऐसौ ध्यान साधि सिद्ध होय सुखकार है॥३१॥  
 आज्ञा भगवान की मैं उपादेय आप कह्यो,  
 तामैं थिर हूजै यह आज्ञाविचै ध्यान है।  
 करमकों नास करै जाही के प्रभाव सेती,  
 ताकौ ध्यान कह्यो सुखकारी भगवान हैं॥  
 करमविपाक मै न खेदखिन होय कहूं ऐसैं,  
 निज जानै तीजौ ध्यान परवान है।  
 संसथान लोक लखि लखै निज आतमा कौं,  
 ध्यान के प्रसाद पद पावैं सुखवान हैं॥३२॥  
 दरवि सौं गुण ध्यावै गुणन तैं परजाय,  
 अरथांतर सदा यो भेद कह्यो ध्यान कौं।  
 ज्ञान हौं दरशन हौं शवद सौं शब्दान्तर,  
 अस्मि शब्द रहैं भेद जोगांतर थान कौं॥  
 प्रथक्त्ववितर्क के है भेद ये विचार लीयें,  
 ज्ञानवान जानै भेद कह्यो भगवान कौं।  
 अतुल अखंड ज्ञानधारी देव चिदानंद,  
 ताकौं दरसावैं पद पावैं निरवाणकौं॥३३॥

एकत्वरूप मांहि थिर हव स्वपद शुद्ध,  
 कीजे आप ज्ञान भाव एक निजरूप मैं।  
 धातिकर्म नाश करि केवल प्रकाश धरि,  
 सूक्ष्म हवैं जाग सुख पावैं चिदभूप मैं॥  
 मेटि विपरीत क्रिया करम सकल भानि,  
 परम पद पाय नहीं परै भौ कूप मैं।  
 यातैं यह ध्यान निरवाण पहुंचावत है,  
 अचल अखंड जोति भासत अनूप म॥३४॥  
 मंत्र पद साधि करि महा मन थिर धरि,  
 पदस्थ ध्यान साधतैं स्वरूप आप पाइये।  
 आपनां स्वरूप प्रभुपद सोही पिंडमें,  
 विचारिकैं अनूप आप उरमें अनाइये।  
 समवसरण विभौ सहित लखीजै आप,  
 ध्यानमें प्रतीति धारि महा थिर थाइये।  
 रूप सौं अतीत सिद्धपद सौं जहां ध्यान मांहि,  
 ध्यावै सोही रूपातीत गाइये॥३५॥  
 पवन सब साधिकैं अलख अराधियत,  
 सोही एक साधिनी स्वरूपकाजि कही है।  
 अविनासी आनंद मै सुखकंद पावतेई,  
 आगम विधानतैं ज्यां ध्यान रति लही है॥  
 ध्यान के धरैया भवसिंधु के तिरैया भये,  
 जगत मैं तेऊ धन्य ध्यान विधि चही है।  
 चेतना चिमतकार सार जो स्वरूपही कौ,  
 ध्यान ही तैं पावैं ढूंढि देखौ सब मही है॥३६॥

## दोहा ।

परम ध्यान कौ धारि कै, पावै आप सरूप।  
ते नर धनि है जगत में, शिवपद लहै अनूप॥३७॥  
करम सकल क्षय होत हैं, एक ध्यान परसाद।  
ध्यान धारि उधरे बहुत, लहि निजपद अहिलाद॥३८॥  
अमल अखंडित ज्ञान मैं, अविनासी अविकार।  
सो लहिये निज ध्यानतैं जो त्रिभुवनमें सार॥३९॥

## सवैया, ३१

गुण परिजाय कौ सुभाव धरि भयो द्रव्य,  
गुण परिजाय भये द्रव्य के सुभावतैं।  
परिजाय भाव करि व्यय उत्पाद भये,  
ध्रुव सदा भयो सो तो द्रव्य के प्रभावतैं॥  
व्यय उत्पाद ध्रुव सत्ता ही मैं साधि आये,  
सत्ता द्रव्य लक्षण है सहज लखावतैं।  
याही अनुक्रम परिपाटी जानि लीजियतु,  
पावै सुखधाम अभिराम निज दावतैं॥४०॥  
सहज अनंतगुण परम धरम सो हैं,  
ताहीकौ धरैया एक राजत दरव हैं।  
गुणकौ प्रभाव निज परिजाय शकितैं,  
व्यापियो जितेक गुण आपके सरव हैं॥  
परम अनंतगुण परिजंत सध ऐसैं,  
जानै ज्ञानवान जाकै कछु न गरव है।  
याही परकार उपयोग मांहि सार पद,  
लखि लखि लीजे जगि बडो यो परव है॥४१॥

एक परदेश मैं अनंतगुण राजतु हैं,  
एक गुण मैं शक्ति परजै अनंत है।  
वहै परिजाय काज करै गुण गुणही कौ,  
ऐसौ राज पावै सदा रहै जयवंत हैं॥  
सुख कौ निधान यो विधान है अतीव भारी,  
अविकारी देव जाकौं लखैं सब संत हैं।  
याही परकार शिव सारपद साधि साधि,  
भये हैं अनंत सिद्ध शिवतिया कंत है॥४२॥  
एक गुण सत्ता सो तौं दरवि कौं लक्षण है,  
सो ही गुण सत्तातैं अनंत भेद लया है।  
एक सत वीरजि यो सामान्यविशेषरूप,  
परिजाय भेदतैं अनंत भेद भया है॥  
ऐसी भेद भावनातैं पावना अलख की हैं,  
अलख लखावनेतैं भवरोग गया हैं।  
भव अपहार ही तैं शिवथान मांहि जाय,  
परम अखंडित अनंत सिद्ध थया है॥४३॥  
चरित चखैया ज्ञान स्वपद लखैया महा,  
सम्यक्त्व प्रधान गुण सबें शुद्ध करै हैं।  
दरसन देखि निरविकलप रस पीयें,  
परम अतीन्द्री सुख भोग भाव धरै है॥  
महिमानिधान भगवान शिवथान मांहि,  
सासतौ सदैव रहि भव मैं न परै है।  
ऐसौ निज रूप यो अनूप आप वणि रह्यौ,  
गहैं जेही जीव काज तिनही कौं सरै है॥४४॥  
स्वपद लखावै निज अनुभौ कौं पावैं शिव-थन

माहि जावैं; नहीं आवैं भव जाल मैं।  
 ज्ञानसुख गहैं निज आनंद कौ लहैं अविनासी,  
 होय रहै एक चिदज्योति ख्याल मैं।।  
 ऐसौ अविकारी गुणधारी देखि आपही हैं,  
 आपने सुभाव करि आप देखि हाल मैं।  
 तिहुंकाल माहि संत जेतेक अनंत कहै,  
 ते ते सब तरे एक शुद्ध आप चाल मैं।।४५।।  
 सहज ही बनें तैं आप पद पावना है,  
 ताकै पावै कौ कहि कहैं विषमताई है।  
 आप ही प्रकास करैं कौन पै छिपायो जाय,  
 ताकौं नहीं जानैं यह अजरजिताई है।।  
 आप ही विमुख हवै कै संशय मैं परै मूढ,  
 कहैं गूढ कैसैं लखैं देत न दिखाई है।  
 ऐसी भ्रमबुद्धि कौ विकार तजि आप भजि,  
 अविनासी रिद्धिसिद्धि दाता सुखदाई है।।४६।।  
 देवन कौ देव हवै कै काहे पर सेव करै,  
 टेव अविनासी तेरी देखि आप ध्यान मैं।  
 जानै भववाधा कौ विकार सो विलाय जाय,  
 प्रगटैं अखंड ज्योति आप निजज्ञान मैं।।  
 तामैं थिर थाय सुख आतम लखाय आप,  
 मेटि पुन्य पाप वसैं जीय सिव थान मैं।  
 शिवतिया भोग करि सासतौ सुथिर रहैं,  
 देव अविनासी महापद निरवाण मैं।।४७।।  
 देव अविनासी सुखरासी सो अनादि ही कौं,  
 ज्ञान परकासी देख्यौ एक ज्ञानभाव तैं।

अनुभौ अखंड भयो सहज आनंद लयो,  
 कृतकृत्य भयो एक आतमा लखाव तैं।  
 चिदज्योतिधारी अविकारी देव चिदानंद,  
 भयो परमातमा सो निज दरसाव तैं।  
 निरवाणनाथ जाकी संत सब सेवा करैं,  
 ऐसौ निज देख्यौं निजभाव के प्रभाव तैं।।४८।।  
 अतुल अबाधित अखंड देव चिदानंद,  
 सदा सुखकंद महा गुणवृंद धारी हैं।  
 स्वसंवेदज्ञान करि लीजिये लखाय ताहि,  
 अनुभौ अनूपम हवै दोष दुखहारी हैं।।  
 आप परिणाम ही तैं परम स्वपद मेंटि,  
 लहिये अमल पद आप अविकारी हैं।  
 सहज ही भावना तैं शिव सादि सिद्ध हूजे,  
 यहैं काज कीजै महा यहै सीख सारी हैं।।४९।।  
 सुद्ध चिद ज्योति दुति दीपति विराजमान,  
 परम अखंड पद धरैं अविनासी है।  
 चिदानंद भूप की प्रदेशनमें राजधानी,  
 परम अनूप परमातमा विलासी है।।  
 चेतन सरूप महा मुकति तिया कौ अंग,  
 ताके संग सेती सोही सदा सुखरासी है।  
 निहचै स्वपद देखि श्रीगुरु बतावतु हैं,  
 अहो भवि जो तो निज आनंद उल्हासी है।।५०।।  
 गुण परजायन द्रये तै दरवि कह्यो,  
 द्रव्य द्रयगुण परजायन कौ व्यापै हैं।  
 द्रव्य परजाय द्रय दोउ मिले आप सुख,



होय हैं अनंत ऐसैं केवली आलापै हैं।।  
 अर्थक्रिया कारक ये द्रये तै सधि आवैं,  
 द्रव्य ही गुण परजै कौं द्रव्यत्व ही थापै हैं।  
 ऐसी है अनंत महा महिमा द्रवत्व ही,  
 आतमा द्रवत्वकरि आपही मैं आपै हैं।।५१।।  
 सामान्य विशेषरूप वस्तु ही मैं वस्तुत्व,  
 सोही द्रव्य लीयें सदा सामान्यविशेष हैं।  
 सामान्य विशेष दोउ सब गुण मांहि सधै,  
 परजाय मांहि यातैं सधत अशेष हैं।।  
 द्रवै द्रव्यसामान्य जु भाव द्रवै यो विशेष,  
 सामान्यविशेष सो तौ गुण कौ अलेष हैं।।  
 परजाय परणवै योही है सामान्य ताकौ,  
 गुणन कौं परणवै योही जाकौं शेष हैं।।५२।।  
 सादृश्य स्वरूप सत्ता दोउ भेद सत्ताके,  
 ताहू मैं स्वरूपसत्ता भेद बहु कहै हैं।  
 द्रव्य गुण परजाय भेद तैं वखानी त्रिधा,  
 गुण सत्ता भेद तौं अनंत भेद लहै हैं।।  
 दरसन है दग की ज्ञान हैं सुज्ञान सत्ता,  
 ऐसै ही अनंत गुण सत्ता भेद चहै है।  
 परजाय सत्ता सो तौ राखै परजाय कौं हैं,  
 ऐसे सत्ताभेद लखि ज्ञानी सुख गहे हैं।।५३।।  
 एक परमेय की प्रजाय सो अनंतधा है,  
 तातैं सब गुण योग्य करवे प्रमाण हैं।  
 परमेय बिना परमाण जोग्य नाहि हुते,  
 यातैं परमेय सब गुण मैं प्रधान हैं।।

याही परकार द्रव्य परजाय मांहि देखौ,  
 याहीतैं विशेष महा योही बलवान हैं।  
 याकी विधि जानैं सो प्रमाणें आनंद कौं,  
 सब परमाण करि पावै सुखथान हैं।।५४।।  
 द्रव्य गुण परजाय जैसे ही के तैसे रहै,  
 ऐसौ यो प्रभाव सो अगुरुलघु को कह्यौ।  
 बिना ही अगुरुलघु हलके कै भारी हुते,  
 यातैं नहीं जानौं मरजाद पद ना लह्यौ।।  
 यातैं वस्तु जथावत राखवे कौं कारण हैं,  
 ऐसौं यो अखंड लखि संपुरषा लह्यौ।  
 याहीकै प्रसाद तीनों जथावत याहीतैं,  
 याही कौ प्रताप जगि जैवंतौ वणि रह्यौ।।५५।।  
 द्रव्य गुण परजाय स्वपद के राखवे कौं,  
 वीरज के बिना नहीं सामरथ्य रूप हैं।  
 वीरज ही सेती सब तीनों पद नीके रहै,  
 यातैं बलवान वह वीरज स्वरूप है।।  
 वीरज अधार यह अनाकुल आनंद हू,  
 यातैं यह वीरज ही परम अनूप है।  
 वीरज के भयें ये हू सब निहपन्न भये,  
 यातैं यह वीरज ही सबनकौं भूप है।।५६।।  
 एक परदेस मैं अनंत गुण राजतु हैं,  
 ऐसे ही असंख्य परदेस धारी जीव हैं।  
 दरव कौं सत्ता अरु आकृति प्रदेशनतैं,  
 गुण परकाश है प्रदेश तैं सादीव है।।  
 अर्थक्रियाकारक ये परणति ही तै ह्वै है,

ऐसी परणति ही के परदेश सीव है।  
 गुण परजाय जामें करत निवास सदा,  
 यातै प्रदेशत्व गुण सबन कौ पीव है॥५७॥  
 सबन कौ ज्ञाता ज्ञान लखत सरूप कौ है,  
 दरशन देखि उपजावत आनन्द कौ।  
 चारित चखैया चिदानन्द ही कौ वेदतु है,  
 रसास्वाद लेय पोषें महासुख कन्द कौ॥  
 अनुभौ अखंडरसवश पर्यौ आतमा यो,  
 कहूं नहीं जाय दिढ राखें गुणवृन्द कौ।  
 रसिया सुर सरस रस के जे रसिया है,  
 रस ही सां भर्यौ देखें देव चिदानन्द कौ॥५८॥  
 चक्षु अचक्षु गुण दरशन आतमा कौ,  
 प्रत्यक्ष ही दीसै ताहि कैसै कै निवारिये।  
 कुमति कुश्रुत ये हूं सारे जग जीवनकै,  
 ज्ञेय ज्ञान करै कहूँ कैसै ताहि हारिये।  
 इन्द्रिन की क्रिया ताकौ परेरक आतमा है,  
 मन वच काय वरतावै यो विचारिये।  
 सबही कौ स्वामी अरु नामी जग माहि यो ही,  
 मोक्ष जगि यो ही कहौ ताहि कैसैं हारिये॥५९॥  
 क्रोध मान माया लोभ चारों कौ करैया यो,  
 विषैरस भोगी यो ही भवकौ भरैया है।  
 यो ज्ञान कछु धारि अंतर सु आतमा हवै,  
 यो ही परमातमा हवै शिवकौ वरैया है॥  
 योही गुणथान अरु मारगणा मांहि योही,  
 शुभाशुभ शुद्धपयोग को धरैया है।

ज्ञानी औ अज्ञानी होय वरतै सो ही है,  
 योही ऊँच नीच विधि सबकों करैया है॥६०॥  
 योही है असंजमी सुसंजम कौ धारी योही,  
 योही अणुव्रत महाव्रत कौ धरैया है।  
 यो नट कला खेलै नाटक वणावै योही,  
 योही बहुं सांग लाय सांग कौ करैया है॥  
 योही देव नारक जु तिरजंच मानव हवै,  
 योही गति चारि मांहि चिरकों फिरैया है।  
 योही साधि साधनकों ज्ञान नाव बैठ करि,  
 शुद्धभाव धारि भवसिंधुकौ तिरैया है॥६१॥  
 योही यो निगोद मै अनंतकाल वसि आयो,  
 योही भयो थावर सु त्रस योही भयो है।  
 योही ज्ञान ध्यान मांहि योही कवि चातुरी मै,  
 चतुर हवै बैठौ अरु योही सठ थयो है॥  
 योही कला सीखि कै भयो महा कलाधारी,  
 योही अविकारी अविकार जाकौ आयौ है।  
 योही निरफंद कहूं फंदकों करैया योही,  
 योही देव चिदानन्द ऐसैं परणयो है॥६२॥

### दोहा ।

यह (इस) अनादि संसार मैं, थे अनादि के जीव।  
 पर पद ममता में कहे, उपज्यौ अहित सदीव॥६३॥  
 ता कारण लखि गुरु कहैं, धरम वचन विसतार।  
 ताहि भविक जन सरदहैं, उतरै भवदधि पार॥६४॥  
 परम तत्त्व सरधा कियें, समकित ह्वै है सार।  
 सो ही मूल है धरम कौ, गहि भवि हवै भवपार॥६५॥

देव धरम गुरु तत्व की, सरधा करि व्यवहार।  
समकित यह शिव देतु है, परंपरा सुख धार॥६६॥  
सहज धारि शिव साधिये, यो सदगुरु उपदेस।  
अविनासी पद पाइये, सकल मिटै भव क्लेस॥६७॥  
साधन मुक्ति सरुप कौं, नय प्रमाणमय जानि।  
स्यादवाद कौं मूल यह, लखि साधकता आनि॥६८॥  
गुण अनन्त निज रूप के, शक्ति अनन्त अपार।  
भेद लखै भवि मुक्ति सौं, शिवपद पावै सार॥६९॥

### सवैया, ३१

साधि निज नैगम तैं वर्तमान भाव करि,  
संग्रह स्वरुप तैं स्वरुप कौं गहीजिये।  
गुणगुणीभेद व्यवहार तैं सरुप साधि,  
अलख अराधिकै अखंड रस पीजिये॥  
होय कैं सरल ऋजुसूत्र तैं स्वभाव लीजैं,  
अहं अस्मि शब्द साधि स्वसुख करीजिये।  
अभिरुढ आपमें अनूप पद आप कीजै,  
एवंभूत आप पद आपमें लखीजिये॥७०॥  
स्वपद मनन करि मानिये स्वरुप आप,  
भाव श्रुत धारिकै स्वरुप कौं संभारिये।  
अवधि स्वरुप लखै पाइये अवधिज्ञान,  
मनपरजैतैं मनज्ञान मांहे धारिये॥  
केवल अखंड ज्ञान लोकालोककै प्रमाण,  
सोही हैं स्वभाव निज निहचै विचारिये।  
प्रत्यक्ष परोक्ष परमानतैं स्वरुप कौं,  
सदा सुख साधि दुख द्वंद कौं निवारिये॥७१॥

आप निज नामतैं अनेक पाप दूरि होत,  
सोहं की संभार शिव सार सुख देतु है।  
आकृति स्वरुप की सो थापना स्वरुप की है,  
ज्ञानी उर ध्याय निज आनंद कौ लेतु हैं।  
दरवि कैं देखैं दुख द्वंद सो विलाय जाय,  
याही कौ विचार भवसिंधु ताकौं सेतु है॥  
केवल अखंड ज्ञान भाव निज आपकौ है,  
लोकालोक भासिवे कौं निरमल खेतु है॥७२॥  
द्रव्य क्षेत्र काल भाव आपही कौं आपमें जो,  
लखैं सोही ज्ञानी सुख पावत अपार है।  
संज्ञा अरु संख्या सही लक्षण प्रयोजनकौं,  
आपमें लखावै वहैं करैं सुउधार है॥  
आप ही प्रमाण प्रमेय भाव धारक हैं,  
आप षटकारकतैं जगत में सार है।  
आपही की महिमा अनंतधा अनंतरुप,  
आपही स्वरुप लखि लहैं भवपार है॥७३॥  
एक चिदमूरति स्वभाव ही कौं करता है,  
असंख्यात परदेशी गुणकौं निवासी है।  
जीव परणाम क्रिया करवें कौं कारण है,  
लोकालोक व्यापी ज्ञानभावकौं विकासी है॥  
आनसौं अतीत सदा सासतौ विराजतु है,  
देव चिदानंद जगि जोति प्रकासी है।  
ऐसौ निज आप जाकौं अनुभौ अखंड करै,  
शिवतियानाथ होय रहैं अविनासी है॥७४॥  
शोभित है जीव सदा आनसौं अतीत महा,

आश्रव बंध पुण्य पाप सौ रहत हैं।  
सहज के संवर सौ परकों निवारतु है,  
शुद्ध गुणधाम शिवभावसौ सहत हैं।।  
ऐसी अवलोकनिमें लोकके शिखर परि,  
सासतौ विराजै होय जगमें महतु हैं।  
शिवकै सधैया जाकौ सुखराशि जानि जानि,  
अविनासी मानि मानि जै जय कहतु हैं।।७५।।

### दोहा

अचल अखंडित ज्ञानमय, आनंदधन गुणधाम।  
अनुभौ ताकौ कीजिये, शिवपद ह्वै अभिराम।।७६।।

### छंद

सहज परकास परदेश का वणि रह्या,  
देशही देश में गुण अनंता।  
सत अरु वस्तु बल अगुरु आदि दे,  
सकल गुण मांहि लखि भेद संता।।  
ज्ञान की जगनि में जोति की झलक है,  
ताहि लखि और तजि तंत मंता।  
धारि निज ज्ञान अनुभौ करौ सासतौ,  
पाय पद सही ह्वै मुकति कंता।।७७।।  
सहज ही ज्ञान में ज्ञेय दरसाय हैं,  
वेदि हैं आप आनंद भारी।  
लोक के सिखर परि सासते राजि हैं,  
सिद्ध भगवान आनंदकारी।।  
अमित अदभुत अति अमल गुणकौ लिये,

शुद्ध निज आप सब करम टारी।  
देह में देव परमात्मा सिद्धसौं,  
तास अनुभौ करौ दुखहारी।।७८।।  
सहज आनंद का कंद निज आप है,  
ताप भव रहत पद आप वेवै।  
आपके भाव का आप करता सही,  
आप चिद करम कौ आप सेवै।।  
आप परिणाम करि आपकौ साधि हैं,  
आप आनंदकौ आप लेवै।  
आपतैं आपकौ आप थिर थापि है,  
आप अधिकार की धारि टेवै।  
(आप महिमा महा आपकी आप में,  
आपही आपकौ आप देवै)।।७९।।  
आप अधिकार जानि सार सरवगि कहैं,  
ध्यान में धारि मुनिराज ध्यावै।  
सकति परिपूरि दुख दूरि हैं,  
जासतैं सहज के भाव आनंद पावै।।  
अतुल निज बोध की धारिकै धारणा,  
सहज चिदजोति में लै लगावै।  
और करतूति का खेदको नां करै,  
आपकै सहज धरि आप आवै।।८०।।  
सकल संसार का रूप दुख भार हैं,  
ताहि तजि आपका रूप दरसै।  
मोह की गहलितैं पारकौ निज कह्या,  
त्यागि पर सहज आनंद बरसै।।

आपका भाव दरसावकरि आपमें,  
जोतिकों जानि भव्य परम हरसैं।  
शुद्ध चिदरूप अनुभौ करै सासतौ,  
परम पद पाय शिवथान परसै॥८१॥  
सकल संसार परमांहि आपा धरै,  
आप परिणामकों नाहि धारैं।  
सहज का भाव हैं खेद जामें नहीं,  
आप आनंदकों ना संभारैं॥  
कहै गुरु बैन जो चैन की चाहि हैं,  
राग अरु दोषकों क्यों न टारै।  
त्यागि पर थान अमलान आपा गहैं,  
ज्ञानपद पाय शिवमें सिधारै॥८२॥  
मूढि कपि की कहौ कौन नै पकरी,  
भाडलीकों जल कौन पीवैं।  
कांच के महल में श्वान कहा दूसरौ,  
कूप में सिंह गरजै नहीं वै॥  
जेवरी मैं कहूं नाग नहीं दरसि हैं,  
नलिनि सूवा न पकरयो कहीं वै।  
भूलिके भाव कों तुरत जो मेदि दे,  
पावकैं अमर पद सदा जीवै॥८३॥  
गमन की बात यह दूरि हवै तौ कहूं,  
दुख हवै तौ कहूं सुखी थावौ।  
खेद हवै तौ कहूं नैक विश्राम ल्यौ,  
अलाभ हवै तौ कहूं लाभ पावौ॥  
बंध हवै तौ कहूं मुकतिकौ पद लहौ,

आप मैं कौन है द्वैत दावौ।  
सहज कौ भाव के सदा जो वणि रह्यौं,  
ताहि लखि और को मति उपावौ॥८४॥  
देव चिदरूप अनूप अनादि है,  
देशना गुरु कहैं जानि प्यारे।  
अतुल आनंदमें ज्ञान पद आप है,  
ताप भवकों नहीं है लगारे॥  
आप आनंदके कंदकों भूलिकै,  
भमत जगमांहि यह जंतु सारे।  
आपकी लखनि करि आपही देखि हैं,  
आप परमातमा नाजूवारे॥८५॥  
अलख सबही कहैं लख न कोई कहै,  
आप निज ज्ञानतैं संत पावैं।  
जहां मत नहीं तंत मुद्रा नहीं भासि हैं,  
धारणा की कहाँ कों चलावैं॥  
वेद अरु भेद पर खेद कोऊ नहीं,  
सहज आनंदही कों लखावै।  
आप अनुभौ सुधा आपही पीय कैं,  
आपकों आप लहि अमर थावै॥८६॥

### सवेया, ३१

योही करै करमकों योही धरै धरमकों,  
योही मिश्रभाव नौजु करता कहायो है।  
योही शुभलेश्या धरि सुरग पधार्यो आप,  
योही महापापबांधि नरकि सिधायो है॥  
योही कहूं पातरि नाचत हवै नेक फिर्यो,

योही जसधारी ढोल जसई बजायो है।  
याही परकार जग जीव यो करत काम,  
औसर मैं साधौं शिव श्रीगुरु बतायो है॥८७॥

### अडिल्ल ।

तुम देवन के देव कही भव दुख भरों।  
सहजभाव उर आनि राज शिवकौं करौं।  
जहां महाथिर होय परम सुख कीजिये।  
चिदानंद आनंद पाय चिर जीजिये॥८८॥  
पर परणतिकौं धारि विपति भवकी भरी।  
सहजभावकौं धारि शुद्धता ना करी॥  
अब करिकैं निजभाव अमर आपा करौ।  
अविनासी आनंद परम सुखकौं करौ॥८९॥  
सकल जगतके नाथ सेव क्यौं पर करौं।  
अमल आप पद पाय ताप भव परिहरौं॥  
अतुल अनूपम अलख अखंडित जानिये।  
परमात्म पद देखि परम सुख मानिये॥९०॥  
सही जानि सुखकंद द्वंद दुख हारिये।  
चिनमय चेतन रूप आप उर धारिये।  
पर परणतिकौ प्रेम अवै तज दीजिये।  
परम अनाकुल सदा सहज रस पीजिये॥९१॥

### छप्पय

सहज आप उर आनि अमल पद अनुभव कीजे।  
ज्योति स्वरूप अनूप परम लहि निजरस पीजे॥  
अतुल अखंडित अचल अमितपद है अविनासी।

अलख एक आनंद कंद है नित सुखरासी॥  
सोही लखाय थिर थाय कैं उल्हसि उल्हसि आनंद करैं।  
कहि दीपचंद गुणवृंद लहि शिवतिया के सुख सो वरै॥९२॥

### दोहा

ग्रंथ स्वरूपानंदकौं, लीजै अरथ विचारि।  
सरधा करि शिवपद लहैं, भवदुख दूरि निवारि॥९३॥  
संवत सतरा सौ सही, अरु इकानवै जानि।  
महा मास; सुदि पंचमी, कियो सु सुखकी खानि॥९४॥  
देव परम गुरु उर धरौ, देत स्वरूपानंद।  
'दीप' परम पद कौं लहैं, महा सहज सुख कंद॥९५॥

### इति



## उपदेश सिद्धान्त शुद्ध

### दोहा

परम पुरुष परमात्मा, गुण अनंतके थान।  
 चिदानंद आनंदमय, नमौ देव भगवान्॥१॥  
 अनुपम आत्म पद लख, धरै महा निज ज्ञान।  
 परम पुरुष पद पाइ हैं, अजर अमर लहि थान॥२॥  
 विविध भाव धरि करमके, नाटत ह्वै जगजीव।  
 भेद ज्ञान धरि संतजन, सुखिया हौंहि सदीव॥३॥

### सवैया

करमके उदै केउ देव परजाय पावैं,  
 भोग के विलास जहां करत अनूप हैं।  
 महा पुण्य उदै केउ नर परजाय लहैं,  
 अति परधान बडे होइ जग भूप है॥  
 केउ गति हीन पाय दुखी भये डोलत हैं,  
 राग दोष धारि परैं भव कूप हैं।  
 पुण्यपाप भाव यहैं हेय करि जानत हैं,  
 तेई ज्ञानवंत जीव पावैं निजरूप हैं॥४॥

### दोहा

अतुल अविद्या वसि परे, धरें न आत्मज्ञान।  
 पर परणतिमें पगि रहै कैसैं हवैं निरवान्॥५॥

### सवैया

मानि पर आपौ प्रेम करत शरीर सेती,

कामिनी कनक मांहि करै मोह भावना।  
 लोक लाज लागि मूढ आपनों अकाज करै,  
 जानै नही जे जे दुख परगति पावनां॥  
 परिवार प्यार करि बांधै भवभार महा,  
 बिनुही विवेक करै काल का गमावनां।  
 कहै गुरु ग्यान नांव बैठि भवसिंधु तरि,  
 शिवथान पाय सदा अचल रहावनां॥६॥  
 करम अनेक बांधै चरमशरीर काजि,  
 धरम अनूप सुखदाई नाहि करै हैं।  
 मोह की मरोरतैं न स्वपर विचार पावै,  
 धंधही मै ध्यावै यातें भव दुख भरै है॥  
 आपकौं प्रताप जाकौ करै नही परकाज,  
 सोई तो निगोदमांहि कैसैं अनुसरै हैं।  
 कहै दीपचंद गुणवृंदधारी चिदानंद,  
 आप पद जानि अविनासी पद धरै है॥७॥  
 मेरो देह मेरो गेह मेरो परिवार यह,  
 मेरो मेरो मानै जाकी माननि धरतु है।  
 जगमें अनेक भाव जिनकौ जनैया होत,  
 परम अनूप आप जानि न करतु है॥  
 मोहकी अलट तै अज्ञान भयो डोलतु है,  
 चेतना प्रकाश निज जान्यौ न परतु है।  
 अहंकार आनकौ कीये तै कछु सिद्धि नाहि,  
 आप अहंकार कीये कारिज सरतु है॥८॥  
 सहज संभारि कहा परिमांहि फंसि रह्यौ,  
 जेजे परमानै तेते सब दुखदाई हैं।

विनासीक जड़ महा मलिन अतीव बनें,  
 तिनही की रीति तौकों अतिही सुहाई हैं।।  
 समझि कै देखि सुखदाई भाव भूलतु हैं,  
 दुखदाई मानें कहु होत न बड़ाई है।  
 अरुभयौ अनादिको हैं अजहूं न आवै लाज,  
 काज सुध कीये विनु कोई न सहाई है।।९॥  
 लौकिक के काजि महा लाखन खरच करै,  
 उद्यम अनेक धरै अगनि लगाय कै।  
 महासुख दायक विधायक परमपद,  
 ऐसौ निजधरम न देखै दरसाय कै।  
 एकबार कह्यौ तू हजार बार मेरी मानि,  
 देह कौ सनेह कीये रुलै दुख पाय कै।।  
 आतमीक हित यातैं करणौ तुरत तौकों,  
 और परपंच झूटै करै क्यों उपाय कै।।१०॥  
 तन धन मन ज्ञान च्यार्यौ क्यौ छिनाय लेत,  
 तासौं धरै हेत कहैं मेरी अति प्यारी है।  
 आभूषण आदि वस्तु बहू तै मंगाय देत,  
 विषैसुख हेतु ही तै हिये मांहि धारी है।।  
 महा मोह फंद ताकौ मंद करै चंदमुखी,  
 ताकौ दासातन मूढ करै अति भारी है।  
 आपदा दुवार जाकौ सार जानि जानि रमै,  
 भवदुखकारी ताहि कहै मेरी नारी है।।११॥  
 पर परिणति सेती प्रेम दे अनादि ही कौ,  
 रमै महामूढ यह अति रति मानि कै।

कुमति सखी है जाकी ताकौ फस लियौ डोलै,  
 गति २ मांहि महा आप पद जानि कै।।  
 सहज के पाये बिनु राग दोष ऐंचतु है,  
 पावै न स्वभाव यौ अज्ञान भाव ठानि कै।  
 कहै दीपचंद चिदानंदराजा सुखी होई,  
 निज परिणति तिया घर बैठे आनि कै।।१२॥  
 चिदपरणति नारी है अनंत सुखकारी,  
 ताही कौ बिसारी तातै भयो भववासी है।  
 जाकौ धारि आनि तातैं आप कै संभारै निधि,  
 आतमीक आप केरी महा अविनासी है।  
 भोगवैं अखंड सुख सदा शिवथान मांहि,  
 महिमा अपार निज आनंद विलासी है।  
 कहैं दीपचंद सुखकंद ऐसैं सुखी होय,  
 और न उपाय कोटि रहै जो उदासी है है।।१३॥

### दोहा

सकल ग्रंथ कौ मूल यह, अनुभव करिये आप।  
 आतम आनंद ऊपजे, मिटे महा भव ताप।।१४॥

### सवैया

करि करतूति केउ करम की चेतना मैं,  
 व्यापकता धारि हवै हैं करता करम के।  
 शुभ वा अशुभ जाको आप कै सुफल होत,  
 सुख दुख मानि; भेद लहैं न धरम के।।  
 ज्ञान शुद्ध चेतना मैं करम करम फल,  
 दोऊ नहीं दीसैं भाव निज ही शर्म कै।  
 कहैं दीपचंद ऐसै भेद जानि चेतना के,

चेतना कौ जानै पद पावत परम के॥१५॥  
 वेद के पढे तैं कहा स्मृति हू पढै कहा,  
 पुराण पढे तैं कहा, निज तत्व पायौ है।  
 बहु ग्रंथ पढे कहा, जानै न स्वरूप जो तो,  
 बहोत क्रिया के किये देवलोक थावै हैं॥  
 तप के तपे हूं ताप होत है शरीर ही कौं,  
 चैतना निधान कहूं हाथ नहीं आवै है।  
 कहै दीपचंद सुखकंद परवेस किये,  
 अमर अखंड रूप आत्मा कहावै हैं॥१६॥  
 वेद निरवेद अरु पढे हूं अपढ महा,  
 ग्रंथन कौं अरथ सो हू वृथा सब जानिये।  
 भले भले काज जग करिवो अकाज जानि,  
 कथा कौं कथन सोहू विकथा बखानिये।  
 तीरथ करत बहु भेष कौं वणाये कहा,  
 बरत विधान कहा क्रियाकांड ठानिये।  
 चिदानंद देव जाकौ अनुभौ न होय जोलौं,  
 तोलौं सब करवौ अकरवो ही मानिये॥१७॥  
 सुरतरु चिंतामणि कामधेनु पाये कहा,  
 नौनिधान पायें कछु तृष्णा न मिटावै है।  
 सुरहू की संपतिमै बढे भोग भावना है,  
 राग के बढावना मैं थिरता न पावै है॥  
 करम के कारिज मैं कृतकृत्य कैसैं होई,  
 यातैं निजमांहि ज्ञानी मनकौ लगावै है।  
 पूज्य धन्य उत्तम परमपद धारी सोही,  
 चिदानंद देव कौ अनंतसुख पावै है॥१८॥

महामेष धारिकैं अलेख कौं न पावे भेद,  
 तप ताप तपै न प्रताप आप लहै हैं।  
 आनही की आरति हैं ध्यान न स्वरूप धरैं,  
 परही की मानिमैं न जानि निज गहै हैं॥  
 धन ही कौं ध्यावै न लखावै चिद लिखमी कौं,  
 भाव न विराग एक राग ही मैं कहै है।  
 ऐसे है अनादि के अज्ञानी जगमाहि जोतो,  
 निज ओर ह्वैं तौ अविनासी होय रहै है॥१९॥  
 परपद धारणा निरंतर लगी ही रहैं,  
 आपपद केरी नाहि करत संभार है।  
 देहकौ सनेह धारि चाहै धन कामनी कौं,  
 राग दोष भाव करि बांधै भवभार है॥  
 इंद्रिन के भोग सेती मन मैं उमाह धरैं,  
 अहंकार भाव तैं न पावै भवपार हैं।  
 ऐसौ तौ अनादि कौं अज्ञानी जग मांहि डोलैं,  
 आप पद जानै सो तो लहै शिवसार हैं॥२०॥  
 करम कलोलन की उठत झकोर भारी,  
 यातैं अविकारी को न करत उपाव है।  
 कहुं क्रोध करै कहुं महा अभिमान धरैं,  
 कहुं माया पगि लग्यो लोभ दरयाव हैं॥  
 कहुं कामवशि चाहि करैं अति कामनी की,  
 कहुं मोह धारणा तैं होत मिथ्या भाव है।  
 ऐसौ तो अनादि लीनो स्वपर पिछानि अव,  
 सहज समाधि मैं स्वरूप दरसाव है॥२१॥  
 नौनिधान आदि देकैं चौदहै रतन त्यागे,

छिनवैं हजार नारि छांडि दीनी छिनमें।  
 छहों खण्ड की विभूति त्यागि कै विराग लियो,  
 ममता नहीं (है) मुलि(भूलि) कहूं एक तिन मैं।  
 विश्वकौं चरित्र विनासीक लख्यौ मन मांहि,  
 अविनाशी आप जान्यौं जग्यौ ज्ञान तिनमें।  
 याही जगमांहि ऐसैं चक्रवर्ती ह्वै अनन्ते,  
 विभौ तजि काज कियो तू वराक किनमें॥२२॥

कनक तुरंग गज चामर अनेक रथ,  
 मंदर अनूप महारूपवन्त नारी है।  
 सिंहासन आभूषण देव आप सेवा करें,  
 दीसैं जगमांहि जाकौं पुण्य अति भारी है।।  
 ऐसौ है समाज राज विनासीक जानि तज्यौ,  
 साध्यौ शिव आप पद पायो अविकारी है।  
 अब तू विचारि निज निधि कौं संभारि सही,  
 एक बार कह्यौ सो ही यो हजारवारी हैं॥२३॥

विविध अनेक भेद लिये महा भासतु हैं  
 पुद्गलदरब रति तामैं नाहि कीजिए।  
 चेतना चमतकार समैसार रूप आप,  
 चिदानन्द देव जामैं सदा थिर ह्वीजिए।।  
 पायो यह दाव अब कीजिए लखाव आप,  
 लहिए अनन्त सुख सुधारस पीजिए।  
 दरसन ज्ञान आदि गुण है अनंत जाके,  
 ऐसो परमातमा स्वभाव गहि लीजिये॥२४॥

राजकथा विषैभोग की रति कनकनग  
 केउ धनधान पशु पालन करतु है।

केउ अन्य सेवा मंत्र औषध अनेक विधि,  
 केउ सुर नर मनरंजना धरतु है।  
 केउ घर चिंता मैं न चिंता क्षण एक मांहि,  
 ऐसैं समैं जाहि तेई भौदुख भरतु हैं।  
 जग मैं बहुत ऐसे पावत स्वरूप कौं जे,  
 तेई जन केउ शिवतिया कौं वरतु हैं॥२५॥

करम संजोग सेती धरि कै विभाव नाट्यौ,  
 परजाय धरि धरि परही मैं पश्यो है।  
 अहं ममकार करि भव भाव बांध्यौं अति,  
 राग दोष भावन मैं दौरि दौरि लग्यो है।।  
 ज्ञानमई सार सो विकार रूप भयो यह,  
 विषय ठगोरी डारि महामोह ठग्यो है।  
 तजि कै उपाधि अब सहज समाधि धारि,  
 हियेमें अनूप जो स्वरूप ज्ञान जग्यो है॥२६॥

गति गति मांहि पर आप मानि राग धरैं,  
 आप पुण्य पाप ठानि भयो भववासी है।  
 चेतना निधान अमलान है अखंड रूप,  
 परम अनूप न पिछानैं अविनासी है।।  
 ऐसी परभावना तू करत अनादि आयो,  
 अब आप पद जानि महासुखरासी है।  
 देवनकौ देव तूही आन सेव कहा करै,  
 नैक निज ओर देखै सुखकौ विलासी है॥२७॥

अहं नर अंह देव अहं धरै परटेव,  
 अहं अभिमान यो अनादि धरि आयो है।  
 अहंकार भावत न आपकौ लखाव कियो,

परहीमें आपौ मानि महादुख पायो है।।  
 कहुं भोग कहुं रोग कहुं सोग है वियोग,  
 राग दोष मई उपयोग अपनायो है।  
 परम अनंतगुणधारी अब आतमाकौ,  
 अनुभौ अखंड करि श्रीगुरु दिखायौ है।।२८।।  
 करिकैं विभाव भवभांवरि अनेक दीनी,  
 आनंदकौ सिंधु चिदानंद नहीं जान्यौ है।  
 करम कलंक पंक कोउ नहीं जहां कहे,  
 सदा अविनासीकौ लखाव नहीं आन्यौ है।।  
 गुणनकौ धाम अभिराम है अनूप महा,  
 ऐसों पद त्यागि परभाव उर ठान्यौ है।  
 भूलितैं अनादि दुख पाये सो तो निवरी है,  
 सहज संभारि अब श्रीगुरु बखान्यौ है।।२९।।  
 आतम करम संधि सूक्ष्म अनादि मिली,  
 जामैं अति पैनी बुद्धि छैनी महाभारी है।  
 शुद्ध चिदज्योति मै स्वरूप कौ सथाप्यौ यातैं,  
 स्वपर की दशा सब लखी न्यारी न्यारी है।  
 ज्ञायक प्रभा मै निज चेतना प्रभुत्व जान्यौ,  
 अविनासी आनंद अनूप अविकारी है।  
 कृतकृत्य जहां कछु फेरि नहीं करणौ है,  
 सासती पदी मैं निधि आपकी संभारी है।।३०।।  
 करी तैं अनादि क्रिया पायो न स्वरूप भेद,  
 परभाव मांहि न ह्वै सहज की धारणा।  
 आपकौ स्वभाव वण्यौ महा शुद्ध चेतना मैं,

केवल स्वरूप लखि करिकैं संभारणा।।  
 सुपददशा के लखैं सुगम स्वरूप आप,  
 ऐसा तौ भला देखि समझि विचारणां।  
 आनंदस्वरूप ही मैं पर ओर कहा देखै,  
 आप ओर आप देखि होय ज्यों उधारणां।।३१।।  
 तू ही चिनमूरति अनूप आप चिदानंद,  
 तूही सुखकंद कहा करै पर भावना।  
 तेरे ही स्वरूप मैं अनंतगुण राजतु हैं,  
 जिनकौ संभारि बढे तेरी ही प्रभावना।।  
 तूही पर भावन मै राचि कैं अनादि दुखी,  
 भयो जगि डोलै संकलेश जहां पावना।  
 नैक निज ओर देखे शिवपुरीराज पावै,  
 आनंद मैं वेदि वेदि सासता रहावना।।३२।।  
 सहज बिसार्यो तैं संभार्यो परपद यातैं,  
 पायो जगजाल मैं अनंत दुख भारी है।।  
 आजु सुखदायक स्वरूप को न भेद पायो,  
 अति ही अज्ञानी लागै परतीति प्यारी है।।  
 परम अखंड पद करि तूसंभार जाकी,  
 तेरो है सही सौं सदा पद अविकारी है।  
 कहैं दीपचंद गुणवृद्धधारी चिदानंद,  
 सोही सुखकंद लखें शिव अधिकारी है।।३३।।

### दोहा

विविध रीति विपरीति हैं, याही समै के माही।  
 धरम रीति विपरीत कूं मूरख जानत नाहि।।३४।।

## सवैया

केऊ तौ कुदेव मानै देवकौ न भेद जानै,  
 केउ शठ कुगुरु कौ गुरु मानि सेवै है।  
 हिंसा में धरम केऊ मूढ जन मानतु है,  
 धरम की रीति विधि मूल नहीं बैठे है।  
 केउ राति पूजा करि प्राणिनिकों नाश करै,  
 अतुल असंख्य पाप दया बिनु लेवै है॥  
 केउ मूढ लागि मूढ अबै ही न जिन बिब,  
 सेवै बार बार लागे पक्ष करि केवै हैं॥३५॥

सुत परिवार सौं सनेह ठानि बार बार,  
 खरचै हजार मनि धरि कै उमाह सौं।  
 धरम के हेत नैक खरच जो वणि आवै,  
 सकुचै विशेष, धन खोय याही राहसौं॥  
 जाय जिन मंदिर में बाजरौ चढावै मूढ,  
 आप घर मांहि जीवे चावल सराहसौं।  
 देखो विपरीत याही समै मांहि ऐसी रीति,  
 चोरही को साह कहै कहैं चोर साहसौं॥३६॥

गुणथान तेरह में केवल प्रकाश भयो,  
 तहां इन्द्र पूजा करैं आप भगवान की।  
 तीसरै थड़े पै खडो दूरि भगवानजी सौ,  
 चढावै दख वसु; कला वाह्यज्ञान की॥  
 धरमसंग्रहजी में कह्यो उपदेश यहै,  
 तातैं जिनप्रतिमा भी जिनही समानकी।  
 यातैं जिन बिम्ब पाय लेप न लाइयतु,  
 लेप जु लगायै ताकी बुद्धि है अज्ञान की॥३७॥

## दोहा

वीतराग परकरण में, सभी सराग न होइ।  
 जैसो करि जहां मानिये, तैसी विधि अवलोइ॥३८॥

## सवैया

साधरमी निरधन देखि कै चुरावै मन,  
 धरम कौ हेत कछु हिये नहीं आवै है।  
 सुत परिवार तिया इनसौं लग्यौ है जिया,  
 इनही के काज मूढ लाखन लगावै है॥  
 नरक कौ बंध करै हिये में हरख धरै,  
 जनम सफल मानि मानि कै उम्हावै है।  
 नैक हित किये भवसागर कौ पार होत,  
 धरम कौ हित ऐसौ श्रीगुरु बतावै है॥३९॥

## दोहा

क्रौडौ खरचै पाप कौ, कौडी धरम न लाय।  
 सो पापी पग नरक कौ, आगे २ जाय॥४०॥  
 मान बडाई कारणै, खरचै लाख हजार।  
 धरम अरथि कोडी गयें, रोवत करैं पुकार ॥४१॥  
 करम करत हैं पाप के, बार बार मन लाय।  
 धरम सनेही मित्र की, नैक न करै सहाय ॥४२॥  
 कनक कामिनी सौं करै जैसौ हित अधिकाइ।  
 तैसौ हित नहि धरम सौं यातैं दुरगति थाइ॥४३॥

## सवैया

एक सुत ब्याह काजि लावत हजारों धन,  
 कहे हम धन्य आजि शुभ धरी पाई है।



समरथ भयेंतें सब धन कों छिनाय लेत,  
 कुगति कों हेतु यासौं कहे सुखदाई है॥  
 देशना धरम की दे दोउ लोक हित ठानैं,  
 तिनकौ न माने मूढ लगी अधिकाई है।  
 माया भिखारी महा कर्मही कौ अधिकारी,  
 करै न धरम बूझि मौथिति बढाई है॥४४॥  
 कामिनी कौं कनक के आभूषन करि करि,  
 करें महा राजी जाकै विषैं मति लागी है।  
 रहसि जिनैन्द्रजी के धरम को जानें नाहि,  
 मानही बड़ाई काजि लछमी को त्यागी है।  
 विधि न धरम जानें गुण कौ न मानें मूढ,  
 आज्ञा भंग क्रिया जासौं प्रीति अति पागी है।  
 आतमीक रुचि करें मारग प्रभाव तासौं,  
 करै न सनेह शठ बडो ही अभागी है॥४५॥  
 गुणकौ ग्रहण किये गुण बढवारी होई,  
 गुणबिन मानैं गुणहानि ही बखानिये।  
 गुणी जन होइ सोतो गुणकौं ही चाहतु हैं,  
 दुष्ट चाहैं औगुणकौं ताकौं धिक मानिये॥  
 स्तन में क्षीर तजि पीवत रुधिर जौंक,  
 ऐसौ है स्वभाव जाकौ कैसै भलो जानिये।  
 यातैं गुणग्राही होइ तजि दीजे दुष्ट वाणि,  
 गुणकौ ही मानि मानि धरमकौ ठानिये॥४६॥  
 धरम की देशना तैं गुण देइ सज्जन कौ,  
 दीनन कौ धन मन धरम में लावै हैं।  
 चेतन की चरचा चित में सुहावै जाकौं,

मारग प्रभाव जिनराजजी को भावै है॥  
 अति ही उदार उर अध्यातम भावना है,  
 स्यादवाद भेद लिए ग्रंथ कौ वणावै है।  
 ऐसौ गुणवान देखि सजन हरष धरैं,  
 दुर्जन कै हिये हित नैक हू न आवै है॥४७॥  
 धन ही कौ सार जानि गुणकी निमानि करै,  
 मोह सेती मान धरै चाह है बडाइ की।  
 नारी सुत काजि झूठ खरचि हजारों डारैं,  
 चाकरी न करैं कहुं धरम कै भाई की॥  
 साधरमी धनहीन देखि कैं करावै सेवा,  
 अनादर राखैं राति नहीं अधिकाई की।  
 माया की मरोरतैं न धरम कौं भेद पावैं,  
 बिना विधि जानैं रीति मिटै कैसैं काई की॥४८॥  
 साता सुखकारी यहै मोह की कुटिल नारी,  
 ताकौं जानि प्यारी ताके मदकौं करतु है।  
 धरम भुलावै अति करम लगावै भारी,  
 ऐसी साता हेत लच्छी घर में धरतु हैं॥  
 यह लोक चिंता परलोक में कुगति करैं,  
 कहै मेरो यासौ सब कारज सरतु हैं।  
 धरम के हेत लाइ धनकी सुगति करै,  
 धरम बढावैं शिवतिय के चरतु है॥४९॥  
 बार बार कहैं कहा तू ही या विचारि बात,  
 लछमी जगतमें न थिर कहुं रही है।  
 जाकौं करि मद अर फेरि क्यों करम बांधै,  
 धरम के हेत लाये सुखदाई कही है॥

ऐसी दुखदायनिकों कीजिये सहाय निज,  
यातैं और लाभ कहा ढूंढि देखि मही है॥  
साधरमी दुख मेटि धरम के मग लाय,  
सात खेत वाहें सुख पाव जीव सही है॥५०॥  
दस प्राण हू तै प्यारो धन है जगत मांहि,  
महा हित होइ जहां धनकों लगावै है।  
तियाकों तौ धन सौंपै सुतकों सब धर,  
धरममें लालि पालि नैक हू न भावै है॥  
लौकिक बडाई काजि खरचै हजारों धन,  
चाह है बडाई की न धरम सुहावै है।  
मूढन कौ मूढ महारुठ ही मैं विधि जानैं,  
सांच न पिछानै कहौ कैसै सुख पावै है॥५१॥  
माया की मरोर ही तैं टेढो टेढो पांव धरै,  
गरवकौ खारि नहीं नरमी गहतु है।  
विनै को न भेद जानैं विध ना पिछानैं मूढ,  
अरुइयौ बडाई मैं न धरम लहतु है॥  
चेतना निधान कौ विघान जिन सेती,  
पावै तिनहूं सौं ईरष्या अज्ञानी यौ महतु है।  
रोजगारी करकैं समीप राख्यौ चाहै आप,  
याहू तैं अधिक बडो पाप कौ कहतु है॥५२॥  
गुणवंत देखि अति उटि ठाडो होइ आप,  
सनमुख जाय सिंहासन परि धारै हैं।  
सेवा अति करै अरु दास तन धरै महा  
विनैरुप बैन भक्तिभाव कौ बढारै हैं॥  
प्रभुता जनावै जगि महिमा बढावै जाकी,

चाहिजि मैं असे अंग सेवा कौ संभारे हैं।  
भक्ति अंग ऐसौ कोउ करै पुण्यकारणि,  
जो पुण्य काउपावैं अरु दुख दोष टारै हैं ॥५३॥  
प्रीति परिपूरण तै रोम रोम हरषित हवै,  
चित चाहै बार २ येम रस भर्यौ है।  
अंतर मैं लगनि अतीव धरै धारणा सो  
महा अनुराग भाव ताही मांहि धर्यौ है॥  
जहां जहां जाकौ संग तहां २ ताको रंग,  
एक रस रीति विपरीति भाव हर्यौ है।  
ऐसौ बहु मान अंग विनैका वखान्यौ सुध  
ज्ञानवान जीव हित जानि यह कर्यौ है॥५४॥  
गुणकौ बखानि जाकैं जस कौ बढावै महा,  
जाकी गुण महिमा दिढावै बार २ है।  
जाही कौ करत अति गुणवान ज्ञानवान,  
कथन विशेष जाको करै विसतार है।  
रहि कै निसंक नाही बंक हू नमन मांहि,  
करत अतीव थुति हरष अपार है।  
गुणन कौ वरणन न तीजो अंग विनै कौ,  
जाकौ किये बुध पुण्य लहै जगसार है॥  
अवज्ञा वचन जाकौ कहूं न कहत भूलि,  
निंदा बार बार गोप्य, गुणकौ गहिया है।  
धरम कौ जस जाकौ परम सुहावत है,  
धरम को हित हेतु हिये मैं चहिया है॥  
कियै अवहेल तातैं लगत अनेक पाप,  
ऐसौ उर जानि जाके दोष को दहिया है।

आपनी सकति जहां निंदा सब मेटि डारै,  
 ऐसा विनैभाव जातैं पुण्यकौं लहिया हैं॥५६॥  
 जाके उपदेश सेती धरम कौं लाभ होय,  
 सोही परमात्मा यो ग्रंथन में गायो है।  
 आप अधिकार मांहि ताकौं दुखभार होय,  
 अधिकार ऐसौ बुधिवंत नै न भायो है॥  
 आपके प्रभूत्व में न साधरमी सार करै,  
 आछादन लगैं मूढ निंघ ही कहायो हैं।  
 देकैं धन संपदा कौं आपके समान करैं,  
 साधरमी हासि मेटि पुण्य जे उपायो हैं॥५७॥  
 अरहन्त सिद्ध श्रुत समकित साधु महा,  
 आचारज उपाध्याय जिनविब सार है।  
 धरम जिनेश जाकौ धन्य है जगत मांहि,  
 च्यारि परकार संघ सुध अविकार है॥  
 पूजि इन दशन कौं पंच परकार विनै,  
 कीजिए सदैव जातैं लहै भव पार है।  
 धरमकौ मूल यह ठौर ठौर विनै गायौ,  
 विनैवंत जीव जाकी महिमा अपार है॥५८॥  
 नाम नौका चढिकै अनेक भव पार गये,  
 महिमा अनन्त जिननाम की बखानी है।  
 अधम अपार भवपार लहि शिव पायो,  
 अमर निवास पाय भये निज ज्ञानी है॥  
 नाम अविनाशी सिद्धि रिद्धि वृद्धि करै महा,  
 नाम कै लिये तैं तिरैं तुरत ही प्राणी हैं।  
 नाम अविकार पद दाता है जगत माहि,

नाम की प्रभुता एक भगवान जानी है॥५९॥  
 महिमा हजार दस सामान्य जु केवली की,  
 ताके सम तीर्थकरदेवजी की मानिये।  
 तीर्थकरदेव मिलै दसक हजार ऐसी,  
 महिमा महत एक प्रतिमा की जानिये॥  
 सो तो पुण्य होय तब विधि सौं विवेक लिये,  
 प्रतिमा कै ढिग जाय सेवा जब ठानिये।  
 नाम के प्रताप सेती तुरत तिरै है भव्य,  
 नाम महिमा विनतैं अधिक बखानिये॥६०॥  
 करमें जपाली धरि जाप करै बार २,  
 धन ही में मन यातैं काज नहीं सरै है।  
 जहां प्रीति होय याकी सोई काज रसि पडैं,  
 विना परतीति यह भवदुख भरै है॥  
 तातैं नाम माहिं रुचि धर परतीति सेती,  
 सरघा अनायें तेरो सवै दुख टरै है।  
 नाम के प्रताप ही तैं पाइये परम पद,  
 नाम जिनराज कौं जिनेश ही सौं करै हैं ॥६१॥  
 नाम ही कौ ध्यान में अनेक मुनि ध्यावत हैं,  
 नाम तैं करमफंद छिनमें विलाय हैं।  
 नाम ही जिहाज भवसागर के तिरको कौं,  
 नामतैं अनंतसुख आतमीक धाय है॥  
 नाम के लिये तैं हिये राग दोष रहै नाहि,  
 नामके लिये तैं होय तिहुं लोकराय हैं।  
 नाम के लिये तैं सुरराज आय सेवा करै,  
 सदा भवमांहि एक नाम ही सहाय है॥६२॥

धन्य पुण्यवान हैं अनाकुल सदैव सोही,  
दुखकौ हरैया सोही सदा सुखरासी है।  
सोही ज्ञानवान भव-सिंधुकौ तिरैया जानि,  
सोही अमलान पद लहै अविनासी है।  
ताके तुल्य और की न महिमा बखानियतु,  
सोही जगमांहि सब तत्वकौ प्रकासी है॥  
प्रभुनाम हिये निशिदिन ही रहत जाके,  
सोही शिव पाय नही होय भववासी है॥६३॥  
त्रिभुवननाथ तेरी महिमा अपार महा,  
अधम उधारे बहु तारे एक छिन मैं।  
तेरो नाम लियेतैं अनेक दुख दूर होत,  
जैसे अधिकार विलै जाय सही दिन मैं॥  
तू ही है अनंतगुण रिद्धिकौ दिवैया देव,  
तू ही सुखदायक हैं प्रभु खिन २ मैं।  
तू ही चिदानंद परमात्मा अखंडरुप,  
सेयें पाप जरै जैसे ईंधन अगनि मैं॥६४॥  
देव जगतारक जिनेश हैं जगत मांहि,  
अधम उधारण कौ विरद अनूप हैं।  
सेयें सुरराज राज हू से आय पाय परैं,  
हरै दुख द्वंद प्रभु तिहुंलोक भूप हैं॥  
जाकी थुति कियेतैं अनंतसुख पाइयतु,  
वेद मैं बखान्यौ जाको चिदानंद रूप है।  
अतिशय अनेक लियें महिमा अनंत जाकी,  
सहज अखंड एक ज्ञान का स्वरूप है॥६५॥  
नाम निसतारौ महा करि है छिनक मांहि,

आविनासी रिद्धि सिद्धि नाम ही तैं पाइये।  
तिहुंलोक नाथ एक नाम के लियेतैं हवै है,  
नाम परसाद शिवथान में सिधाइये॥  
नाम के लिये तैं सुरराज आय सेवा करै,  
नाम कै लिये तैं जगि अमर कहाइये।  
नाम भगवानकै समान आन कोउ नाहिं,  
यातैं भवतारी नाम सदा उर भाइये॥६६॥  
आत्मा अमर एक नाम के लिये तैं होय,  
चेतना अनंत चिन्ह नाम ही तैं पावै हैं।  
नाम अविकार तिहुंलोक में उधार करै,  
परम अनूपपद नाम दरसावै है॥  
आनंदकौ धाम अभिराम देव चिदानंद,  
महासुख कंद सही नामतै लखावै है।  
नाम उर जाके सोही धन्य है जगत मांहि,  
इन्द्र हू से आय २ जाकौ सिर नावै है॥६७॥

### दोहा

नाम अनूपम निधि यहै, परम महा सुखदाय।  
संत लहै जे जगत मैं ते अविनाशी थाय॥६८॥  
नाम परम पद कौ करैं, नाम महा जग सार।  
नाम धरत जे उर मही, ते पावैं भवपार॥६९॥

### सवैया

भवसिंधु तिरवे कौं जग मैं जिहाज नाम,  
पापतृण जाखे कौं अगनि समान है।  
आतम दिखायवे कौं आरसी विमल महा,

शिवतरु सींचवे कौं जल कौ निधान है।।  
 दुख दव दूर करिवे कौं कह्यौ मेघ सम,  
 वांछित देवे कौं सुरतरु अमलान है।  
 जगत के प्राणिन कौं शुद्ध करिवे कौं,  
 जैसें लोह कौं करै पारस पाखान है।।७०।।

### दोहा

नवनिधि अरु चउदह रतन, नाम समान न कोय।  
 नाम अमर पद कौं करै, जहां अतुल सुख होय।।७१।।

### सवैया

माया ललचाय यह नरक कौं वास करै,  
 ताकै वशि मूढ जिनधर्म कौं भुलाय है।  
 अति ही अज्ञानी अभिमानी भयो डोलत हैं,  
 पारै अंध, फंद हिये हित नहीं आय है।।  
 चेतन की चरचा में चित कहुं लावैं नाहि,  
 ख्याति पूजा लाभ महा येही मन भाय है।  
 पर अनुराग में न जाग ह्वै स्वरुप की हैं,  
 वहिर्मुख भयो बहिरात्म कहाय हैं।।७२।।  
 ग्रंथ कौ कहिया ताकौ आप ढिग राख्यौ चाहै,  
 ताका अपमान भयें दोष न अनाय है।  
 ताके हांसि भये जिन मारग की हांसि ह्वै है,  
 ऐसौ विवेक नक हिये नहीं थाय है।।  
 माया अभिमान में गुमान कहुं भावै नाहि,  
 बाहिज की दृष्टि सोतो बाहिज लगाय है।  
 धरम उद्योत जासौं कहौ कैसे बणि आवै,

झूठ ही मै पग्यौ सांचौ धरम न पाय है।।७३।।  
 गुण कौ न गहै मान अति ही अन्यत्र चहै,  
 लहै न स्वरुप की समाधि सुख भावना।  
 चेतन विचार ताकौ जोग काहू समै जरै,  
 ताहू समै करै और मन की उपावना।।  
 कनक के काजि के उपाय कै उपाय करै,  
 कामिनी के काज मै हजारों धन लावना।  
 साधरमी हेतु हित नैक न लगावै मूढ,  
 पाप पंथ पग्यौ भव भांवरि बढावना।।७४।।  
 दुर्लभ अनादि सत संग है स्वरुप भाव,  
 ताकौ उपदेश कहुं दुलभ कहीजिये।  
 चरचा विधान तैं निधान निज पाईयत,  
 होय कैं गवेषी तहां तामैं मन दीजिये।।  
 ईरष्या कीये तैं बंध पडै ज्ञानावरणी कौ,  
 गुण के गहिया ह्वै कै ज्ञानरस पीजिये।  
 जाकौ संग किये महा स्वपद की प्राप्ति ह्वै,  
 सोही परमात्मा सही सौं लख लीजिये।।७५।।  
 जाके संग सेती महा स्वपर विचार आवै,  
 स्वपद बतावै एक उपादेय आप हैं।  
 गुण कौं निधान भगवान पावै धटही में,  
 ताके संग सेती दूर होय भवताप है।।  
 ताके संग सेती शुद्धि सिद्धि सौं स्वरुप जानै,  
 धन्य २ जाकौ जाके संग सौं मिलाप हैं।  
 ऐसौ हूं कथन सुणि क्रूर जो कूचरचा करै,  
 भव अधिकारी मूढ बांधै अतिपाप है।।७६।।

एक परपद दूजो देखै परपद कौ है,  
 देखै सो स्वपद दीसै सोही सब पर है।  
 ऐसैं भेद ज्ञान सौं निधान निज पाइयत,  
 चेतन स्वरूप निज आनंद कौ धर है।।  
 चौरासी लाख जोनि जामे जनमादि दुख,  
 सहे तैं अनादि ताकौ मिटै तहां डर है।  
 तिहुंलोक पूज्य परमात्मा हवै निवसै है,  
 तहां ही कहावै शिवरमणीकौ वर है।।७७।।  
 केउ कूर कहैं जग-सार है स्वपद महा,  
 ऐसी कहैं परिवूफदु (?) रहतु हैं।  
 कामिनी कुटुंब काजि लाखन लगाय देत,  
 स्वपद बतावैं ताकौ हित न चहतु हैं।  
 नैक उपकार सार संत नही विसरै हैं,  
 ऐसौ उपकार भूलै कहत महतु है।।  
 जाकी बात रुचि सेती सुणै शिवथान होय,  
 जीके धन्य जाकौ अनुरागसौं कहतु हैं।।७८।।  
 तीरथ में गये परिणाम सुद्ध होय नांहि,  
 सतसंग सेती स्वविचार हिये आवै हैं।  
 ऐसौ सतसंग परंपरा शिवपद दाता,  
 तिनहूं सौं महामूढ मान कौ बढावै है।।  
 लक्ष्मी हुकम लखि मन मांहि धारैं मद,  
 ऐसे मदधारी नांही निज तत्व पावै है।  
 आतम की आप कोड बात कहै राग सेती,  
 धन्य सो वारिधन तिन परिब गावै है (?)।।७९।।  
 नैक उपकार करैं संत ताहि भूलै नाहि,

ताकौ गुण मानि ताकी सेवा करै भाव सौं।  
 आतमीक तत्व तासौं प्राप्ति हवैं ताही करि,  
 अमर स्वपद हवै है सहज लखाव सौं।।  
 ऐसौ गुण ताकौं मूढ गिणैं नाहि नैक हूं है,  
 महंत कहावै कृतधनी के कहाव सौं।  
 सोई धन्य जगत में सार उपकार मानैं,  
 आप हित करैं ताकौ पूजत सहाव सौं।।८०।।  
 जासौं हित पावै ताकौ आश्रित ही राख्यौं चाहैं,  
 मानकी मरोर में बडाई चाहै आपकी।  
 दाम ही मैं राम जानै ओर की न बात मानै,  
 हित न पिछानै रीति बाढै भवताप की।।  
 जाके उपदेश सौं अनूपम स्वरूप पावैं,  
 ताकौं अपमानै थिति बांधै महापापकी।  
 औगुण गहिया भवजाल के बहिया बह,  
 कैसैरीति राखै उपकारी के मिलाप की।।८१।।  
 कह्यौ है अनंतवार सार है स्वपद महा,  
 ताकौ बतावै सोही सांचौ उपकारी है।  
 ताकौ गुण मानैं जो तो सांचिहवै स्वरूप सेती,  
 ऐसी रीति जानै जाकी समझि हा भारी है।  
 नय व्यवहार ही मैं कह्यौ है कथन एतो,  
 रीझि मैं न विकल्प विधिकौं उधारी है।  
 ऐसौ उपदेश सार सुणि न विकार गहैं,  
 सोही गुणवान आप आपही अधिकारी है।।८२।।  
 जाकैं गुण चाहि हवै तौ गुण कौ गहिया होय,  
 औगुण की चाहि हवै तौ औगुण गहतु है।



काक ज्यों अमेधि गहि मन मे उमाह धरै,  
 हंस चुगै मोती ऐसे भाव सौं सहतु हैं।  
 भावना स्वरूप भायै भवपार पाईयतु,  
 ध्यायै परमात्मा कौं होत यौ महतु हैं।  
 तातैं शुद्ध भाव करि तजिये अशुद्ध भाव,  
 यह सुख मूल महा मुनिजन कहतु है॥८३॥  
 करम संजोग सौं विभाव भाव लगे आये,  
 परपद आपौ मानि महादुख पायैं है।  
 केवली उकति जाकौं अरथ विचारि अब,  
 जागि तोकौ जो तौं यह सुगुण सुहाये है॥  
 जामैं खेद भय रोग कछु न वियोग जहां,  
 चिदानंदराय मैं अनंत सुख गाये हैं।  
 सबै जोग जुयौं अब भावना स्वरूप करि,  
 ऐसे गुहबैन कहै भव्य उर आयै है॥८४॥  
 पायकैं प्रसु(भु)त्व प्रभु सेवा कीजै बार २,  
 सार उपकार करि परदुख हरि लीजिये।  
 गुणीजन देखिकैं उमाह धरि मनमांहि,  
 विनही सौं राग करि विनरूप कीजिये।  
 चिदानंद देव जाकै संग सेती पाईयतु,  
 तेरे परमात्मासौं तामैं मन दीजिये।  
 तिया सुत लाज मोह हेतु काज वहै मति जाही,  
 ताही भांतितैं स्वरूप शुद्ध कीजिये॥८५॥  
 कह्यौ मानि मेरो पद तेरो कहुं दूरि नांहि,  
 तोहि मांहि तेरो पद तू ही हेरि आप ही।  
 हेरे आन थान मैं न ज्ञानकौ निधान लहै,

आपही हैं आप और तजि दै विलाप ही॥  
 मेटि दे कलेश के कलाप आप ओर होय,  
 जहां नही मूलि लागैं दोउ पुण्य पाप ही।  
 तिहौं लोक शिखर पै शिवतिया नाथ होय,  
 आनंद अनूप लहि मेटे भवताप ही॥८६॥  
 केउ तप ताप सहैं केउ मुखि मौन गहैं,  
 केउ हवै नगन रहैं जगसौं उदास ही॥  
 तीरथ अटन केउ करत हैं प्रभु काजि,  
 केउ भव भोग तजि करैं वनवास ही॥  
 केउ गिरकंदरामैं बैठि हैं एकांत जाय,  
 केउ पढि धारैं विद्या के विलास ही।  
 ऐसैं देव चिदानंद कहौ कैसैं पाईयतु,  
 आप लखै तेई धरै ज्ञानकौ प्रकासही॥८७॥  
 केउ दौरि तीरथ कौ प्रभु जाय दूढतु हैं,  
 केउ दौरि पहर पै छीके चढ़ि ध्यावै हैं।  
 केउ नाना वेष धारि देव भगवान हेरैं,  
 केउ औंधै मुख झूलि महा दुख पावै है॥  
 ऐसै देव चिदानंद कहौ कैसै पाईयत,  
 आतम स्वरूप लखैं अविनाशी ध्यावै है॥८८॥  
 केउ वेद पढि कै पुराण कौं वखान करैं,  
 केउ मंत्रपक्षही के लागे अति केवे हैं।  
 केउ क्रियाकांड मैं मगन रहैं आठौ जाम,  
 केउ सार जानि कै अचार ही कौं सेवै हैं।  
 केउ वाद जीति कै रिझावैं जाय राजन कौं,  
 केउ हवै अजाची धन काहू कौ न लेवै हैं।

ऐसौ तौ अज्ञानता मैं चिदानंद पावै नांहि,  
 ब्रह्मज्ञान जानै तौ स्वरूप आप बैवै है॥८९॥  
 कथित जिनेन्द्र जाकों सकल रहसि यह,  
 शुद्ध निजरूप उपादेय लाखि लीजिये।  
 स्वसंवेद ज्ञान अमलान है अखंड रूप,  
 अनुभौ अनूप सुधारस नित पीजिये॥  
 आतम स्वरूप गुण धारै है अनंतरूप,  
 जामैं धरि आयौ पररूप तजि दीजिये।  
 ऐसैं शिव साधक हवै साधि शिवनाथ महा,  
 अजर अमर अज होय सदा जीजिये॥९०॥

### दोहा

यह अनूप उपदेश करि, कीनौ है उपकार।  
 दीप कहै लखि भविकजन, पावत पद अविकार॥९१॥

### इति

## सवैया-टीका

### सवैया

गुण एक एक जाकैं परजै अनंत करे,  
 परजै मैं नतं नृत्य नाना विसतर्यौ है।  
 नृत्य मैं अनंत थट थट मै अनंत कला,  
 (कला मैं) अखंडित अनंत रूप धर्यौ है॥  
 रूप मैं अनंत सत सत्ता मै अनंत भाव,  
 भावको लखावहु अनंत रस भर्यौ है।  
 रस के स्वभाव मै प्रभाव है अनंत दीप,  
 सहज अनंत यौ अनंत लागि कर्यौ है॥११॥

### टीका

गुण सूक्ष्म के अनंत पर्याय ज्ञानसूक्ष्म, दर्शनसूक्ष्म, वीर्यसूक्ष्म, सुखसूक्ष्म, सर्वगुणसूक्ष्म, सो सूक्ष्म गुण तीका पर्याय सूक्ष्म अनंत फैल्या। सो गुण गुण मैं आया एक ज्ञानसूक्ष्म ता सूक्ष्म को पर्याय तीमैं ज्ञान सो ज्ञान अनंतो अनंत गुण आतमा अस्तित्व वस्तुत्व, द्रव्यत्व, प्रमेयत्व, प्रदेशत्व, अगुरुलघुत्व, प्रभुत्व, विभुत्व इत्यादि गुण। अनंतज्ञान जान्या दर्शन नैं ज्ञान जानैं वा वीर्यनैं वा सुखनैं वा वस्तुत्वनैं वा प्रमेयत्व नैं इत्यादि प्रकार अनंतगुण नैं ज्ञान जानैं। ज्ञान अनंतज्ञानपणांरूप नांच्यौ सो अनंत नृत्य भयो यो निज द्रव्य को ज्ञान द्रव्य नैं जाणैं, सो द्रव्य अनंत गुणमय वैसो द्रव्य का जानपणां रूपज्ञान नांच्यो छै सो अनंत नृत्य भयो, ती नृत्य मैं द्रव्य कौ जानपणां छै, सो द्रव्य अनंतगुण को थट लिया छै, सो गुण अनंत को थट एक द्रव्य को जानपणां नृत्य मैं आयो अनंत गुण किसा है ? एक एक गुण

.....  
 में अनंत प्रकार थट छै सो कहिजै छैं अनंत प्रकार भेद किसा छैं जीकौ ब्यौरौ, वीर्यगुण में ऐसौ थट छै जो द्रव्यवीर्य, गुण वीर्य, पर्यायवीर्य, क्षेत्रवीर्य, भाववीर्य। क्षेत्रवीर्य क्षेत्र नै निहपन्न राखै सो द्रव्यवीर्य द्रव्य नै निहपन्न राखै, पर्यायवीर्य पर्याय नै निहपन्न राखै भाववीर्य भावनै निहपन्न राखै द्रव्य का असंख्य प्रदेश क्षेत्र छै, त्या में अनंतगुण को प्रकाश उठै छै, दर्शनप्रकाश, ज्ञानप्रकाश, वीर्यप्रकाश, सुखप्रकाश, प्रभुत्वप्रकाश इत्यादि अनंतगुण को प्रकाश प्रदेशक्षेत्र तै उठै है। ऐसौ क्षेत्र तिहनै निहपन्न राखै, याही प्रकार द्रव्य का द्रव्यत्व गुणसौ उपज्या भेद त्याहनै लिया द्रव्य तिन्है निहपन्न राखै, द्रव्यवीर्य भवतीति भावपर्याय उपलक्षण भाववस्तु परिणमनरूप भाव अथवा स्वभावभाव तिन्है निहपन्न राखै, भाववीर्य ऐसौ थट वीर्यगुण कौ छै, वीर्यगुण का थट में वस्तुत्व नाम गुण छै एक छै वस्तु को भाव वस्तुत्व सामान्यविशेषात्मक वस्तु तीकौ भाव वस्तु कौ निहपन्न राखें वस्तुत्व वीर्य वै वस्तुत्व वीर्य का थट में अनंत कला छै सो कहिजै छै:-

कला वस्तु में जो कहावै जो अनेक स्वांग ल्यावै अथवा अनेक नट की नाई कला करै, परि एकरूप रहैं त्यों वस्तुत्व सामान्यभाव विशेष त्यां रूप सो ज्ञान जानपणारूप परिणयो सामान्य ज्ञान को भाव ज्ञान द्रव्य नै जानै, गुण नै जानै, पर्याय नै जानै सो ज्ञान को विशेष भाव दर्शन देखिवारूप परिणयो, सो दर्शन को सामान्यभाव द्रव्य नै देखैं गुण नै देखै, पर्याय नै देखैं, सो दर्शन को विशेष भावई प्रकार सकल गुण में सामान्य भाव विशेषभाव छै सो ऐसा भाव भेद वस्तुत्व करै छै, परि एक रूप रहै छै ऐसी कला वस्तुत्व धर्या छैं, वस्तुत्व गुण सकलगुण का सामान्यविशेषरूपपर्यायमंडित सो पर्याय वस्तु का अनंत भया, भाव प्रमेयत्व नै सामान्यविशेषणौ वस्तुत्व

.....  
 की पर्याय दियो तब प्रमेयत्व सामान्यविशेषरूप भयो तब सामान्यविशेषरूप होय स्वरूप रहै छै जो वस्तुत्व की कला छी सो प्रमेयत्व में आई, सो कला प्रमेय धरी सो कला अनंतरूप नै धर्या हैं सो कहिजै छै:-

सो प्रमेय गुण तीकी अनेक प्रकारता धरि एक रूप रहवो ऐसो प्रमेय दर्शन दृष्टि सम्यक् छै तातैं प्रमाण करवा जोग्य छै। ज्ञान सम्यकज्ञानपणौ धर्या छै सो ज्ञान प्रमाण करवा जोग्य छै। वीर्य सम्यक वस्तु निहपन्न राखिवो जोग्य छैं सो प्रमाण करवा जोग्य छै। जो प्रमेय गुण न होय तो अनंतगुण अपना रूप नै न धरता न प्रमाणजोग्य होता, तातैं प्रमेयकरि अनंत सूक्ष्म पर्याय नै वे पर्याय सकणगुणां में आया तब वां आपणै रूप धर्यो तातैं एक वस्तुत्व की अनंतकला तिहमें एक प्रमेयत्व की कला तिहं प्रमेय कला अनंतगुण रूप धर्यो ज्ञान प्रमाण करिवा करि ज्ञान रूप धर्यो, सत्तारूप धर्यो, वीर्यरूप धर्यो प्रमेयत्व में सत्ताको रूप आयो सो रूप अनंतसत्ता में धर्या छै, काहेतैं धर्या छै ? सत्ता तीन प्रकार छै। स्वरूपसत्ता भेद करि महासत्ता परमसामान्य संग्रहनयकरि एक कही परि अवांतरसत्ता तथा स्वरूपसत्ताभेदकरि तीन प्रकार छै। द्रव्यसत्ता, गुणसत्ता, पर्यायसत्ता तीना में गुणसत्ता का अनंत भेद है। दर्शनसत्ता, ज्ञानसत्ता, सुखसत्ता, वीर्यसत्ता, प्रमेयत्वसत्ता, द्रव्यत्वसत्ता इत्यादि अनंतगुणकी अनंतसत्ता सो एक प्रमेयत्व में विराजै छै। प्रमाणवाजोग्य सत्ता भई बिना प्रमेयत्व अप्रमाण होतां सत्तानै कोई न मानतो तब अकार्यकारी भया, गणना में न आवती तातैं प्रमेयत्व में अनंतसत्ता कही एक एक गुण की सत्ता विराजै छै ता एक एक गुण सत्ता में अनंतभाव छैं सो कहिजे छै:-एक द्रव्य छै तीको सार्थक नाम द्रव्यत्व करि पायो छै 'गुणपर्याय द्रवति व्याप्नोति इति द्रव्यम्' द्रव्यत्व गुण न होतो तो द्रव्य न होतो,

काहे तैं बिना द्रया, गुण पर्याय स्वभाव को प्रकाश न होतो तातैं द्रवै तब पर्याय तरंग उठै तब गुण अनंत अनंतशक्तिमंडित अनंतगुणपुंजस्वरूप द्रव्यनिकों परिणमना गुण परिणाम आयो तब स्वरूपलाभ अनंत गुण लाभ आयो तब द्रव्यगुण की सिद्धि भई,। ईप्रकार द्रव्य द्रवै पर्याय उठै तब वो पर्याय द्रव्य नै द्रवै, तब पर्याय गुण द्रववा करि गुण परिणति तैं गुणलाभ लो गुण मैं मिलै तब गुण सिद्धि हवै तब गुण समुदाय द्रव्य सिद्धि है। गुण द्रवै तब पर्याय रूप द्रयां हवै गुण पर्याय द्रवै तब पर्याय गुण द्रववा करि गुणपरिणति तैं गुण लाभ ले गुणमें मिले तब गुणसिद्धि हवै तब गुणसमुदाय द्रव्य सिद्धि है। गुण द्रवै तब पर्याय गुणपरिणति तीसौं एक हवै तब स्वयं स्वपर रूप है। तब गुण लक्षण करि लक्ष्य नाम पावै गुण द्रवै तब एक सत्त्व सकल गुण को होय तिन द्रव्य की सिद्धि होई। ई प्रकार द्रव्यत्व सत्ता द्रय करि अनंत भाव नैं धर्यो छै। ई प्रकार द्रव्यत्व सत्ता ज्यौं अनंतभाव धर्यो छै जो जो गुण रूप मैं सत्ता कही सो वाही सत्ता ज्यौ द्रव्यत्व करि भेद छै त्यों भाव दिखायो त्योंही अगुरुलघुत्व सत्ता भाव अनंत नैं धर्यो छै गुरुलघु भयां इन्द्रोग्राह्य होय भारी हूवा गिरि पडै; हलकी भया उडिजाय तब अबाधित अनाघात सत्ता धाती जाय तातैं अगुरुलघु सत्ता को भाव अनंतघा छैं। ज्ञान अगुरुलघु दर्शन अगुरुलघु इत्यादि अनंतभाव अगुरुलघु धर्यो छै। एक प्रदेश अगुरुलघु प्रदेश भाव छै ती प्रदेश अगुरुलघु प्रदेश भाव लखाव काजे तब अनंत रस होइ छै सो कहिये छै:- वै प्रदेश अगुरुलघु भाव नैं सम्यग्दृष्टि देखिजे तब अनंत रस होई छै सो कहिये छै। प्रदेशर्यों अनंतगुण प्रकाश उठै छै। एक एक गुण प्रकाश संज्ञा संख्या लक्षण प्रयोजनादि अनंत भेद रूप भाव अनेक दिखावै छैं अरु सत्ता रूप वस्तु एक छै। एक एक

प्रदेश मैं अनंत धरश गुण को छैं गुण अनंत शक्तिनै लियां छै। पर्याय नृत्य थट कला रूप सत्ता भाव आदि, द्रव्य क्षेत्र काल भाव आदि भेद प्रकाश सकल भेद को एक सत्त्व अभेद प्रकाश सकल प्रकाश मिलि एक चिदप्रकाश अभेदप्रकाश एक एक प्रदेश इसो प्रकाश नैं लियां ऐसा असंख्य प्रदेश कों पुंज वस्तु प्रकाश तिहका एक प्रदेश प्रकाश मांहूं जो देखिजे तो अनंत अनुभव रस स्वानुभूति रस देखतां अपार शक्ति भेदाभेद प्रकाश मैं अनंत चिदप्रकाश रस लक्षण करतां अनुभव रस होय छै सो अनंत छै, वचन अगोचर छै।

अब जी रस को जो स्वभाव छै अरु जी स्वभाव अनंत प्रभाव छै सो कहिजे छै:- प्रदेश को अगुरुलघुतीको जों लखाव करता रस सो प्रदेश अगुरुलघु भाव को भेदाभेद चिदप्रकाशनिको लखाव तीमें जो रस की स्थिति अनुभूति तथा अनुभव रस तीको स्वरूप नीकों गमनरूप भाव सो स्वभाव भेदाभेद चिदप्रकाश भाव कों लखाव अतीन्द्रिय आनंद रस भयो छै तीकों यथावस्थित आनंदरस कों सु कहतां भलै प्रकार भवन कहता भाव तीकों वे रसको स्वभाव कहिजे अब वै रस का स्वभावकौ प्रभाव कहिजे छै:-वै आनंदरसकों भलै प्रकार होंवों तीकों प्रभाव ऐसो छै, वचनगोचर न छैं। अंतसौं रहित छै वो केवलज्ञानसों उपज्यो छै सो ज्ञान त्रिकालवर्ती त्रिलोक का पदार्थ अलोकसहित तिह का द्रव्यगुणपर्याय उत्पादव्ययध्रौव्य द्रव्य वा काल भावादि समस्त भेद जानै छै ऐसी ज्ञान सो अभेद सत्त्व छै तातैं केवलज्ञान कों प्रभाव अनंत छै वैसे की स्वभाव कौ प्रभाव अनंतगुणको प्रभाव प्रभुत्व एकठो कीज्ये ऐसो छै आत्मा को अनंतगुणरूप सहज छैं सो अनंतगुण पर्यन्त साधनौ वै प्रभाव मैं द्रव्यक्षेत्र काल भाव करि सदा अविनाशी चिदविलास वो छैं।।

इति